



BIBLIOTECA NAZ.

Vittorio Emanuele III

XXVI

A

38

NAPOLI

~~36~~









A.M.FREDRO
MONITA POLITICO
MORALIA
et
ICON INGENIORUM



VESALIAE
impensis LACOBIAE WESEL
ANNO 1700

2
ANDREÆ
MAXIMILIANI
FREDRO

Castellani Leopoliensis

MONITA
POLITICO-
MORALIA
ET

ICON INGE-
NIORUM.

Editio Nova.

❧ (o) ❧

VESALIÆ,

Impensis JACOBI à WESELE,

Et prostant Amstelodami, 18
Apud JOHANNEM WOLTERS,
Anno M. DCC.



118



Author


Lectori Salutem.

PRomptius (credo) succense-
bis , pro intuitu Operis , quàm
laudabis Scriptum , LECTOR.
Confusum ajes , quia non in ma-
terias combinatum , verùm stu-
diosè concisum , opere desulto-
rio sparsum , membratim distra-
ctum. Non diffiterer ingenuè
defectum , si aliter facere potuis-
sem,

sem, verum quot monita, tot rerum diversarum habes arcana; Forte vero videbuntur aliqua, inani studio repetita, bis, terque si releges, sensum & verba ponderabis, novum gustum ut capias, exinde longe videbis à semet diversa, aut rem in melius explicantia. Carior (utique spero) tibi obveniet horum lectio; quo mihi operosior venit scriptio, non enim novennio (quod vulgo ajunt) pressa, sed bis novenni operamata, trutinata. Domesticorum monitorum loco, hæc mihi (secretiori calamo) sensim cepi dudum annotare, crevit (per agnitos cominus, publice pri-

(o)

privatimque errores) ab experientia, & adiectione diurna, opus, cur improbes: si fidenter profero in palam, & Catholica charitate, tibi quoque non obfuturum communico, casta sobriaque mente praesertim legendum: Dabis aliquid pro naevo: lubens acceptabo, quid enim nostrum in orbe perfectum? & vita, & scripta, credo non sunt prorsus errore vacua. **PARCES** **LECTOR** facile, mihi homini ipse dum homo es, habes, credo [dicto facto] tibi quod ab aliis parcatur. *Vale.*



Cautio.

QUI semel hæc legis, neuti-
quam legisse te puta: Itera-
to revolvīs? scies aliquid: Jam
qui tertio: Utique totum capies
idque non perfunctoriâ aut ab-
ruptâ operâ, verum recollecta
[& in se retracta per totum men-
te] lecturus: Ni vero facias, se-
pone quæso librum, vel aliud age:
Leviculti, & obliqui procul hinc
sunt, maturis & defæca-
tis ingeniis, ista scri-
buntur.

AN-



ANDREÆ MAXIMILIANI
F R E D R O

Castellani Leopoliensis

MONITA POLITICO-
M O R A L I A.

Sen

Quomodo vivendum cum pau-
cis, cum populo, salva Virtute,
Gratia, & Authoritate.

Pars prima

POLITICO-MORALIUM.

I.

DEUM publicè & cum ap-
paratu cole, ut tibi factò, aliis-
que proficias exemplo, vir-
tuosi nomen, non ex vano paraturus,
eoque potens.

2. Sobrius sis, ut eveniant tibi res
sanæ, & sobriæ. A 5 3. O-

3. Omnia serio fac, & cum gravitate, nunquam obiter: Immo lente fac, nec properanter. *Currendo, non rependo, fit lapsus.* Deus cum magnificentissimum opus mundi aggrederetur, & momento in unico, pro summa potestate potuisset creare perfectum totum, prout potuit, immo fecit, sed cum humano modo factum orbi repræsentat, sex velut dies insumsit operi, ut monstraret mortalibus, magna nisi sensim posse fieri correctâ, perfectâque: vel quia magis magnificatur opus, cui non obiter immoramur faciendo. Vis rem bene habere? Lente fac, & sæpe corrige. De ipsa experire, reperturum te vespere, quod corrigas, quod mane actum, aut habitum ex perfecto credisti.

4. Sis publice munificus, sine jactantia & prodigalitate, *perdere multi sciunt, donare nesciunt.*

5. Non impera, non pete, nisi quæ obtinere speras, qui impossibilia petit, non vult habere, & simul vult offendi.

Idque

Idque per alios petes, nec satagenter:
Non objice statim authoritatem, sæpe
quæ nimis petimus, nobis neganda
præcavemus.

6. Non promitte, nisi quæ præstare
potes, ne levitatis arguaris.

7. Non dic nisi quæ verà, & sine
invidia audientium.

8. Frustra minas intendis, si time-
ri non credis, potius præoccupâ con-
temptum minarum, dissimulatione.

9. Meminisse magis oportet, quam
irasci aut dolore, infra tuum animum
esse doce, quæ acciderunt, ac potius
per risum habe.

10. Nec te lauda, nec vitupera, ab
hoc contemptus, ab illo invidia paratur.

11. Non mirare, non canta, non
lude, ut leviusculus.

12. Non sapius quære, potius sci-
entiam, quàm nescitiam simula.

13. Quæ tibi difficilia aut ignota ob-
jiciuntur, tacendo excipe. *Stultus quo-
que si tacuerit, sapiens reputabitur,*
(Prov. Salom.) A 6 14 Non

14. Non crebrum, lentum, non affectatum, & prope ænigmaticum sit alloquium: Sed tamen librata nimis & cluctantia verba, fastidium (immò suspicionem) pariunt audientibus, & cathedram sapiunt, solutior nonnihil sermo, magis familiaris est, velut de Petronio Tacitus: *Cujus dicta, factaque, quanta solutiora, & quandam sui negligentiam præ se ferentia, tanto gratius in speciem simplicitatis accipiebantur.* Circa familiare vitæ commercium cum amicis, in condimentum convictus, probaverim, in publicis tamen actibus, gravitas sermonis præstat.

15. Si vitium loquacitatis pervincere studeas, statue, non quid prudenter loquaris, sed quamdiu per intervalla tacendum (licet opportunè dicenda videantur) & vinces; Alias opportuna dicere cum studes, ad importuna erumpes, rectè ille ait, *Loqui me aliquando pœnituit, taciisse nunquam.* In nonnullis tamen loquitur bonus candor

dor & zelus, in nonnullis inquires genius, & dicacitas, dum in quascunque aures inciderint, ut confessorem intimorum judicemque sine discrimine personarum sibi statuunt, unde produntur & irridentur.

16. Nonnulli dum esse sinceri nimis volunt, incauti fiunt, proditores verius sui quam in amicitia aperti, cum dicenda tacenda pariter effutiunt per levitatem.

17. Quisquis blando vultu dicentes audit, iisque comiter respondet, pariter agit, ac si humanos amicos, in potestate sua, referendis affectibus, dum vult, habeat. Quæ virtus inter potiores (civium) parandis hominum & Provincialium ànimis, cenferi debet, si verò secus rugosâ fronte, obiterque dicentem audias, respondeasve, licet in gratiam postea facturus, quid juvat? Etsi obtineat qui cupit, cum à nolente & moroso profectum habet animo, non ut datum, sed velut extor-

tum, ac potius projectum. Ut pluris sit, blandam negationem retulisse, quam morosè obtinuisse concessum. Exinde usurpari vulgo dictum. *Esti non obtineat, habeat tamen velut acceptum qui se amicè audiri videt*, Tum illud, *Ager animus dum ad satietatem enarraverit quod vult, equiparatur obtento*. Vidit orbis, nunc & olim viros Principes, alias magnis animi dotibus præditos, sine hujus virtutis condimento, parum valuisse in vulgus, aut (quod pejus) in odium publicum incidisse, exinde recte, de Toletano Albæ Duce, quidam observatum reliquit, ut propter suum triste & fastuosum [neque ideo civile aut sociabile] ingenium, ne ab iis quidem amaretur, quibus benefecerat.

18. Vestitus propius magnificentiam sit, & auctoritatem, quam quæsitam ostentationem, aut luxum.

19. Gestus gravis, non Melancholicus, aut effuse hilaris.

20. Ab-

20. Absentia sæpe authoritatem tu-
care, *Continuus aspectus, minus veren-*
dos homines, assidua satietate facit.

21. Verissimum axioma. *In ignotis*
magis dilatarè animum. Exinde sæpe
æstimamus magis, longinqua, quam
proximiora, audienda, quam audita:
Tum videnda, quam visa, habenda
quam habita, pollicita, quam data aut
accepta, scienda quam scita: Et futura
quam præsentia. *Sic*, Majestati major
è longinquo reverentia, & omne igno-
tum pro magnifico. *Sic*, Authorum
ignotorum opera, magnifica habentur,
viso authore vilescunt, magisque post
funera inclarescunt facta, & virtus no-
stra & nomen: *Sic*, Major de absen-
tibus personis opinio; nam satagen-
tius ab ignoto quæritur: aut imagi-
namur. *Quis ille*, quam ut dicatur se-
mel in præsentia. *Hic est*, nec gradus
amplius datur, quò vadat animus, cum
visum & scitum, plene sub oculis ha-
betur. *Sic* (per varia cundo) pericula
Castro-

Castrorum, magis terrent longinquos domi, quam milites pro vallo stantes, & vulnorum spectatores. *Sic* nova subsidia, medio in prælio ex ignoto in hostem immissa, licet pauca, sed quia sub specie ignotarum insidiarum veniunt, plus terrent hostem, quam acies numerosa, oculis subjecta. *Sic* puorum minorennium aliquando delectamur plus ætate, quam adultorum, hi enim actu monstrant quales sint, aut quales amplius esse non possint, circa illos, latius spes extenditur; Quales futuri sint, immo ominamur (sperando majora ex ingenuitate) quales reverà futuri non sint, *Sic* ruinas antiquarum structurarum, miramur magis, quam forsan æstimaremus ex integro stantes, nam integrum quod est, oculis totum subjacet, & limitat (aut circumscribit) mentem, ne ultra procedat animus, tam imaginatio, quæ latius extenditur, quàm sensus: De ruinatis & in integro non visis, plus imaginamur, extendendo

do mentem per diversa, quam forsitan erat in rei veritate. Sic absentium ambigui sermones, sunt magis læsivi, dum sub latiore interpretationem cadunt, in præsentia effati condonantur levitati verborum, seu ingenuitati dicti, tum circumstantiis personarum, temporis, rerum, loci, jocorum, discursuum, occasionis, quæ sæpe minuunt offensam, dum in præsentia, prout in se sunt, capiuntur, neque delatorum malignitate torquentur, si præsertim illi exaggerando studiose, iram succendere amant, cui rem deferunt. Sic vana licet spes ex licentia ditescendi, & expectatio furtivorum, tum incertorum pollicitatio, plures quandoque assecclas habet, quàm certum bonum; quam merces & stipendia, ut verissimè à quodam sit observatum, & à me alibi dictum. *Gratius esse hominis animo ascendere in parvis, quàm persistere in magno, & per partes, quàm per totum; tum illud: Quasita in pretio, vulgaria habitaque*

18 *Andrea Maximil. Fredro*
bitaque contemnuntur: In pluribus opi-
nione laboratur.

22. Non dictum, factumque repete,
quò major insit ex raritate verbo, rei-
que autoritas.

23. Cum Gravibus ambula, levicu-
lorum conversatione delectaberis qui-
dem, sed tandem deturbaberis.

24. Non æstimatedos, juvenes, mi-
norenes, temulentos item, verbo,
multò magis conversatione vitabis.

25. Quæ cum dedecore in præsentia
dicuntur aut fiunt, modestè reprehende,
aut abi, subtracturus ab ea indignitate
oculos & aurem, multo minùs ipse fac,
nè velis placere assensu, quod est pro-
pè levitatem.

26. Negotia [*quoad tute poteris*] per
alios tenta, fac, impera, vide, cura;
leviorem jacturam rei credes, quam
authoritatis, immò admonebis corri-
gendos, non ipse, sed per alium, sic
vitabis præsentem exacerbationem, nec
facies periculum tuæ præsentix, quæ
nisi

nisi opinionem [quousque fit non vulgaris] ex raritate habet, gravioribus tantum negotiis reservanda, ut semper penes te restet, quò in majus dum vis, rem urgere possis. Non astum exinde, ut nonnulli Commentarium iniquè interpretantur, sed potissimum perspicacitatem Tiberii [ap. Tacitum Annal. i.] observare licet, qui exercitum in Germaniis tumultuantem, *tantum per filios adiri voluit, Majestate salva, cui major è longinquo reverentia, simul adolescentibus excusatum, quædam ad Patrem rejicere: Resistentibus Germanico aut Druso, posse à se mitigari, vel infringi, quod aliud (Nota verba) subsidium? Si præsentem Imperatorem sprevisent.*

27. Nunquam effunde totam simul familiaritatem & amorem, vel effusus, lentè fac & pedetentim, potiùs intendatur amicitia, quam intenta sit, habenda petitur, habita ut vulgata relinquitur, & satietate, vilescit. Er-
ravit

ravit ille, de quo annotatum, *Milites suos Commilitones, novo blandoque more appellans, dum affectat charior fieri auctoritatem principis emolliverat.* Sub initiis præsertim cavebitur, effusione officio aut favore, tum gratia ne aliquem prosequaris, sed facies intra moderationis terminos, dum enim intensi actus lassantur, quæ agenda tractu temporis sequuntur, vix iisdem principiis respondere possunt, pro injuria vero reputatur, diminui, tum auferri, in cuius possessionem semel involavit animus.

28. Hinc sequitur, ut non solum affectus *Amoris* (aut secus *Ira*) sed *prudentiam* ipsam per modica, nec affectate ostentemus dum æstimari volumus, nam pro vana ingenii ostentatione, dum per familiares discursus, effundunt se totos aliqui, nimii commemorandis rebus, loquaces & affectati, quasi nihil in posterum *pro subsidio nova objectionis* relinquentes, dum opinionem prudentiæ;

tia; & exinde authoritatem sibi parare cupiunt, potius eam perdunt, similes forensibus licitatoribus, cum levioris momenti res & crepundia ad nundinas ferunt, per obvia fora institorias tabernas ponunt, alias non quærendi, nisi emptores quærent ipsi, & essent inobvia. Jam verò, pretiosarum mercium venditores, ditioꝛe lucro negotiantur, eo ipso æstimationem mercibus posaturi, dum sine ostentatione, satis habent sciri de mercibus, & quæruntur ut vendant, non quærent, affectate emptores. Quidquid igitur æstimatum haberi volumus, in affectu nostro bono (aut secus contrario) seu in ratione agendi, lente, tum per modicas partes exerceamus, ne plene fatiemus, semper aliquid in potestate nostra in posterum reservaturi, quo in majus (dum pro tempore volumus) à nobis res intendatur. *Totum spiritum suum profert stultus: At sapiens reservat aliquid in posterum* (Proverb. Salomon.)

* 22. *Andrea Maximil. Fredro*
lomon.) & Eccles. *In ore fatuorum*
cor illorum, & in corde sapientum, os
illorum.

29. Non vitupera amicum, non lauda, non reprehende, nisi in magnis, idque raro, moderate, & *insecessu*, vel (si tute poteris) per alium, *factum tamen, non personam* ventilaturus.

30. Consilium nisi quod rectum sciveris, idque tantum requisitus porrigere? Verum dator consilii, naturam accipientis, [seu cui consulitur] induat, prout secundum possibilitatem, media, capacitatem, aptus est ille faciendo, secus, frustra ferè consulas, dum juxta te modo, non alterum, aut saltem non ex utroque, agendum vocas.

31. Non intercede aut pete pro alio, nisi re perpensâ, an justa sit, & obtentu possibilis, ne periculum auctoritatis subeas, si non obtineas, potius intercedere cavebis.

32. Non litiga verbo, sed potius subride (etiamsi contrarium aliquis loquatur)

quatur) non velis videri nimis sapiens, magni viri autoritas, non in disputando, sed agendo consistit.

33. Tacere qui scit, scit esse prudens. Taciturnitas est, magnæ prudentiæ Mater. *Qui animo ignavus; procax ore;* quibus os ferreum inest, cor sæpè plumbeum habent. Verum nonnullis, taciturnitas & agendi secretum ex diffidentia, aliis est ex metu, ut cum ex diffidentiâ sui, verentur, ne per inanimadvertentiam aliquid prodant, totum silent, opportunaque transmittunt, similes Zeuxis imaginibus, qui ad ostentationem artis, imaginum pingebat vela, ut subintelligeretur velatum aliquid, dum nihil erat; sic illi obtinent rebus inania arcana, nunquam directè, sed nisi circuitivè agentes, vel quia metuunt, vel dùm inertiam impotentiamque agendi prodere verentur. Fossam saltu trajecturi, impetum saltus, cursu intendunt, etiam animus agentis, zelo quandoque intendatur
oppor-

oportet, & apertior sit, pro confidentia sui, & pro ingenuitate, præstaturus ardua. Qui diffidit, metuit; Mollia, secretaque, cauta quidem sunt, sed quædam nisi fervidius tractentur, haud obtineantur, immò irritentur in pejus, cum dolus, malignitas, vel etiam metus, occultis secretisque (immò circuitivis) subesse creditur, prout verè circuitiva ingenia, plus astutiæ, quàm prudentiæ, vel cautionis habent.

34. Quæ imperfectè calles, non fac coram, immò perfectà fac, quæ non vulgaria & rarò.

35. Magna loquere, & à levi discursu studiose deflecte.

36. Facta secretus tene, facienda multò magis.

37. Vitia quæ vitare non potes, latebris dica, omnia quæ scis reprehendi, fac in privato, & *semotis saltè arbitris, turpis sis*. Non ea tamen est infirmitas naturæ humanæ, quin vitare vitium non possis, dum velis, frustra
naturam

naturam culpaturus, ipse culpandus; Vitare igitur turpia debes, quo magis altioris honoris subsistis gradu, minoribus magis quodammodo turpes esse licet, secus in majores honestosque, omnium oculi convertuntur & succensent, uti facilius maculam noveris in puriore cristallo, quam in olla.

38. Rectius plerumque impertinentia demendo in nostris moribus, in affectibus, & ratione agendi, quam addendo opportuna, paratur æstimatio & habetur autoritas: Velut hortulani, plus addunt horto decoris & amœnitatis, amputando fentes, evelendo urticas, purgando vias, disponendo plantas per ordines, quàm substernendo finum in fœcunditatem, quàm copiose ferendo: Excessu magis vitiorum homines laboramus, quam virtutum imperfectione. Prius quid non facere mali, quam quid facere boni, præceptis decalogi etiam docemur.

39, Raucus aut balbus, rarius lo-
B. quaris,

26 *Andrea Maximil. Fredro*
quaris, unde illusionis materies.

40. Causas dictorum factorumque non redde, sed potius intelligantur.

41. Sperent à te homines, ac simul vercantur: æque severus, atque clemens videaris.

42. Nec præsume, nec te minoris æstima, angulis & latebris ingerendo,ingere te (sed modeste tamen) primoribus. *Nemo contemnitur, nisi quis prius seipsum contempserit*, quomodo credis alios te æstimaturos? nisi te ipsum æstimas, & in leviuscula abjicis, tibi magis proximus, quam alius tibi, recte quidam ait: *Non est hoc superbire, Majestatem Regni, & potestatem authoritatemque publicam sibi concessam, conservare velle inviolatam imo hoc est sapere.* Verum perspicacitate utendum, ne superbiam morositatemque, cum authoritate confundamus, & quod est incivilitatis parandæ authoritati adhibeatur, ne alios pro unica æstimatione tui, immodestius aut scrupulosius

fius laborando, mille inimicos tibi, superbus pares, & eveniat, quod rebellis Angelo, dum supernis bonis honoreque non contentus, vult insuper esse *similis altissimo*, totum suum quod habuit perdit. Cavebis igitur *morosam gravitatem*. Hæc in privatis; In publicis verò actibus. *Consultum fuerit, ut qui debitos tibi honores denegat*, (præsertim si conscius sis necessariæ tibi gravitatis) *etiam vi & astu quodam, eos oportet præripere aliis, quam ea de re verbis contendere*; *Qui dubitat, merito ipse sibi diffidit, dissimulat, tacite fateatur suam indignitatem, & modesti apostea pro ridiculo habetur*; sed qui de facto, animo forti & constanti, tum bona cum gravitate [tamen sine intempestivo affectu] primas præ aliis occupat, quæ sibi debentur, nec offeruntur tamen, facili deinde negotio eas servat, & retinet in posterum. Ut quondam Germanorum legatis contigit, qui cùm ingressi theatrum Pompeji, legatos nationum, fe-

natores inter, sedere cernerent, inter eosdem senatores, sessum se audacter præripuerunt, subjungentes; *Nullos mortalium, armis pro Romanis, aut fide, ante Germanos esse*, quod comiter à senatu exceptum, ut ea legatorum civilis æmulatio, postea cederet in argumentum & possessionem loci.

43. Novarum rerum, aut inauditarum, immò novorum rumorum; à domo, immò ab externo, certam notitiam quære quod parit admirationem scitæ curiositatis.

44. Modica castigatio exacerbat nonnunquam magis, quàm corrigit, ut tutius sit, quandoque non punire, si severius corripere nolis. Non sine causa Salomon arguit intempestivam clementiam, dùm vocat *Misericordias* [aliquorum] *crudeles*. Bonis verè nocet, quisquis pepercit malis, sed hoc pro statu rei, & temporis: Scias tamen, quia *pœna nisi prohibet flagitium, laus vero & premia provocant virtutem, & accendunt animos.*

45. Nun-

45. Nunquam totum simul effunde, & proinde exarma rigorem, sed velut majorem in tempus dissimula [lentius corripiendo] quasi majus telum penes te relict, in terrorem exercendo, dum velis.

46. Delinquentem aliquem [cujus correctio ad te pertinet] non te puni-
turum ai, antequam puniendum manu teneas, immo propius nescientem sis, ne præmonitus caveat, contraria [per desperationem veniæ] munimenta quæ-
siturus, aut magnorum intercessionem provocando, quibus sine offensa recusare non possis, aut capitalis hostis [præ metu] evadet, ad hostem trans-
siturus.

47. Ea pollicere, quibus præstando sufficias, nè postea difficile aut grave sit præstare, in majorem offensam sperantis, potius non pollicere, sed fac, quod facturus sis.

48. Prudenter quidam, honorationem sui tacitè inculcavit, cum subor-

30 *Andree Maximil. Fredro*

nato quodam lixa, compteque in eam scenam vestito, palam dejici jussit pileum, decentiam morum, & superioris observantiam exprobrando. Item Marschalcus ille Regius, adornatum lixam, scipionē pulsavit, quod Palatium Regis importunè ingressus fuisset, non vocatus, quo inculcavit verecundiam, importunis intrusoribus, & quæ possint fieri in eam formam.

49. Metuendorum nomen acquirere utile aliquando, sed modo licito quærendum, per aliquam ostentationem virium & potentiae, ut potius vereantur homines tuam auctoritatem & potentiam, non timeant, ne in odium incurras.

50. Quæ populus affectat, tibi vero displicent, idem sentire te prius simula, & interdum lauda, post (facta quasi recollectione) deflece, sed sine rigore; nam qui directe multitudini se opponit, frangitur aut vincitur, ipse quam vincit; (vel ut subtiliter quidam,

Qui

Qui realis solummodo est, aut nihil præstat, sed irritat tantum, aut excessivâ virtute opus habet, rûmpentiâ & auctoritate, quâ vincat omnem invidiam.)

In quo satius prudentes nautas imitari præstabit, qui adversis ventis, non directam opponunt proram, velut contra vim reluctaturi, nec adversam relinquunt puppem velut fugientes & ex inertia cessuri, sed per latera inclinando navem, hac illacve sinuando vela & cursum, eludunt tempestatem, & simul assequuntur portum, quem volunt, ac proinde illudunt ventis; sic populi impetum, non aliter eludas, aut in rectum (prout in rem opus) reduces, quam per molliora, nec tamen molliter acturus, vel affectate, (quod æquè periculosum) sed graviter.

51. Immò dicentibus modicè assentiaris, licèt aliter post hæc sensurus, lentè in tuam sententiam quemque pertrahendo.

52. Quæ in publicum necessaria,
B 4 primo

primo verò aspectu ingrata populo, proponere vis, cura per alium proponi, & affectum primum populi in eum effundi: tùm postea modesta cum ratione, sequere ipse idemque petes, sed sine affectu, quasi minus curaturus, etiamsi non fiat, naturale enim, ut magis negentur (velut magis æstimata) quæ maxime petuntur, quæ minus curantur, ut vilia, faciliùs ex neglecto habeantur.

53. Illi plurimum potentiâ consilii valent, multaque præstant in suas partes, qui cùm sint potentia & auctoritate graves, per alios, non per se remtentant & consulunt, velut nescii, & taciturni, sed ex insperato metuendi.

54. Cura ut humanus & civilis habearis.

55. Si quis beneficium vel operam aliquam à te petat, & si scias plerasque in eo dari difficultates, non objice illas, ne recusare opem videaris, & te parùm benevolum petenti præstes, potius

tiùs in ipsius negotii cursu, eas difficultates, qui petit, deprehendat ipse & suæ petitionis arguatur, offerentur enim cum tempore occasiones, quæ promissum infectum reddant, tu verò promptæ humanitatis titulum non amittes.

56. Prima constans cum Authoritate repulsa, adimit plerisque importunam in posterum audaciam.

57. Obtento morbo, multa per absentiam, aut parantur, aut vitantur.

58. Patrocinando alienis illatis, plura in publico consilio obtinentur, quam per se rem directe tentando, licet aliquem multa ratio cum authoritate sequatur, quidquid idè optas fieri, alium authorem inferendæ rei ex composito substitues, tum alter amicorum, atque tu ipse patronum te pro authoritate præstabis, qui vero proprium allatum fortius urgent, præsumptionis notantur, veluti consilii sui, quod ipsi adferunt amatores, neglectores alieni,

B 5 quod

quod est prope invidiam. Jam vero secus, ut ab alio illata, tutius urgere poteris, liberius suadendo. Bonos tamen autoritate viros, proponendæ rei quæres, ne contemptu authoris, bene licet illata, in contemptum trahantur, ut ne tu postea patrocinando, rem stabilire possis.

59. Quod alibi in observationibus bellicis dictum: *Utendum recenti terrore in hostes*, hic item per familiaritatem verbi dici potest, *recentem terrorem etiam apud suosmet Cives multum posse*, ut à prætextu impositi recentis metus (si dextre instando liciteque utaris) pecuniarum collationes, tum operas in corrigendis pervetustis munitionibus, bonas item leges, facilius minoreque invidia apud populum obtineas, quæ alias per alterationes, turbas, odia, immò vix quidem assequare, si absit metus.

60. Absentiâ tui, meliorem suscita & tuare amicitiam, immò & auctoritatem,

ritatem, literas tamen non intermitte
& nuntios, pollicere tui præsentiam,
trahe interim & pone moras. Luna
Solis amica, decus & lumen quod ha-
bet, illi debet, quò remotior tamen,
pleniùs perfectiusque lucet, proximius
admota, decrescit, vel si planè con-
current, Luna penitus amittat lucem,
aut Sol necesse abeat in Eclipsim; Sic
verè amicorum magnorumque virorum
mutui congressus, aut crebrius nego-
tiorum commercium, majore jactura
amicitiæ, tum authoritatis fiunt, quam
ut novum aliquod argumentum in ma-
jus stabiliendæ paretur, Sæpè unus in
altero non reperit in præsentia, quod
sibi absens pollicebatur, unde verè di-
ctum, *Minuit præsentia famam*, sæ-
pius, *Absentia prodest*; Miraris? legi,
vidi, probavi.

6t. Modica munuscula offeres ami-
co, non simul, sed rarius ac potius
minora prius, dein majora, maxima,
nimis sero, ut diutius dando sufficias,

partim ut semper restet, quod majus speret à te amicus, ne relinquat quem suo damno. Usu probatum axioma. *Gratius esse hominis animo, ascendere in parvis, quam persistere in magno.*

62. Maximum rigorem prius intendere in speciem, temperaturus post ea ad famam clementiæ.

63. Experimentiâ probatum, magis appeti eorum amicitiam, plusque ab hominibus æstimari, qui neglectius eam servant, modò amant, modò offendunt, offendendo & amando non assidui (non tamen leves) modò potentia terrent, modò comitate trahunt. Neque causam reperio, quàm ab oppositorum ratione, quod magis clucescat, & sapidior reddatur amicitia, quasi tunc magis optanda, dum amittitur, aut secus evenit, aut eorum amicitia minus æstimetur, qui de paranda aut retinenda studiosè & appetenter nimis laborant, ut aliquando necessarium sit, non-nihil suboffendere, tum modicè negligere

gere amicum , quo magis retinere vis (quam ut perpetuò adhæreas) sed non diu adversa fronte & vultu, ne post-habearis.

64. Sæpè quod preces non possunt, minæ (aptè accommodatæ) operantur.

65. Non moliaris, nisi quæ præstare potes, ne prodas impotentiam.

66. Si aliquid adversi tibi accidat dic potius, sponte te accepisse, quàm ut supplantari nolens videaris, veluti invalidus, & obviæ impertitioni expositus, potius fortunam tibi obedire doce.

67. Alienanti se amico à te, aut clienti sine causâ, sponte media offer reconciliandi, potius bonis quibusque modis, eum in amicitia retenturus (medium tamen inter gravitatem) quam ut acerbicatem pro acerbitate reddas, quæ magis abstrahit, quam retinet in amicitia amicum, nisi alias potenter pervincas.

68. Minæ vigilantiam adversarii acciunt, ad cavendum, immò præve-

niendum, tu si taciturnus es; plura præstabis, non tamen ut noceas, verum ut caveas tibi, quod est penes virtutem.

69. Potius capiat per modica, aut sensim speret amicus, quam ut totum simul habeat. Non enim obligant, quæ data, licet maxima, sed quæ dantur, licet modica. Animus hominis, imitatur oculorum situm, quos cum anteriori parti corporis ingessit natura, non ea quæ post se sunt, sed quæ ante posita, vident; sic ille pensat, non accepta, sed accipienda.

70. Redditurus mutuum beneficium pro beneficio, moram adijce, ne dare videaris in recompensam dati, sed velut in obligationem futuri.

71. Exprobanti offensam amico, non seriò excusa, excusatio prope metum est, & loci inferioris signum, responde potius, neque illius esse exprobare, neque tuum excusare.

72. Religiosos in pretio habe, quatenus tuarum partium sint, devincies
vero

vero illos beneficiis, & comitate.

73. Immò Concionatores ad te trahere, qui bona narrent, & populo (quodvis utile in publicum) persuadeant, aut quod non vis, sermone (sed extra invidiam & ullius offensam) publice diluant.

74. Opinio divitiarum & nummositatis, parit æstimationem, teges igitur tuos defectus, ab arte aliqua honesta (sed procul ab ostentatione) omnibus imponens, ut bene de te credatur.

75. Propositurus aliquid difficile populo, causas honestas propositionis, per privatos rumores prius disseminabis.

76. Quantum in amico dono daturus destinasti, præstat cum iis aliquando honestè comessando consumere, cui diutius sufficies, quod verò diutius durat, magis in oculos incurrit & obligat, adde, quia unica commessatio, potest plures simul obligare, unicum donum,

donum, hominem unicum obligat immò aliorum (accipere præsumendum) invidiam provocat.

77. Mirum dictu, quantum lautior mensa, & liberalior convictus, parèt amicorum, cum per artes politicas, inter concives crescendi, studium cui adest, ut velut in alias virtutes incuriosi, hanc præcipuè viri Politici, in quovis venerentur & ament, aut sine illius condimento, cæteras obiter transeant, immò vitia nonnulla, hoc oblecta fucò, *dum mollius accipiuntur*, spontè dissimulent. Sicigitur intra magnanimitatem erogare, lucrum facere est, immò nonnunquam conducibilius, ultra parsimonix terminos in eo procedere, ad usque confinia effusionis, modo nè sit factum, intra affectatam prodigalitatem, cum decoctione bonorum extrema, velut multos aquid nos vidimus, sic crevisse, floruisse, & intra Civium favores præstitisse multa, ut opimam amicorum & formæ, colligerent

rent messem, cum haud parcè Civium animis, seminarent sua. Certissimum enim magnitudinis signum est, maximeque incurrit in oculos vulgi, tum in affectus, velle & posse pascere multos; eoque multis benè velle. Nec mirum, si CHRISTUM, vulgi sequens turba, in Regem creandum rapere voluit, (*Johannis 6. cap.*) cum tot hominum millia, ex suo divino penu, non pavisset modo prompte ad saturitatem, sed fragmentorum copia, magnitudinem convivii & Domini pascentis divitias loqueretur. Sed intra dicti reverentiam sacra manèant, profana liberius nobis loqui licet. Non ab alia occasione, primitivi Poloni, Piastrum olim, è plebeja domo, ad purperam evocaverant, quam cùm divinum quiddam illa ætas inesse viro crederet, cui pro medico agello quem colebat, ad stuporem usque Comitiorum (neque enim sine speciali miraculo, teste Historia factum) tantum alimentorum, ad

ad usque superfluitatem, humaniter excipiendis avenis sufficeret, ut plus erogando, plus semper illi restaret, & simul, magnitudinem cultioris animi in eo viro cum metirentur, qui sic esse cuperet cunctis amicus & hospitalis.

78. Astutis, arte simili aliorum astus eludere, mos est, ideoque secum in amicitia facile conveniunt, dum retaliare sciunt, rectiores nesciunt, nisi plerumque deferendo convictum, & rem cum illis plane vitando, donec in meliores amicos incurrant; Vulpi cum vulpe, urso uni cum altero, aspidi cum aspide, haud mirum si conveniat, cervis equisve, nisi cum mitioribus, aut sibi similibus vivere secutum est.

79. Dum sunt nonnulli fucatæ faciei liberalioris convictus, *praesertim si habeant aliquas species virtutibus similes*, ipsi subdoli, & modis illecebrarum potentes (vel quorum vultus est opportune mendax, tum in speciem probitatis sermo & facilis, haud spernendus capi-

capiendis hominibus hamus) facile eo condimento trahunt plerosque in sui laudem, tum in amicitiam. Non tamen altioris mentis homines, verum illos ex simplicioribus, qui velut minutiores aves, facile capiuntur visco: Recti vero & prudentes viri, non illa exteriora morum, & fallaciarum inania sed intimum introspiciunt pectus, & nisi solidiorem virtutem, tum amicitiam pensant: Quanquam convictus liberalioris amoenitas, si penes rectam virtutem prudentiam, alicui pectori insedit, miros affectus, parandis amoribus hominum facit, totumque in animos potest.

80. Videntur esse nonnulli amica-
biles, recti, prudentes, dextrique a-
gendo, & plane cum virtute magis
quam sunt, immò nonnulli non viden-
tur esse, cum verè sint, nisi tempus &
ocasio aperit virum, ut prima judicia
de hominibus sæpe nos fallant, velut
de ingenio nationum subtiliter quidam:

Hispā-

Hispanos factis & moribus magis videri intolerabiles, quàm verè sunt; Gallos magis esse fortè, quam videntur. Sed inest causa, circa horum amœnitatem, illorumque tristitiam (vel gravitatem actionis & morum) prout hujus aut illius, sumus æqui pensatores. Nisi igitur falli vis, sustine suadeam calculum, seu damnaturus, seu probaturus, & à tempore tùm actione, judicium exspecta. NERO flagitiis & sceleribus velamenta quasivit. GALBA major privato visus, dum privatus fuit, & omnium consensu capax imperii, nisi imperasset. (Tacitus sparsim:) VESPA- SIANUS, solus omnium ante se Principum, in melius mutatus est. OTHO, contra spem omnium, non deliciis neque desidia torpescere, dilata voluptates, dissimulata luxuria, & cuncta ad decorem imperii composita, eoque plus formidinis afferebant falsa virtutes, & vitia reditura: Mucianus, Luxuria, industria, comitate, arrogantia, malis bonisque artibus

tibus mixtus, nimia voluptates, cum vacaret; quoties expedierat, magna virtutes: palam laudares secreta malè audiebant, apud proximos, apud collegas, variis illecebris potens. In Vitellio Multa grata sanè & popularia, si à virtutibus proficiscerentur; & argutè idem de Pompejo: Pompejus occultior, non melior. Hæc alii, sed addam ex meo, & ab experienciâ. Plerique sunt boni, donec qui corrumpat, non adest, immò inest semper aliquibus male faciendi animus, sed deest occasio; boni sunt, dum malos esse non licet, aut præpediuntur. Rectè Sallustius de quodam, *Ore probo, animo inverecundo*, Et Vellejus *M. Lepidus, forma, quam mente, melior.*

81. Mirari debui dictum (verum satisfactum mihi ab experientia) quod argutia Italica nuper proverbio circumtulit, *requiri ad gradum prosperioris fortuna, ut insit alicui nonnihil ex Fatuo & Intruso*: Nam hoc modo, cito
invo-

involatur in notitiam, & confidentiam intimiorem *Aulae* tum *Vulgi*. Non promerentur hi quidem virtute, sed arte suffragantur gratiam, ad modum naturamque omnium & seculi, facilius se componentes; In impertinentia se ingerunt non vocati, ludicra, seria, pari importunitate tentant, & quandoque succedit, ut pro tempore non displiceant, non offendunt alios nec etiam (à certioribus) ipsi offenduntur. Verum intra jocum & amicitiae libertatem, facile habent, & condonant totum, alloquio faciles respondendo (per mixturam levium mendaciorum) amceni, prompte indomesticantur, non multo apparatu recipiuntur, neque sunt *Morosi Magistri in ceremoniis, & formulis*, haud quæsitum sui cultum requirentes; dumque non facile succensent personis & rebus (obviis parabilibusque per omnia contenti) censura eorum non timetur, ex imposita confidentia, & ex eo amantur.

† Adde,

† Adde, si forte super hæc, sint *audaculi*, multum honoris & præmiorum sibi arrogant, & obtinent per importunitatem (dum facile obloquia subdolis succedunt ex imprudentia) & occasionibus *instanter* non desunt *intrusi*. Directa vero virtus agit totum cum modestia, intra verecundiam, & dum importuna cavet, opportuna quandoque intermittit, sed hoc non ex virtute vitium, verum seculi, & eorum est, inter quos vivitur, dum rectam non prompte noscunt, nec acceptant. Tamen illa solidior est agendo, tandemque post tempus cognita, plus æstimatur, illi priores, sæpius (uti leviusculi) ludibrio habentur, & in seriis minus ponderis habent, mensuram nisi sodales, ludicrorum alumni, non nostri, sed fortunæ tantum amici, pro ut certe cum hac mutantur, nosque deci-

† Genus duplex intrusorum: *Servile*, vel *Andaculorum*, prioris generis sunt *alii*, hi, *sibi* utique meliores.

decipiunt, ad manus nostras non ad nos respicientes, facile ad alios transitori, unde plus utilitatis speratur.

82. Aliud est *esse innocentem*, aliud *habere praxin evadendi*. Aliud est *scire imponere*, aliud *justam habere causam*. Aliud est *esse fortem prudentem*, vel *bonum*, aliud *videri*.

83. Divinæ potestatis & prudentiæ (non hominis) opus, æquilibrium rerum tenere, causas combinare adversas, tum ex contrariis elicere bonum. Frustra ingenium hominis laborat, aut perspicacia contendas, ad certam regulam se componere, & publici status, vel privatæ actionis, ea in parte formare sibi *maximas*, nisi confundi velit, seipsam (serius citiusvè) periculo involutura; immo illud est, meticulosi tam versuti, quam perspicacis animi signum, Exinde vere dictum, *Media via nec amicos parat, nec inimicos tollit*. Qui oppositarum partium, hujus illiusque simul amicitiam quærit, aut utriusque

que

que simul offensas (*per obliqua*) vitat, poterit aliquanto tempore scenæ servare, detecta deinde larva, ut fallax hypocrita, & versipellis deceptor, ab utroque odio habebitur. Sic intuitu emergentis boni, qui oppositas sibi (personarum aut populorum) potentias, dein amicitias, tum offensas, æquali lance conservare studet, ne inter se committantur, tum, ne una noceat alteri, aut secus, ne sit infra alterum, ad æquilibrium moderamenque causarum, nequaquam sufficet diu, quin altera invalescat, partem oppositam, & simul fautorem consilii, oppressura. Sic, vereri aliquem, suboffendere, non tamen quæ sunt parandæ amicitiaë penitus facere, sed potius per obliqua tacitò irritare; Aut secus, tentare in rem suam, assequi quod est alterius partis dispendio & offensæ, simulque se amicum profiteri velle, odium verius conciliat, quam intentum parat, nisi aut rem habendam planè, at (*fortius pro*

C

æqui-

æquitate urgendo) gratiam partis post-
 habeas, alias neutrum assequaris. *Sic*,
 Diffidere alicui, & simul (intuitu spe-
 ciosæ cujusdam amicitiaë, tum securi-
 tatis) non sibi satis cavendo providere,
 immo amicitiaë titulum affectare quæ-
 rere; ac deinceps dissimulanter agere,
 nec amicitiam habeas, nec res tuas sta-
 tuas in securo. *Sic*, publico bono tu-
 endo, & simul privatis commodis au-
 cupandis ad laboraturus, alterum non
 obtineas plane, publicum vero bonum,
 certo certius subvertas. *Sic*, Veritati
 (tum virtuti) aut auræ populari; Le-
 gi (tum justitiæ) aut populo; Principi
 aut vulgo, Debitæ actioni, aut (par-
 te ex altera) parandæ opinioni; nequa-
 quam sufficias, nisi totus, *in* alteram
 (tamen æquio rem partem) agendo in-
 cumbas, sequiorem studiose oppugna-
 turus, aut si res suaferit (*rebus modo
 tuis, alia ratione diligentissime ut pro-
 visum sit*) posthabiturus saltem; vulgo
 dum places, rem agendam pessumdas,
 dum

dum secus ad rem probe agendam te componis, vulgi censuram mereberis, unde verus (præsertim in bellicis) monitum tulit. *Malo te sapiens hostis metuat, quam stulti cives audent. Sic;* (nisi alias tanta potentia vales, ut parte utrâque posthabitâ, negativè te erga utrasque habere possis, per quietam media securus tibi) neutralitas foederum non proderit, verum alteri parti *deliberatissime* adhærendum. *Sic;* Artibus status totum se dare, & conscientia legem non transgredi, DEO placere, & simul ad illecebras mundi se velle componere, nec hujus, nec illius legis, æquus assertor futurus, scripturæ potius censuram mereare: *Neque frigidus, neque calidus es, incipiam te evomere ex ore meo.* Non quod præstet, aut merè bonum, aut debere esse merè malum (velut obliquæ Politicæ Doctor Machiavellus docet) verum quod gravior malitia ab affectata intra virtutem & nequitiam neutralitate, tum mistis

(boni simul aut mali) actibus oriatur,
 immo affectatior (sub pallio virtutis)
 nequitia subfit , & aliorum vexatio ,
 quàm si utique , simpliciter malus sis ;
 Ut per omnia , rectoris prudentiæ sit ,
 & conscientiæ , ab utrisque partibus ,
 versandis , se totum separare , aut in
 unicam æquiores tamen , se totum
 transferre , & agendo instandovè (ex
 norma virtutis tum prudentiæ) fortiter
 incumbere , res vero suas (interim)
 consilio & prudentia stabilire , in quie-
 to. Qui alias partium rerumque op-
 positarum simul fautor , commoda
 utrinque venatur , rerum prævaricator
 potius , & interversor pacis , immo
Sophistico-Politicus , quam *Catholico Po-
 liticus* vocandus , seipsum astu invo-
 luturus , quo exercere studuit alios ;
 velut multa ejus rei exempla apud Hi-
 storicos habeas.

- 84. Debitum officii , præsertim vero
honoris , erga pares , adeoque magis
 erga superiores , studiose adimplebis ,
 nec

nec transmittes neglectum: Etsi enim aliquando præstari sibi nolint (velut incuriam simulantes) aut verecunde palam recusent, non fit, ut plane habere non optent, immo sic potius, promptitudinem tacito experiuntur, in offensam alias tracturi, ni obtineant? Aut si exsequaris (modo non fiat affectate, sed pro honoris debito) tantò obligatiores, in posterum habebis, **Cape; Exequere**, non improbata dico.

85. In adversis, ne sis nimium molli verbo, aut animo dejectus; Nec secus (in speciem generositatis, & infracti animi) jocabundus neglector, transitorie despiciens, quæ famæ, tum securitati parandæ serviunt, aut momentis invalescunt, uti enim hoc levitatis aut supinæ incuriæ, tum parvi judicii, sic illud pusillanimitatis, abjectæ mentis, aut ignaviæ, signum est, immo, prostituti in probrum animi, certum indicium; Potius ages totum, intra perspicaciam, cautus, prudens

& graviter: Qui considerat, providet; qui negligit, sæpius rem perdit; nihil agenti, neutiquam, *assa* (ut ajunt) *columba* venit.

86. Senum actio, aut juvenum conatus longe differunt; Juvenes garrunt aut clamitant, senes agunt; Sonum illi, pondus hi, rerum captant. Junioribus pro calore ætatis, prope- rantia placet, & audax magnanimum- que videtur, quod sæpe temerarium, prævidentia senioribus & cautio maturior inest: unde sæpius sunt cunctato- res, rarius periclitantur, aut eventu falluntur, in occasiones modo ex taci- to intenti, velut somnum & inertiam simulantes. Juvenes iracundi, in of- fensas properi; viri maturiores dissi- mulativi, ac sæpius pacati, aut si tan- dem actio requiratur, intra pruden- tiam, & cum cura fortes. Illi res mi- rantur, multa vident, aliqua sciunt, nec tamen probe discernunt, hi facta aut facienda æque penetrant, noscunt & di-


& dignoscunt. Juvenes pro ingenuitate primæ ætatis, dolum rebus subesse minimè suspicantur, unde, facile deceptionibus expositi pro nimia securitate, maturiores, viri, quia plura per adversa sæpius decepti, eventuum gnari, pigmenta rerum & rationum spernunt, supercilia omittunt, verum larva detecta, introrsus res ipsaque fundamenta inspiciunt & scrutantur, peritos venatores imitantes, vulpesnè? aut lepus? tum ferox aper, vel certe nobilior cervus impresserit gressum, per ipsa vestigia species ferarum noscitando, instant igitur, prout res & occasio suadet, aut secus, passibus suspensis in res vadunt, *Non temere adversa casum reputat, quem fortuna nonnunquam decepit, ait quidam, sed rectius alter: Mihi fortuna multis rebus ereptis, usum dedit benè suadendi.* Juvenes deinde suaviloquio plerumque laborant, & talia libenter audiunt in cætera incurri discursibus per inania re-

rum vagantur, quæstiunculis lasciviunt & ludunt, nam sæpius ex imperfecta scientia, de rebus dubitant, proinde vexant res magis quam agunt; incipiunt, dein deserunt; senes perseverant constanter, dum à fine res capiunt, nec ideo tentant frustra, minimè ex voto finienda, sed deliberatè aggrediuntur; quia vero non hærent in mediis (verum scopum rerum petunt expediti) super objecta breviloquio discernentes, hinc juvenes succensere amant senioribus, velut rudi minerva negotium agentibus, dum pro suo ingeniolo, & pro curiositatè eos metiuntur, pigmentis ipsi rerum & verborum assueti; Inest tamen senibus consummatio peritia; licet tentent aliquando simplicia & proximiora in medelam, sed quia præstare magis credunt, quam longè quæsitâ. Addo brevibus, tuta, aut sæcus periculosa, ante tempus seniores prævident, & ex vero indignant, si præsertim ipsi proparanda

da peritia non otiosam, verum per negotia exercitam ducunt vitam, gravitumque Historicorum lectioni dum immorantur, quæ suppleant ætatem. Juvenes super hæc reguntur affectibus ac præsertim respectibus primo crescentis fortunæ dicuntur, senes potentius suis affectibus & appetitui dominantur, ideoque commode alios regunt. Dicam verbo, juvenum actionem esse amœnam, & quodam cum condimento vernalibus diebus similem, maturi viri, laboriosæ (sed cum fructu) æstati assimulantur, magis enim serium, gravem (ac proinde tristiore) modum actionis habent, severiores sunt, verum in virtute constantiores, juvenes agendo molles, & sæpius leves. Hinc viris maturioribus expeditius res succedunt, dum non tenentur à negotiis, nec hærent, sed tenent illa, & regunt ipsi pro arbitrio. Velut peritos Automata-rios (horologiorum id est fabros) si videas, non satis mireris, crassa & fu-

liginosa manu-, nec certe delicatiore palpatu, subtilissimas horologiorum rotulas, audacter eos versare, per minutas partes distrahere, dein velut nulla artificii cura & attentione, prompta manu in pristinam formam redigere, quæ omnia ignarus artis delicatissimo licet contactu, disturbet verius, quam ut recte expediat, aut si forte aliquis, crebro intuitu, & arte se percepisse aliquid putat, ut etiam laborantem arguere non dubitet, dum tamen rem tetigerit ipse, nec prima, nec media scit, multoque minus postrema, promptius est aliena redarguere (vel fugillare potius) quam sua probe facere. Juvenum consilia modusque agendi, vinis recentibus similes, quæ plus dulcoris, plus etiam facis habent palatui grata, stomacho & sanitati nociva, aut licet quoquo modo clarescant, minus tamen ex virtute habent, quam per annos defæcata; quod sequens dies, juniorem erudiat, viri maturiores

turiores hodie jam sciunt. Ideoque
commode rem claudo, recta cujusdam
(in juvenem proterve loquaculum re-
busque obstrepentem) indignatione:
Post annum, fore si te prudentiorem
putas, cur? non me itidem cautiorem
credis, qui tot annis multisque casibus
te supero. Cum omnia honestarum
artium juvenes habuerint, rerum ex-
perientiam (prout eveniunt) nondum
habent, eoque senibus inferiores
sunt, affectata ludicrae illis pla-
cent, maturis res tantum,
& seria.



Pars Secunda.

POLITICO-MORALIUM.

I.

EXprobraturus aliquid publicè privatimvè, amico aut populo, potius terreas & trahas exprobrationem, ut intereà obtineas, quod vis; dissimulata enim timentur, evulgata *ut jam transacta*, contemnuntur.

2. Retenturus alicujus amicitiam, non statim dum injuriam accipis, exprobrabis illam, ne levi occasione alienes amicum. Omnino tibi diffidet ille, qui te offensum videbit, ut necessario averti debeat metu, vel conscientia facti, vel consilio, dum te facilem videt in offensam.

3. Beneficium aut officium, aut pensiones, & si plures in annos alicui prorogare in animo habeas, assignabis tantum annuas, ut si necessitas suaserit sine offensa auferre possis, dum velis,
partim

partim si prorogaveris, velut iterato beneficio, accipientem devincias pro-rogatione.

4. Ignei homines ingenii; tum leviculos, licet per alia tibi opportunos, cave, ne tibi adhærere velis, seu sint amici, seu clientes, immò dum advertis festinantes honesto prætextu eos procul amovebis; Nisi enim mature feceris, amoveri postea non poterunt, nisi magno tui fastidio, ut sæpius difficili negotio implicari debeas, amovendo, rem ipsam in meis casibus expertus, scribo.

5. Etiam illa ingenia clientum, multi periculi, & officiunt nobis, quæ sunt propè importunitatem, audaculè sese intrudendo, suadendo, petendo, accusando, hos aut illos laudando, curiose abdita rimando, tum rebus imponendo, præsertim dum sciunt, & amant per dicacitatem, ingerere suavia, cum vero suaviter loquuntur, & speciosis quæstiunculis, sensim tentant;

facilè nobis (sine sensu) nolentibus imponunt; quorum mox non poeniteat, ut non aliter eam pestem loquendi, aut hominum vites, quam non audiendo, aut te plane avertendo, vel quod prostat, procul relegando loquacem. Non alias magis CHRISTUS indignè tulit, Petrum corripiendo, quam dum in importuna (per speciem confidentiæ) curiose se ingereret: *Hic autem quid?* Tulit enim prompte responsum indignationis, & correctionem. *Quid ad te? tu me sequere, si eum volo manere, quid ad te?* &c.

6. Cum unus aut plures studium aliqua in re obligant, aut amicitiam offerunt, vel aliquid præstare faciles, quod in rem sit, utere *recenti* promittentis affectu, urge intentum, non differendo in tempus, frustraneum ea in parte dilationis (seu, ut vulgus ait, *discretionis*) nomen, certo certius per momenta respicere hominum affectus, & remitti potius, quam intendi, ut
sæpè

sæpè (vitio mobilitatis humanæ) alii in horas simus, posthac difficilius optatum habituri, quod ante sponte oblatum vidimus. Ast promittit ille (inquires) propensum se fore in tuas partes? falleris; præsentis enim vis est affectus; non futuri, qui bono casu (ut breviabiturus) oblatus, qualis vero ille futurus postea, ipse qui obligat, ignorat; mutato vero affectu, mutabitur intentum, frustraberis igitur, quod obtinere sperasti, nisi extra dilationes assequi rem coneris. Nonnullis immo, bene & amica loqui sæpius consuetudo, aut potius modus loquendi est, non modus affectus, & quo effusiores sunt suaviloquio, eo magis in amicitia fallunt, cautus ideo sis, pensandis veris amicis, & ab opere potius, non à verbo ponderabis, eo citius prætervolaturis, quo promptius extra deliberationem offeruntur, quasi nullus radices ab intimo amico & affectu petant duratura, verum in superficie modo lin-

do linguæ, cum salva abitura & nata.

7. Non amici solum affectus, sed contrarii, in recenti maximam vim habent, falluntur exinde, qui spreta prima reconciliatione, submissiorem sperant alteram, quæ potius tanto minor futura, quo magis procrastinabitur, ut enim omnes res, recenti sensu, gravius intenduntur, sic qui intulit injuriam, novitate delicti, vel à conscientia recentis facti, propius pœnitentem est, quam si evulgato pudore, & consumpta ignominia, depudere didicerit, cum ipsum vulgus (per familiaritatem rumoris) primo rem minus mirari, dein acerbius loqui, postremo dedignari factum desinit. Sæpe ideo pœnituit multos, non admisisse primam reconciliationem, ut nullam postea haberent, cum maximam sperarent, præoccupabis vero prudenter, modesta facilitate, neque rejicies pœnitentem, similior tamen renuenti, nec pecces facilitate.

8. Rarius utaris eodem curru, strato, cubiculo, mensa, domo, exercitio. *Nimia familiaritas parit contemptum. Continuus aspectus minus verendos homines assidua satietate facit.*

9. Res adhuc in quæstione. *Verum amari præstat, an metui.* Dicant quod volunt alii, mea sententia, uti Deum, sic hominem non rectè amet, nisi metuat simul, aut saltem nisi revereatur. Non igitur serviliter te demittes & effundes in officia amici, neque nimis eris affectator, aucupandis amoribus alicujus, quod penes contemptum est; sed ages graviter, partim ut quæras amicitiam, partim ut tua quærat, honorabis, sed ut honoreris, immo aliquando (idque intra gravitatem & extra affectum) amicum modicè negliges; timeat negligi, si ipse te negligat, & non amari, nec honorari, nisi ipse studiose te amet & honoret. Qui te igitur non reveretur, non recto, ne durabili amat amore, dum facit magis pro discre-

discretionē & voluntate sua, quam pro merito tuo. Addo (pressius loquendo) quod amari est in aliena potestate (*prout nostri actus cum bona gratia & affectu ab aliis acceptantur*) ut vero metuamur, esse in potestate nostra, non ut semper, quando volumus, amemur, semper vero metuamur, dum volumus, præsertim si incurratur in homines, ut cum ad normam virtutis, legisque præscriptum, omnia fecerimus, aut rem non intelligunt, aut pro malignitate secus interpretantur, cum in tanta depravati seculi malitia, clementiam rectoris, delinquentium insolentia superat, ut necessaria correctione in aliquos opus sit, tunc Justitiam, sævitiam vocabunt, nosque (pro sua malitia non merito nostro) oderint, cum ne Divina quidem, licet proba semper & optima, malitiosi hominum probent, aliquando pluere, grandinare, æstuarē, non ad suum beneplacitum, sed ex arbitrio coeli factum, illubenter ferunt, cum illud

illud in terræ fœcunditatem pro gratia, aliud in pœnam, pro iustitia, immittat DEUS, nec unquam argui possit. Ac proinde præstat inhærere causæ, quæ à nobis dependet, quam quæ ab alterius venit discretionē: Non tamen metus absque amore securus, immo obsit omnino, nisi metus ille valeat, qui ab æstimatione nostri provenit, sponte in animis hominum, per actus honestos & graves, adhibita *prudētia* & *comitate*, non vero (ut nonnulli falso arbitrantur) à potentia nocendi. Dicam amplius, metus nisi erga superiores res est (quos aliquacunque re prævalere nobis arbitramur) amor non potest esse, nisi erga inferiores, aut saltem erga pares. Si vero superiores à nobis amentur, potius *Cultum* aut *Reverentiam* dicas, quam absolute *Amorem*. Quod vero aliquorum belli Ducum virorumque egregiorum, excessiva severitas Manlii, Carbulonis olim, & inter recentiores Ducis Albani, Comitæ Fuentii,

Fuentii, aliorumque inter recti exempla sit, impossibile, si hæc sola trux austeraque, sine aliarum humaniorum virtutum condimento inesset, tantum authoritatis in suos, paratum fuisse, ut necesse, penes excessivam severitatem, excellentes quoque virtutes, pro contestatione magnitudinis exercuerunt. *Sæpe latet vitium proximitati boni*, immo altioris virtutis interventu pensatur, Erant in multos severi, sed in bene meritos liberales, labores castrorum imperando immoderati, sed nec sibi ipsis parcentes, fortes simul & successu; in admirationem felices, jussorum exactores austeri, verum erga promptos & obediētes grati, & pro comitate imperatoria nimium accepti, deinde erga afflictos egenos, injuriatos, victosque prompti, liberales, justī, minime avari, magnanimi, moderati, licet alias contra tumidos & insolentes insurgendo graves, demum nec bellando flagitiosi, nec vincendo

vincendo insolentes. Si vero illi non aliud scivissent, quam flagra, secures, cruces funera loqui, nec apud suos ex autoritate obedientiam, amoremque, nec in externos admirationem factorum, virtutisque suæ paravissent, sed velut feræ sylvestres, nisi nocere scientes, terrori fuissent & odio. Aliqui præterea pro indulgentia naturæ, ita sunt formati, ut non in animo tantum, quiddam magnum illis, imprefferit, sed per exteriora quoque occultam gravitatem in facie, aspectu, alloquio, corporisque forma diffudit, quæ sola primo intuitu æstimationem pariant, & velut præcursores sint in animos hominum, & in affectus, parandis amoribus (ac præsertim conciliandæ auctoritati, antequam altior virtus se exerat & innotescat, prout de Corbulone observatum tulit Historicus. *Corbulo omnium ora in se verterat, corpore ingens, verbis magnificus, & super experientiam sapientiamque, etiam specie ipsanum validus.*

10. Interdum parum negligere compellendo dicto, scriptore, timeat amicus aliquando negligi, & posse offendi, sed statim familiariter recipe, ne diutius neglectus assuescat sine te, ut vero aurum purius post ignem, sic motu melior sit amicitia, vina etiam meliora, quæ penes, dulcorem, sunt modice acris.

11. Dum frustra niteris impedire æmulum, malis eum juvari, & operam ultrò offerre, ut potius opinionem amicitiae obtineas, quam ut frustra impedisse illudaris, quo impotentia tua prodatur.

12. Cum alicui potenti æmulo resistere non potes, potius quæ res amicitiam (procul tamen à suspitione querentis) cujus sub titulo, facilius rebus obviam ibis, & illi resistes. Quoadusque enim inimicus est, contravenire aperte studet, dum vero speciem amici inducet lædendæ amicitiae verecundia tenebitur, ne tuis intentis contrarius sit,

tu vero interim, quod in rem habere voluisti, sensim aliud agendo perficias; semota omni fraude amicitiae & dolo.

13. Omnia capere valenti, totum dat, qui parum negat; potius sponte offert, quæ extra offensam negare non potes, ut quoquo modo gratiæ tuæ debeantur, quam ut invitus dare necesse habeas, nullo expensi in rem tuam commodo.

14. Detrahe potentes à latere æmuli, immo ejus intimos, domesticos, familiares, consanguineos, parando tibi munificentia, mensa, comitate, unde tibi omnia æmuli nota.

15. Da bona verba, palam, & in absentia.

16. Nescitiam simulæ rei, quo magis omnia scis.

17. Vide, non videndo, omnia.

18. Non asperneris convictum æmuli, sed tamen rarius congregere.

19. Minora quandoque consilia communicabis,

20. Nun-

20. Nunquam verbo carpe præsentem immo tu care famam, si opprimatur.

21. Etiam offensus, offensam dissimula, & velut non agnosce. *Unicum remedium injuriarum, si non intelligantur, qui secus interpretando injuriam extendit, vult scalpendo suum ulcus, per impatientiam, sponte dolorem auget.*

22. Nunquam exprobra suspectam amicitiam.

23. Rarius congregare cum æmulis, aut congressus cum omni apparatu gravitatem indue, caterva clientum.

24. Vita consanguineos & clientes æmuli, etiam si operam polliceantur, fac tamen, quasi non vitando.

25. Patiaris adversarium, non agnosce, & velut loco amici labe, omnibus benevolentiae signis præoccupando, & insidias muneribus avertendo.

26. Maximum præsidium rerum humanarum ex dissimulatione, Tiberius inter omnes suas virtutes *Dissimulatio-*

nem

nem adamaverat, tu etiam quoad potes, stude dissimulationi, si sapiis *Qui nescit dissimulare nescit regnare.* Ludovici XI. Regis Galliarum dictum ad filium Carolum VIII. testamenti loco. *Dissimula igitur Dissimula.*

27. Temerarie ambitiosus, turbabis, *stultus pertinax* perdendis rebus accommodatissimus, fuge quoad potes talium consilia, multoque magis convictum, ne impingas in errores.

28. Peccant, qui nimia lenitate dulces, cum enim effuse dant se populari auræ, aut omnem infimæ plebis rumorem affectant, contemnuntur, virtuosique quidem hi sunt natura, sed etiam molles, ideoque ad res gerendas parum valent. Prudens rigor rebus non obstat. Mordent sanguisugæ, dum profunt. Nec enim aliqua difficiliora obtineas, nisi pro tempore, aliquod inconveniens, in urgendum adhibeatur. Idem consilii medicis inest, ut in morbis malignis & urgentibus, admisceant potio-

D. nibus

nibus, de venenatis pharmacis, commovendis promptius pellendisque noxiis humoribus, verum adhibent simul diligentissime excellens correctivum, exquisitam dosim, perfectissimum temperamentum, sine qua cura, medendo plus noceant. Instabis igitur opportune, urgentiore verbo, dextra ostentatione potentiae, minaciore vultu, intra tamen auctoritatem; mox ubi terrueris modice, rursus in molliore alloquio, tum obvio convictu, irritamenta amicitiae ostentabis.

29. In malis mœstitiam, in bonis dissimula diffusam lætitiā.

30. Quemque diem examina, an amicum paraveris, (aut amiseris) & cura ut pares.

31. Summa auctoritas nisi penes potentiam & fortunas, in minoribus pro superbia habetur *Cavebis igitur morosam gravitatem.*

32. Talem apparatus mensæ, vestium & reliqui sumptus instrua, qualem

Iem semper habere potes, & à minori potius incipienda omnia suaferim, quæ posthæc facturus es majora, ne eo majorem incurras in contemptum, quo magis laudatus fuisti, si idem esse, quasi lassus desinas.

33. Non demisse servias majori, sed reverenter, & sedulus sis, penes potius, quam perpetuus; Magnorum aliqui, recepta amicorum obsequia, non ad gratiam urbanitatemque colentis, sed ad debitum, superbiamque suam referunt, & statim acceptorum obliviscuntur.

34. Eos etiam in amicitiam pertrahere, qui plus apud alios possunt.

35. Non prompti sint tui aditus, non obvia comitas, ea tamen moderatione rerum, ne superbiæ titulum tibi parias.

36. Facilitas amittit auctoritatem.

37. Oblatum munus potius lubens & animosè accipe, quam serviliter gratus; partim debere te, partim deberi tibi gratiam doce.

D. 2

38. Jube

38. Jube punire, non spectā.

39. Non increpa, sed graviter admone, & torvo aspice oculo. Absis vero facias contumeliose, nam excubas magis, quam corrigis, certe medicus, asperitate curandi, horrorem medicinæ, ægro imponit magis, quam inducit sanitatem, ut ægrotare, levius nonnunquam accipiatur, quam per acerba sanari, nemo sanavit vulnus scalpendo, verum unguendo, & molliter obtegendo.

40. Severitas amittit assiduitate auctoritatem.

41. Sine strepitu aut acclamatione (seu exprobratione) puni delinquentem, sæpè vero lenius & modestè, quasi invitus facere videare, est prostrasse satis posse prosternere dum velis.

42. Majorem aliquando pœnæ apparatus, verborum severitas, tum exaggeratio, imponit austeritatem Domino, & infamat punientem, quàm ipsa pœna. Si igitur pro merito deli-

Et punias, molliter saltem loquaris, flagitium, non personam osurus.

43. Potius quandoque dicto contrarius sis, quam semper serviliter assentiaris, doce aliquid tibi displicere, pro libertate sentiendi, quod est prope generositatem. Sed plerumque ab hominibus (à Principibus verò præsertim) ii pro sapientioribus, immò pro melioribus habentur, qui ad eorum sensum & voluntatem magis accedunt ac loquuntur, decipi malunt, quàm non ad gustum suaderi.

44. *Bonum habetur ex integra causa, malum ex singulis defectibus*, ait quidam. Quasi dictum velit, ad rem bene habendam, omnia impedimenta amoveri debere; minimus defectus si obstat exsequendo, etsi reliqua bona media videantur, res tamen haberi non poterit & intentum.

45. Sæpius cum titulo, quam sine, alloquere, quemque pro merito decenter honoraturus, nec tamen affe-

 tate, ut similiter te compellandi & honorandi insinues necessitatem, aut secus (velut importuna ceremoniarum) si negligas, alias idem erga te omittere, teque contemptum haberi posse doces. Qu  civilitas mutui honoris, adeo in animis hominum valet, ut non privatis modo inter se civibus, sed magnis Principibus erga sibi subiectos, non sit per incuriam transmittenda, nihil enim magis offendit animos, aut verius exacerbat, quam contemptus personarum, si pro merito non honorentur, velut ille ad Principem, *Cur*, (inquit,) *ego te habeam ut Principem, cum tu me non habeas in Senatorem*, Neque Julium C sarem aliud pr cipitavit in necem, accelerando conjurationem (qu  differri aut sopiri poterat) quam Senatorum Consulunque contemptus, quod reliquum offensarum erat. *Accedentibus* (ait Plutarchus in vita Jul. C s.) *ad C sarem sedentem pro nostris Consulibus, Pratoribus, totoque Senatu, C sar non*

non assurrexit tanquam si cum privatis hominibus colloqueretur, quod non Senatū modo, sed populo offendit, Civitatemque ideo rati [per ignominiam Senatus] ludibrio haberi. Magna igitur cum tristitia discesserunt è curia, quotquot discedendi facultatem habuere, adeoque Cæsar sensit indignationem eam, ut statim domum abiret, reductaque à collo veste, vociferatur, se paratum esse ad præbendum [si quis necare ipsum vellet] iugulum &c. &c. Ferunt vero cum assurgere Senatū vellet, eum ab amico, aut verius adulate quodam suo, Cornelio Balbo, prohibitum monente (vide nequam adulatorem) ut se Cæsarem esse meminisset, seque ut præstantiorem coli pateretur, &c. Nihil igitur magis offensam in animis movet, quam si honores aut tituli contemptim auferantur personis, immo magis si pro malignitate dicacitatis, adjiciantur scominata præsertim in ingenuos Cives, qui eo magis delicatioris sunt animi in offensam, quo

80 *Andrea Maximil. Fredro*
magis suæ virtutis sunt conscii.

46. Famulitium sit tibi decorum,
equus, cibus, & honestamenta domus.

47. Nunquam privatus fias, aut
quasi incognitus.

48. Quanquam inter adversa, salva
virtutis fama, non vultu demisso aut
supplex, sed ex memoria prioris for-
tunæ agendum.

49. Æquale Matrimonium, pro au-
thoritate.

50. Liberorum bona educatio &
bona fama, Parentibus solatium & æ-
stimatio.

51. Domesticos clientes, veraces po-
tius habere, quam blandiloquos, qui tibi
ex fide referant & præcaveant, si aliquid
in populo de te spargitur, ut eas recte
facto obviam, seu ipsi diluant, vel ex-
cusent. Falluntur, qui illos, nimirum
placere volentes, in amoribus habent,
venundatores potius suæ famæ, quam
amicos, permitte spontè (si sapias) re-
ferri tibi modeste omnia extra metum

&

& offensam, ne ignarus sis obviando vel præveniando, immo te ipsum corrigendo, vera enim exprobrat aliquando vulgi obrectatio, quæ ipsi amore nostri, aut nostrorum, tum per incuriam, in nobis, nostrisque, non advertamus, domestici vero coram nobis taceant, aut præmonere erubescant. *Vult volens decipi, qui nisi blanda sibi narrari cupit.* Deinde domesticos tuos, non nimis molliter, sed in actione occupatos habebis, ne innutrientur otio, occasionibus posthac emerfuris, futuri inutiles, desidiosus, insolentes, dum pro injuria reputabunt, si ad actionem aliquam vocentur, semel desueti: idem innuit perspicacia Salomonis (Prov. cap. XXX.) *Qui delicate à pueritia nutrit servum suum, postea sentiet eum contumacem.* Honoratioribus igitur domesticis, per honestiora muncrum, inferioribus, per minora servitiorum uteris.

52. Incessus lentus & gravis, vox
D 5 sub-

82 *Andrea Maximil. Fredro*
submissa, cum opinione Majestatis.

53. Semper vera loquere. *Mendacium servile peccatum est*; immo naturam furti habet, furtum rem aufert alienam, mendacium verborum congruum furatur veritati, prout commune proverbium Polonorum fert. *Mendaces consequenter esse fures*. Immo sunt leves, garruli, infidi, inconstantes, versuti; simulativi, fallaces, venales, injusti, nam ferè idem (ex non recte agendi) vitii suppositum habent. *Veritas mater virtutum est*, exinde cum omnia recte facit, *Deus veritatis* vocari voluit; in diabolo quia obliqua omnia & contraria sunt, Patris mendacii, supremum titulorum habet; quem igitur rectum virum probatum cupis, vide an dicto verax sit, vix enim fieri potest, ut facto obliquus fiat. Veritatem semper probo & suadeo; verum in aulis Regum, ingrata ut plurimum veritas est, pauci sunt veri amantes *Josaphat*, sed plures *Achab*, prout certe, si

te, si veniat in aulam verax *Michaas*, indignationem Regis experiatur (*odium, quia non prophetat mihi bonum, sed malum*; III. Regum Cap. XXII.) aut incurrendum in colaphum adulato-
ris *Sedecia*. Abesse igitur à consilio præstat (præsertim si odio multo, nullo fructu, veritate laboretur) vel cum ades, veritas omnino loquenda est, præstat amittere gratiam, quam conscientiam, immo præstat agere *Michaam*, quam falsarium *Sedeciam*.

54. Satiùs te submelancholicum aut gravem potius, quam jocosum agnoscant effuseque hilarem, comitatem tamen serva, cum illis præsertim, qui ad mutuam humanitatem, non ad suum fastum, referunt omnia arroganter.

55. Quod scis per obtréctatores detrahendum tibi (quod tuæ domui aut in moribus casu obveniat) potius præoccupabis spontè fatendo, non detrahent, neque loquentur in exprobrationem, quæ fateris, aut in quo te-

ipsum sponte culpas, aut per jocum habes.

56. Cave ne unquam conqueraris, etsi pro impatientia doloris opportunum credas, deesse enim tibi aliquid, sponte fateris, circa amicos, vel circa fortunam, proditor tui ipsius, & ægritudinem animi simul detegis, etiam ignotis, ut qui te omni ex parte felicem credidere, magis inde æstimaturi, jam secus aliquid demptum credent, in levipendium. Omnes ideo hilari vultu excipe, quasi omnia ex optato fluant, non alia re magis invidos tibi confundes, qui aliàs tibi adversa optant.

57. Non in vestitu superfluo, aut domo exquisitis mobilibus ornata (modò hæc sint necesse circa honestatem) verum in virtute & morum constantia, viri Politici autoritas consistit.

58. Severitate sis gravis, blandientibus incorruptus, adversus minantes invictum habeas animum.

59. Omni-

59. Omnibus sis cognitus & comis, multos sæpe convictui, raros secreto intimiori admitte.

60. Observantiam tui in minimis firma, in præsentia majorum, ut exemplum honesti reliquis inculces.

61. Plura sæpe in nos peccantur, dum complacemus, quam dum contrariamur.

62. Honores & præmia ipse tribuas, pœnas vero aut redargutiones (si quæ irrogari justo debeant) irrogari cures ab aliis, ut aliorum invidia, acerbus, sic tui merito munificus & amabilis.

63. In consultatione, dum contrariæ emergunt opiniones, qui mediam attulerit, plerumque omnes in suam trahit sententiam, non quod melior ista, sed quod ad medium, quam ad totalem assensum adduci se plerumque patiantur homines.

64. Cum magnis Viris & Principibus extraneis, notitiam quære, & communicationem literarum, aut internuntiorum inferes.

65. Structuræ non vulgares, statuar, templa magnifica, famam authoritatis retinent, & parant opinionem, item sapientum monumenta nomini dicata; Nam quæ majores requirunt impensas, nisi à generosis factoribus facta veniunt, præsertim cum non sui lucri, sed publici commodi intuitu impenduntur, ad famam posteritatis. Sic *Zeuxes* pictorum præstantissimus, picturas suas excellentes, nullo pretio exponebat, Civibus eas gratuito daturus, ut magnitudinem animi testaretur, immo forsitan quod arbitraretur, operam suam eò æstimationis ascendisse, ut omne pretium superaret.

66. Propositurus aliquid populo aut amico, quod in rem mutuam sit, potius quæres modos, ut petaris, non petas.

67. Consulebat ille non leviter suæ authoritati, qui inter colloquendum, stabat aperto capite, ne sedendi aut tegendi capitis, minoribus foret necessitas.

69. Hi-

68. Histrionum & levium ludorum, non sis spectator, tamen nonnulli honestæ popularitatis loco ducunt, habere intra domesticorum numerum, joculatores & histriones lepidos, ait *Marius apud Sallustium*. Sordidum me & incultis moribus ajunt, quia parum scite convivium exorno, neque *histrionem ullum*, neque pluris pretii coquum, quam villicum habeo; Nam ex Parente meo accepi munditias mulieribus, viris laborem convenire, arma, non suppellectilem decori esse.

69. Voce oppressos, defende potius, quam opprimas, & patronum miserorum, publice age.

70. Loquaces & leviusculos, tum vinolentos, noli laceffere verbo.

71. Legatos extraneos, honorificè domi tuæ excipe, quo famam nominis spargant, & ab iis cura salutari.

72. Postula magis, quam supplex roga (quia facilius res sic habentur) ac potius per aliòs, nec unquam oblitus
tui,

tui. Illaudatum aliàs, Othoni (apud Tacitum) *Qui protendens manus, adorare vulgum, jacere oscula, & omnia serviliter pro dominatione.*

73. In publico populi consilio, multa objecta sæpe solvuntur tacendo, multa respondendo, immo multa non audiendo.

74. In gravioribus causis, aut questionibus, tum objectis, si melioribus consiliis res flecti non poterit, *non quid respondeas: sed quemadmodum non respondeas? cogita.*

75. Qui multa respicit, nihil agit, dum consilio, seu dum facto opus est, in consultando præsertim illi, qui more in partem assentientium transeunt, aut qui mere contrariantur, probantur, ambigui vero, seu neutrales, (velut vulgo ajunt, *Non totaliter resoluti*) neque apud populum, neque apud Principem parant sibi auctoritatem, utrique parti suspecti. Rectè dictum. *Medita via, nec amicos parat, nec inimicos tollit.*

tollit. Tum illud, *Tremula manu vitrum capiendo, quo magis frangere quis cavet, frangit.* Merito succenset Tacitus (Histor. III.) Vitellio, ejusque produci, dum in hanc illamque partem studiis distenditur & expendit diversa; cautus nimium esse cupiens, proditor sui verius factus, *quod inter anticipia deterrimum est, dum media sequitur, nec ausus satis, nec providit.* Eo collimat dictum (apud Ecclesiastem Cap. XI.) *Qui observat ventum, non seminat, & qui considerat nubes, nunquam metet.* Resolutus ideo sis facere serio, quod aggredieris, non tamen aggredieris, nisi factu licita, nedum involvere vis, periculo involvaris. Licet DEUS adest.

76. Apagè cum amicis, qui sæpe reconcilient: Aut cum domesticis, qui crebro deprecantur.

77. Majora negotia apud populum tibi tractanda assere, minutiora relinques minoribus, quædam digito opus habent

90 *Andrea Maximil. Fredro*
habent movendo, non brachio.

78. Etiamſi omnia refutanda ſint, aliqua tamen approba, ne omnino contradictorius eſſe videaris, ſalva tamen virtutis fama.

79. Primis injuriis ni reſiſtas cum gravitate & virtute, contemneris. *Veterem qui fert contumeliam, invitat novam*, at quomodo, non procaciter, verum prudenter reſiſtendum? tu videas.

80. Paſſio plerumque in nobis dominatur, & zelum putamus, dicendum ſeu faciendum aliquid, nobis uſu venit, verbo invehimur, velut correcturi, & exacerbamus potius, ſæpe detrahimus, ſæpe diffamamus, ſæpe irritamus materias & perſonas, quod agere pro modestia, aut intra diſſimulationem, magis in rem fuerat, veritas, omnisque modus agendi, ſtylum ſubtiliſſimum referat, non cuneum, qui findit magis, quam penetrat. Cum nimis juſti eſſe affectamus, in injuſtitiam impingimus, ſævitia quandoque eſt, dum
puni-

punitionem putamus, nec est correctio, sed exacerbatio aut alienatio amici morosa. Cum rigide (vel ut ajunt) *Morose ad pulvisculum usque*, repetimus nostra, non fit, ut aliena cum nostris non involvamus, impertinentium verius raptores, quam exactores justis; sæpe deinde potentiam credimus, cum inferre injuriam possumus, aut secus accipere credimus, nisi inferamus, nec repulisse est, nisi alter injuriarum patiatur. Quæ igitur minore damno aut scandalo dissimulari possunt, dissimulanda prudenti viro suaserim, privatam aut publicam pacem, quietem mentis, pacatam conscientiam habere qui cupit; Eo fere collimat dictum. *A justitia recedendum nonnunquam in parvis, qui velit salvam eam in magnis*, non enim sic erit injustitia, sed dissimulatio justa. Idem vult Spiritus Sanctus apud Ecclesiastem. *Noli esse justus multum, neque plus sapias, quam necesse est.*

81. Proxime sequitur, virtutis etiam zelum temperandum, idque amore in majus promovendæ, ut dum nimio ipsius (prout debemus) ducimur amore, tamen secundum tempora & personas, prout res agenda venit, suavius (cum vitii quadam dissimulatione) sensim animis hominum eam insinuemus, quod non est recedere à virtute, sed eam provehere in majus; Scriptura docet alios hominum acerbius increpitos, alios per similitudines suaviter reductos, potius quam retractos, sic CHRISTUS, dum bonum Patrem familias representat, intemperantem zelum fervorum arguit, & dissimulare docet. *Sinite, ne forte colligendo Zizania, eradicetis simul cum eis & triticum.* Sic erratum à nostris in Moschovia, intempestivo, ne dicam insolenti religionis zelo, cum enim Demetrius Magnus Dux Moschorum, Polonam virginem in uxorem duxisset, occasione Catholicæ Principis aliqui Polonorum jactantes ad invidiam usque Moscho-

Moschorum schismatis, ritum Catholicum dum promovendum contendunt, Demetrium Ducem, novamque nuptam, in exitium præcipitarunt, Poloniamque cruento implicarunt bello. Sed magis profana nobis serviant, in exemplum, severi mores Galbæ Cæsaris, licet recti, sed non pro tempore adhibiti, exitio fuerunt, *quibus impar ea ætas erat*, cum forte circa flagitium militaris donativi, magis animose, quam in rem opportunè diceret, *se militem legere, non emere*, dum rigidus recti priscique moris assertor affectat fieri, non assecutus, simul rem, seque perdit: Consultius alias facturus, si intra dissimulantem, importunitati nonnihil in tempus concessisset, & delinivisset humaniori verbo flagitantes, sensim alia via eum tempore in melius reducturus, neque à virtute Imperatoria sic recessisset, sed intra prudentiam regendi, habuisset totum. Etiam in asserenda libertate, circa observa-
tionem

tionem antiquarum legum, vel aliquid novum stabiliendo, temperato & collecto zelo opus, secundum res, tempora, aut personas agendo, ne dum reducere ad normam rigide contendimus, potius malum, resque irritemus. Qua in re summa perspicacitate, iudicio valido, ac super omnia, experientia opus est, nec possunt in eo valere, nisi sedata, defæcataque ingenia, *quæ non quid debeat fieri, vel prout aliquando factum est, sed quid nunc rectè possit, ex æquo pensant, magis è particularibus causis, rei que propinquioribus, quam ab universalibus maximis (quæ in particulari fallere amant, & iudicium consulentis non leviter arguunt, nam universalis multas receptiones habent, & multas circumstantias requirit imitatio, ideoque sæpe nos fallit) consilia eruendo, & quæ non habendi cupidine, aut spe inani, sed magis possibilitate certa beneque consulto, res metiuntur, dum ratio appetit superior est.* Aliquando enim

enim suavitas agendi, aliquando rigor, aliquando utrumque simul, vel demum nihil agere, sed dissimulare in tempus, & ferre malum prodest, ne dum præcociter, unicum vitamus, multa majora immo plura incurrantur, res irritando, ut hoc casu serviat dictum, *Malum bene positum, ne moveas.*

82. Igneæ nonnulli tum inquietæ mentis, tum sibi non otari, sed agere complacent, dum quieta, non sinunt quieta, aut nisi res turbent, & in aliena (quæ sæpe devorarunt) invehantur, & pro injuria reputant, famam potentiæ ex aliena injuria aucupantes, ut igne Salamandra, sic nonnulli asperis & discordia vivunt, *qua alii flagitia, hi remedia vocant: In id nati, nec ipsi quiescant, nec alios sinant.*

83. Potius non videre te injuriam simulam, quam dum vides, vindicare illam opus habeas ne si agnitam molli-ter dissimulaveris, pejus contra te in posterum peccetur.

84. Si impetu in aliquid novum fertur populus, cui resistere non possis, satis penes virtutem habeas, si non assentiaris.

85. Quæri exinde potest. Quid securius, & in rem magis opportunum, an præcipui unius, vel saltem aliquorum in Republica, aut vulgi aucupari favorem? Non disquirendo hinc illinc, constat, qui totos vulgi favoribus se dedere, ab ipsomet vulgo proditos, oppressos: In cujus gratiam, cum omnia feceris, semper aliquid in malis vulgus requirit, vel ni sufficias, antea benefecisse damno est. Quod vero malus, dum abutitur vulgus bonorum virtute & opera (semper eos casibus objectando) facit velut indiscreti equites, cum bono equo lati, intemperanter utuntur, & nimio cursu fatigant, non parcendo labori, nec alium substituentes, eum perdunt, quod in vitis Gracchorum (apud Plutarchum) observatum habeas, & ratio in promptu. Nam
facilius

facilius paucorum genium noveris paraverisque tibi favorem, facilius gratiam demerearis, aut iratos placaveris, facilius cum paucis agas, suadendo, dissuadendo, orando facilius obtineas, dum se citius pro paucitate expedire possunt, decernendo. In multitudine secus, communitas frontem non habet, quæ non tam facile de maledictis erubescit, dum dispersim ignominia, in tot capita vadit, ad unius vero Principis personam (non divisim) tota infamia (ejusque posteros) directe spectat, eoque magis afficit. In populo deinde, diversa sunt subiecta, inclinationes, affectus, studia, quibus impossibile ex æquo ut satisfacias, dum pro diversitate ingeniorum, suspicantur, vana, aut secus interpretantur, cum non intelligunt rem, plures vero pro malignitate. Offenditur quidem Princeps veritate, sed magis offenditur, & simul fuerit populus, uni dum placeas, alterum fere offendis, nam in
E amores,

amores, odium, æque facile vulgus fertur, non ut studiose velit, sed uno alterove impellente. Quod vero gravius, si in aliquid bonum fertur populus, omnes (unus alium circumspectantes) curam adhibent; jam si nocere cupiant, quisque pro se, manum studiose adhibet in ultionem; ad nocendum uniti, ad benefaciendum tepidi & distracti. Ex eadem ratione forte *Machiavellus*, ingratiorem fieri populum censet, unica Principis persona. Dixerim itidem, præstare favorem aliquorum præcipuorum in Republica, (sed quem non per flagitia & obliqua demeriaris) favoribus vulgi. Addo super hæc, si non altioris alicujus boni, aut virtutis intuitu (quæ sola sibi ex conscientia recte facti præmium est) sed aucupandæ vulgi gratiæ & popularitatis, rectum aliquid in publicum facias, falleris; sæpius odium pro gratia redditur: Rem expertam ipse habeo, quam loquor. Si profana parvi sunt,

en cape in rei documentum altiora, quia sacra; Nemini magis, quam operatori salutis *Christo*, fraudi fuit populi plausus & Gratia, hodie ut Regi filio David, in urbis ingressu, panis & substratu vestium, in pompam triumphi, vias sternentis, mox intra dies aliquot, subita mutatione, crucifigendum potentis. Sic verè vulgus, *cujus boni, aut pravi affectus, nunquam modicis continentur.*

86. Afflictis palam condole, sed tamen sine injuria affligentis.

87. Honores non pete ipse, oblatos specie recusantis accipe, non multo exultantis animi signo, nec etiam tristi, ut ingratus, sed graviter; per amicos petiturus non ore tuo, pro fama modestiæ, tum ut videaris, *magis te posse officium gerere, quam nimis velle,* quod venustatem actioni imponit, & dantem magis promptum reddit. Vis adhuc altius, unicam artem disce; Non quomodo ambienda quæras, sed quo-

modo forte contentus, non ambias ultra pacatus, plura sic utique (immo omnia) lætus contemnere potes, & quasi ex alto animi despicere, non omnia vero destinata, ambiendo adipisci, coque de non habito tristis, & stans loco velut inferiore. Habet velut omnia, qui non ultra cupit, in animi mensura, non fortunæ, sat satis habendorum modus.

88. Apertis horreis, leva pretium frugum.

89. Nobiliores exules, tum à fortuna desertos excipe domo, & necessariis procura. *Alii dividunt propria, & ditiores fiunt, alii capiunt non sua, & semper in egestate sunt* (inquit sapiens.)

90. Pupillis honestarum familiarum, sumptus educationis provide.

91. Si à populo voce opprimaris modestiam objice cum gravitate & reprehensione generosa, quam ut frustra acerbius contendas, unus à multis facile contemnendus, nec alia tutius via, furorem populi evades.

92. Mi-

92. Miseris sis aditu facilis, & intentus querelis, licet subrustice, & tædiose conquerantur, nam loquax ut plurimum dolor est, da bona verba, gravia tamen potius, quam mollia, condole saltem, ni juvisse sufficis, nemo utique verbo pauper est, quod æque afflictis gratum, ac si juventur, aut secus novam injuriam sibi inferri putent, si transitoriè audiantur. Princeps igitur, aut quicumque sunt viri honesti, in omni vitæ suæ actione, teneant recte agendi præceptum. *Nihil sibi esse salubrius, tam ad morem populi parandum accommodatius, quam humanioribus responsis etiam infima sortis homines, ab se dimisisse; salva tamen gravitate, nec obvia facilitate vilescat.*

93. Inter *militares* de armis loquere, inter *doctos* de virtutè, doctrina, libro honestate, personis, rem & sermones accommodaturus; *Hilares*, liberalius suaviterque excipias: *Severos* aut *Morosos* contractius, & brevibus tractabis,

E 3

cum

cum facile multi sermonis nauseam habeant. *Ambitiosis* honorem deferres, reverentius agendo, perinde ac si cos multi facias: *Cum modestis & sinceris*, simplicitatem dicti quæres, nam facile dolum suspicantur, si verborum involucris, & ambagibus affectatis utaris: *Malignos, Astutos, Levesque*, quoad potes, vitabis, sed procul à nota vitantis, ne offensos habeas, universim vero, secretorum tuorum (loquendo) cautus eris: Insuper inter *Equales* dignitatem ex pari tueare, ne posthabearis, non tamen semper ad numerum & stoica gravitate, ne arrogantiae nomen parias: Inter *Inferiores*, faciliorem tui copiam præstabis, ut ameris, non minus tamen aut effusus, ne satietatem inducas, sed prior gravitati. Erga *Superiores* nonnihil submissis te geres, non tamen immemor tui, verum ultra *venustam generositatem*, nec ut abjectus, aut adulator, tum deformi obsequio laborans.

94. *Meticulosorum ingenia* ingesto terrore, nec tamen sine condimento gratiæ, ad officium commodè rediges: *Generosos*, secus, exacerbat terror, ut potius reddas obstinatiores, aut alienes verius, dum eos, sic parare cupivisti, verum eos gratia, comitate, liberaliore convictu (idque ad obsonii raritatem, non semper facili aut effuso, magisque adhuc gravitate agendi generosa, quæ reverentiam personarum ingerit) tibi obstrictos pares. Verbo dicam, injuriæ generosum irritant, mollem tum pusillanimum frangunt. Cum *mediis* aut *indifferentibus*, præsertim vero cum astutis; aut qui libenter insolescunt, adhibebis simul utrumque, *terrent nonnulli, ni paveant. Morosos* denique & *Intrusores*, lautiorē mensa, & aliquid pro tempore dando tibi mercaberis. Rara tamen ingenia, quæ non hoc ultimo telo expugnare fas sit. Prout igitur hunc aut illum, ad tuum beneplacitum habere vis, introspice naturam

prius hominum animi, æque varii sunt ac vultus, ut agas, prout ad metum, vel generositatem inclinat, vel participat simul de utroque, ut quemque suo affectu aggrediaris expugnandum, prout in aliquo hic aut ille, magis prædominatur, metusne, cupido gloriæ, amor privati commodi, publicum bonum, aut tenerior conscientia; Obiectando dextre ad persuadendum, periculâ, ignominiam, damna, jacturam publici, ingerendo scrupulos, & offensam DEI, & quævis in contrarium, vel si faciant, omnia eventura in parte meliore: Jam si omnino refractarii sint recta sequendo, saltem in molliora quoquo modo deflectes, & concedes partem, velut Senecæ & Burrino visam, *ne utramque NERO pervinceret, alterum concedere*, vel certe eveniet, (præsertim si cum generosis res est) ut negligant, si aliquid modo in speciem generositatis sibi concedatur, nec planè impugnari videant, alias nihil pervin-

cere,

cere, servile putantes; Sæpe repeto,
*Hominum animi, sicut generosi equi,
 molli freno facilius reguntur.*

95. *Qui amat accipere, negat nihil.*
 Non in privatis modo, sed puta in publicis, facile habentur omnia, præsertim apud eos quibus accipere dulce est, dum sunt *semper venales & alienæ ministri potentia*, immo mensarum, placitorumque affectæ. Non ex vano, inexpugnabilem urbem, expugnandam facile credidit, in quam a sellum onustum auro, intrandum, didicit. Et Jugurtha, Romanum statum inclinari advertit, debiteque illudit, *O venalem Romam & mature perituram inveniret*, cum reperit plerosque ex curulibus, qui accipere oblata, non promptè recusarent, immo promptissime acciperent, vendi sibi negotium amavit, cum venditores odisset, prodicionem, non proditores amaturus; viri ideo quicunque recti, etiam licite oblata, intra verecundiam, propiusque nolentes, acce-

ptare debent, aut prorsus non acceptare, virtutis præmium in virtute quaesituri; Hoc enim genus vitii, mentitæ suavitatis condimento, facile insinuat se hominum sensibus, & leviter modo tangentibus allinitur sine sensu. Facile qui accipit, facile dat sibi suaderi. *Pessimum veri affectus venenum, sua cuique utilitas.* Merito pagina sacra rectos in populo viros, iudices, ducesque dum laudat, aut secus depravatis dum succenset, his appetentiam munerum exprobrat, in illis contemptum oblato- rum, velut solam rectæ popularis virtutis normam commendat. *Dixit Samuel ad universum Israel (1 Regum Cap. XII.) Loquimini de me coram Domino, utrum de manu cuiusquam manus accipi, contemnā illud, restituamque vobis.* Et dixerunt: *Non tulisti de manu nostra quidquam.* Et Cap. VIII. *Non ambula-verunt filii Samuel in viis ejus, sed declinaverunt post avaritiam, acceperunt minnera, & perverterunt iudiciū.*

cium. Mirum dictu, quod pervertat veritatem, bonum publicum, & pervertat iudiciu, qui propere accipit munera. Talesque hodie videas: *In quorum manibus iniquitates sunt, dextera eorum repleta est muneribus* (Psalmo XXV.) potius igitur, *Non accipies munera, quæ etiam excæcant prudentes & subvertunt verba iustorum.* Exod. XXIII.

96. Nullius artem reprehende, quod vel maxime offendit.

97. Multa in absentem statuuntur, quæ in præsentia non fierent, cura (si tute potes) ut dicendis de rebus aut statuendis adsis, præsens, cum auctoritate tua & amicorum, ne per absentiam conscientix facti arguaris, eaque importuna meticulositate, maiorem ingeras audaciam (æmulis) validius contra insurgendi, qui nisi tua imbecillitate fortes.

98. Magnorum virorum dissidia, concilia, & mediatorem te interpone (etiamsi non vocatus) si auctoritate

vales, sed procul ab importunitate, & sine alterius partis offensa, fac talia pro publico bono, & amore proximi.

99. Dum punis, privatim puni, dum parcis, publicè parce.

100. Habebis aliquem bonæ existimationis virum, qui pro te agat, & loquatur in publico, quam ut ipse pro te. Major alienis dictis, in aliena causa fides, laudando vera, seu excusando liberius falso imposita; cum opinativa, & minor tibi dicenti, invidia; Quæ pro sua causa dicuntur, magis ex necessitate, propria & pro animi passione, quam ex verò dici communiter creduntur.

101. Quæ tibi adversa acciderint, supprime, aut tege lætis, prospera latius divulga.

102. Sermones vulgi, velut nesciens ignarusque feras, prohibiti enim plures erunt, quasi veri, si prohibeantur, & nocituri.

103. *Securitati consule prius, antequam*

quam vindicta, quosdam enim, haud tuto aggrediaris, ut cavere ab iis magis opportunum sit, quam ut aliquid acerbius in eos statuatur.

104. Justitiam ama, & verax sis, quo magis fidem rebus tuis pares.

105. Nonnulli dexteritati tum prudentiæ, virtutisque suæ in tantum fidunt, ut sponte sese conjiciant in occasiones periculosas, negotia intricata, difficilesque conatus, supra vires aggre-
diantur, quasi in arbitrio sit, ex illis eluctari, tamque deserere promptum, quam irritare incepta, dum velut supra humanos casus constitutis, tum non errandi potestatem, sub imperio habentibus. Quod secus fit, dum tene-
mur potius à negotiis, quam tenemus illa. Non admittere vero occasionem, primus gradus est non errandi, dein posterior non errore. Ne Deus quidem, dum probos vult nos fieri, peti-
voluit, quam *Ne inducamur in tenta-*
tionem, quasi non peccaturi, si tenta-

tio (id est mali occasio) absit. Non igitur quantum in nobis est, dubiis rebus nos volenter committamus, ne apprehendamus plus animo vel manu, quam cui sufficere possumus retinendo, vel contra obluſtantia conſtanter perſeverando, nec ſibi blandiatur mens, ut præſumptuoſa opinione noſtri, minus opinemur de virtute contrariæ partis, dum volumus, ut evitemus occaſiones errorum, immo ipſa mala. *Facilius aliqua non recipiuntur, quam exeunt, immo excluduntur venientia, quam expelluntur, dum fuerint admiſſa.* Qui admittit occaſionem, admittit errorem.

106. Iraſci, mala verba dare, ferire, nemini fidere, res quietas non ſinere, pro libitu agere, aut ſecus, in ſpeciem authoritatis deſidere, *Nomine magnifico ſegne otium velare*, in alios agendum opus conjicere, ſuperbire, tum inſoleſcerere, poteſtatem regendi nonnulli falſo putant, cum alias ſuavitas agendi (prævia prudentia & cautione)
rebus

rebus perficiendis totum possit. *Maxima flumina, minimo sono labuntur.* Non tamen obsit rebus, subirasce modice, intra gravitatem agendi, immo valde prosit, ut vivacius in executionem urgeantur, *iram prudentem, esse ceteram fortitudinis*, non ex vano dictum, in consilium vero recte incipiendorum, sola prudentia, cum deliberatione non affectata, jus semper habent. *Potestatem, cautis quam acrioribus consiliis tutius haberi.* Tacit.

107. Vitia hominum privatim publicèque, nihil magis intendit, quam cum male fecisse, joci vicem habet, non suspenso supercilio, sed excipitur cachino. Exinde licentiosi, dum non timeant DEUM, quod reliquum erat, excussa hominum reverentia & pudore, male facere sibi complacent, vel dum in rectiores incurrunt, qui rigidiore fronte, tum verbo factum excipiant, indignantur, moneri nolunt, paucorum rigorem & censuram injuriæ loco habent.

habent, dum plures jocosu intuitu, talia transeunt, velut approbantes. Moderni seculi, immo novæ Politicæ ea labe est. Rigidæ priscorum Germanorum virtutis, non immerito causam annexuit Tacitus (de mor. Ger.) *Nemo illic vitia ridet, nec corrumpere aut corrumpi, seculum vocatur.*

108. Non levis est prudentiæ *Moralis* tum *Politica*; scire in suis domi, & Civibus publicæ, quædam minora dissimulare; nec vetera, ne obtineas, ut pervincendo (quæ agnita vitari, nec coërceri possint) in pejora mala incurratur, ex jussorum & impunitatis contemptu, nisi aliquid fragilitati concedatur, velut profundissimè sparsim *Tacitus*, tum alii. Nescio, annon tutius sit, quædam adulta & prævalida vitia admittere, quam illud assequi, ut palam fiant, quibus prohibendo, pares jam non simus, dum vero prohibita semel impune transcenderis, neque metus ultra, neque pudor est; Quædam
tutius

tutius non prohibere, quam prohibita leviter præterire, & fontem non accusare, quam accusatum non punire, nam evulgatus pudor, non satietatem ut multirentur, sed incitamentum parit. *Correctio plus damni in Rempubli- cam quandoque offert quam indecorum vero attrectare, quod non obtineatur; si velis quod nondum vetitum est, timeas ne vetere.* Tolerabilia sunt modica vitia, quam prohibitio, cui nemo paret. Mithritades continuo usu veneni, naturæ suæ reddidit familiare toxicum, ut contra noxia induraretur, si aliquæ malæ consuetudines, tum abusus, consuetudine roborati, non tam obsint Republicæ, (nam sæpe alterius virtutis interventu, velut ad æquilibrium pensantur, & cum tempore conveniunt) quam præcepta correctio: prout violenta medicina, plus noceat ægrotis, & vim naturæ infert, quam ipse morbus, qui sensim utique conficit. Inter hyemem & æstatem, ver aut autumnus inest,

inest, inter diem & noctem diluculum, natura ipsa haud violenter, quasi per gradus, in mutationem se transferente; etiam virtuti horror imponatur, si severius se intrudat, non suaviter insinuet; cum tempore curandum, quod cum tempore invaluit. *Repentina novitates sunt tanquam advena & pergrini, quos admiratione plus, minus benevolentia prosequimur.* Exinde novorum Politicorum axioma vix improbaverim. *In seculis aliquando corruptioribus, homines industrios & satagentes, usui magis esse, quam pro rigore virtutis nimium zelosos.*

109. Ne decipiaris, mature cogitare deceptum iri, sæpe diffidentia mater securitatis est, aut secus, si in vanis nimium scrupulosus sis sæpe causa, inanis metus, nocet rei, nocet parandis amicis. Dubitaverim præterea, an modica calliditas, non sit in parte Politicæ prudentiæ, seu cautionis, pleno hoc obliquorum ingeniorum seculo, non ut circumvenias, sed ne circumveniaris,

veniaris, dum quemque pro suo ingenio scis metiri, aliqui enim ita sunt incaute sinceri, si præsertim in blandiloquos & astutos incurrant amicos, ut nihil sinistra incontentione agi opinentur.

110. Sis Politicus, non tamen urte Catholicum esse obliviscaris.

111. In privatis publicisque negotiis, cum paucis vel cum populo, non semper idem tenor, modusque actionis servandus. Dum rem habere probe cupis, verum secundum tempora, personas, immo cum iisdem personis, sed aliis occasionibus, rerumque circumstantiis modum agendi, variari necesse, aliquando severitas juvat, aliquando eadem obest, sed prodest clementia & suavitas, aliquando munifice, aliquando parcius aliquos habere oportet, & dandi facilitas obest, tacere & dissimulare, nonnunquam exprobrare palam aut tacito conducit, propere aut cunctari petentibus statim annuere, aliquando differre in tempus, negare, difficilem se præ-

116 *Andrea Maximil. Fredro*

præbere, & grave supercilium monstrare prodest, mollius aut austerius, cum authoritate matura, vel submissus, familiariterque pro confidentia agendo. Nec CHRISTUS in sua Oeconomia, semper eundemragendi modum servat, sed pro tempore variat; Pecatricem mulicrem ad pedes suos provolutam prompte admittit, peramanter aspicit, *bonum opus operantem* laudat, eandem postea, licet poenitentem, & in melius correctam, à sui amplexu arcet, severiusque habet. *Mulier, noli me tangere*, cum utrumque intra peræqualem bonitatem ageret, illud intra summam clementiam, hoc cum Majestate, non extra tamen gratiam; modo vario & causa, verum intra eundem amorem, dum simul arcet, simul solatur eandem, simulque honesto præficit officio. *Quid ploras? quid queris? Vade ad fratres meos, dic eis.* Joh. XX. Dixerim, qui se aliorum exemplis, suæque probatæ semel praxi totos alligant, nisi aliquid in præ-

præfens mutant agendo, addant, minuantve, graviter falluntur, potuit iisdem de causis, cum iisdem personis, severior modus prodesse, cum quibus alio tempore, alio loco & occasione, nisi suavius agendo remittas de rigore, rem turbes, nec quod voluisti assequare, uti eadem vestis, non cuilibet corpori & ætati, sic praxis & exempla, tum imitatio, rebus & personis non quadrate serviant, nisi pro tempore im-
mutentur.

112. Animi constantia & ingenuitas juvat in adversis, superat invidiam, arceat mala: Mollities secus, accersit periculum, cui vitam, animi fortitudo aut constantia non dabit, metus aut fuga rarius parabunt. Sic (aquod Tacit.) accusati de amicitia Sejani, alii per molliem excusando, eo majorem suspicionem sui cum movissent, succumbere-
rentque in causa *Marcus Terentius* ingenuè quod verum erat, solus fatendo, constanter superavit invidiam, & evasit ob-

fit objectorum poenam, prout ejus responsoriam, non sine gustu, & paranda doctrina legas apud Tacit. VI. Annal. Qui silentio tristi objecta recipit, non modestia est, sed tacita confessio, aut judicem tacite arguit sævitiae, quasi in majus defensione innocentiae irritetur: Qui autem negat, quod verè objectum, seipsum accusat, non quod noluerit, aut de malefacto doleat, sed quod latuisse tantum experiverit, præsidium malitiæ ab oculis habiturus, immo metum prodit, ex facti conscientia & atrocitate, quod fateri verentur, non extinguit materiam objectorum, sed irritat accusatorum æmulatorumque proterviam, tum ad inquirendum & comprobandum ingenia, ne frustra objecisse videantur, demum acuit audaciam, ut contra timentem gravius insurgant, inclinatum concitatus impulsuri in ruinam. Qui secus ingenue fatetur, propius poenitentem est; ut doleat de objecto, quod sponte agno-

agnoscit, & corrigendum videt; Dein, fortis utique animi signum est, intuitu virtutis (sit vero, sit specioso) tum, pro ingenuitate, aliquid dicto, facto, tentasse, non tamen malitiose, tum ex dolo, qui semper suspectior est, quam animi apertus candor. Non superba tamen debet esse facti confessio, nec velut exprobratio, quæ magis exacerbat, dum obstinationis animi signum est, accusatorem & objecta velut contemnens, sit potius, intra vultus verecundam amœnitatem, nec extra ingenuam modestiam, quæ innocentiae suæ (dum non turbetur) fidem facit, ac de clementia prudentiaque discernentis multum sibi persuadet; Aut si omnino deprecandum sit, non faciat tamen aliquis ut nimium abjectus, nec velle sordidatus aut squalidus, quod indignationem sæpe magis, quam miserationem movet; verum faciendum ex memoria ingenuitatis & honesti. Sic, ut per varia casuum abeam (apud Thuanum)

anum) Joannes Fridericus Saxoniae Dux, victus praelio à Carolo V. Cæsare, & captivus, cum pro nota rebellionis, decretum mortis jussu Cæsaris adferri sibi videret, lusui latrunculorum tunc forte intentus, velut in aliena causa minime turbatus, Ernestum Ducem Brunsvicensem secum colludentem, simulque forti compatiensem constanter monuit, ut eo non obstante, lusum continuaret, *suam innocentiam Cæsarisque clementiam, ea in parte sat pro se laboraturam*, subjungens; Qua infracti animi constantia, Cæsarem flexit, & periculum vitæ, licet non fortunæ, superavit. Sic apud Franciscum Guicciardinum (Histor. I.) Cum Rex Galliae Carolus VIII. (moto bello pro recuperanda Neapoli contra Arragonias) in Italiam cum exercitu se infunderet, ac forte per transeundum, à Florentinis, pro societate armorum & amicitia, in urbem receptus, contemptius eosdem haberet, conditiones aliquas

quas graviores extorsurus, illi vero potentia Regis consternati, circa consensum tergiversarentur, solus *Petrus Caponius*, vir altioris animi, agendi constantia, rem animosque Civium restituit, & Carolum plena generositatis voce, tum facto, terruit, verba sunt Guicciardini (Hist. I.) *Cum ejus collega coram Rege stetissent consternati, atque à Regio scribe, compositionis capita iniquissima, scripta recitarentur, Caponius rei indignitate vehementer permotus, libellos è manibus scribe abreptos, Rege spectante descripsit, & se abiturum proripiciens, voce concitata subjunxit: Quandoquidem tam iniqua postulatur, vestras vos inflabitis turbas, nos campanas pulsabimus nostras, haud obscure innuens, eas controversias mota plebe armis esse decernendas: Constat, tanta fiducia verborum Caponii, terrorem Gallis injectum, secum reputantibus, tantam in eo homine constantiam, non sine fiducia alicujus parata potentie, & subsidiorum*

F


esse;

*esse; quamobrem, eo revocato, Rex in
aquiore, nec absone Florentinorum liber-
tati deflexit. Sed cur vado per exter-
na, cum adsint domi exempla propria,
idque in meamet causa. Cum per ini-
quitatem delatorum, recta plerumque
civium vota in scquiore sensum tra-
hentium, liberius dictorum (ut fieri
assolet circa libertatem) coram Rege
accusaret, ipseque ad interiorem Ca-
meram me vocato, pro Majestate ex-
probraret, id, quod certe verum erat,
Angustia mihi undique, hinc menda-
cium servile peccatum (si vera negarem)
& offensa Dei, illinc apertior offensa
Principis, si faterer, recollecta repentè
mente in partem utique post errorem
peccare malui, nec tamen apud pium
Principem peccavi, fronte ad amœni-
tatem (pro fiducia constantiae, non ex-
tra tamen modestiam) composita, sub-
jungens: *Si qua à me dicta, non profe-
ctum à malitia, aut inquieti ingenio,
sed factum pro fiducia legis, tum equi-
tatis,**

tatis, *cujus assertorem pro Catholica pietate, ipsum Principem esse scirem; Nec mihi alias jurato Senatori, nisi cum lege loquendum conveniret; Cum igitur responsum acceptandum, aut aperta lex, tum æquitas impugnanda esset, quod nequaquam bonus Rex apud animum pervincere potuit (nam etiam juxta populi libertatem convenientissimum erat) objectio, intra ingenuitatem responsi conquievit; unde, uti per cæteragestorum, alios, sic eo casu, me quoque publice ac privatim æquioris animi, bonus Rex habuit præconem. Cessare debui, verum non extra materiam, unicum adhuc constantis tum infracti animi exemplum apponere, Ferdinandi Arragoni Neapolitani Regis. Cum enim (supra memorato) Carolo VIII. Gallix Rege, victricibus armis Neapolitanam oram pervadente, ipsaque Neapolis, urbe, & Prætorianis cohortibus in victoris nomen desciscentibus, Ferdinandus regnum deferere cogere-*

tur, nihil spei relictum, quam ut cum paucis intimiorum, relicta Neapoli, in *Ænariæ Insulæ* arcem, *Iscleam* nomine, secederet, verum eadem infensa fortuna secuta in Insulam Ferdinandum, arcis enim *Isclea* Præfectus, eodem quo reliqui Neapolitanorum morbo perfidiæ agitatus, in victorem Gallum propensior, descendenti forte ex trireme, portas arcis occlusit: Fertur, insperato perfidiæ spectaculo, consternatum prius dein re collecta mente & spiritu (à desperatis & animi constantia consilio captato) paucis comitantibus, proximius portam arcis animose successisse Ferdinandum, ut partim mandatis, partim exprobratione collatorum beneficiorum, & exinde turpis perfidiæ, partim vultus Majestatis Præfectum flectere posset. Non plus tamen apud perfidum ea valere, quam ut data nisi conditione, arce recepturum se Ferdinandum promitteret, si nemine comitante solus portam ingrederetur. Accepit ille promptè

promptè conditionem, non ut dissimulans, & exinde tacitæ offensæ suspectior, sed ut Majestatis conscius, moxque adaperata porta est. Tum vero in ipso portæ ingressu, non se Regem oblitus, eâ confidentia, eoque vultu ac vigore animi, districto gladio in Præfectum & custodem portæ impetum fecit, ut satellites, qui armati in statione aderant, comminantis & imperantis simul Regis aspectu perterriti, exemplo portam aperuerint, reliquum comitatum recepturi. Quo casu manifeste apparuit, animi constantiæ, vel (ut Jovius ait lib. II. Histor.) Regum oculis, in omni fortuna, quandam supra humanam inesse vim, proditoribus autem degeneres esse animos, præsertim cum in ipsa perfidia deprehenduntur.



Pars Tertia.

POLITICO-MORALIUM.

I.

CONscios secretorum (etiam delinquentes) non habebis acerbius, ne irati prodant secreta, & res misceant.

2. Licet utrum sit, nunquam conqueraris, quod male de te loquantur homines, aut enim cum senserint te offendi, pejus loquentur in acerbiores vindictam, aut denudaberis coram audientibus, de adversariis, cum non levi suspicione famæ; potius bona indulgentia fortunæ, dic, tibi satis amicorum, & dona de te sentire omnes, imo in præsentia tibi detrahentium, sinceritatem & candorem lauda, velut ignarus translationis, ut consequaris, quod illi sinceri à te vocati, esse justè velint, ne bonam de se opinionem amittant.

3. Cuique (sed præsertim in officio degenti) minima sui inobedientia, severius

verius observanda, ut minus serio imperata, sint in executione, quo majoribus jussis non ignaviter attendatur.

4. Si quid in aliqua gravi materia difficile propositum, quod non statim intelligas, scripto consignari jube, aut prudentem ministrum delige, qui rem inquirat tibi sufficienter relaturus.

5. Nimiam magnorum comitatem, suspectam habe, nunquam te ille credet totum, non enim mutuo bono facient, verum suo, quatenus opera tua velut instrumento utantur, seposituri in partem, dum cogitatum perfecerint.

6. Nonnunquam prudenter de gravitate & de jure demittere, necessum putabis, quatenus assequaris, quod voluisti, alloquendo prior, salutando, visitando, adeundo minores, familiaris in parte colloquendo, convictum eorum non aspernando, nonnulla dissimulando. Sed hæc modice adhibebis, velut obsonia rarioris favoris, non ut lautitia perfusionis.

7. Privatum otium, & exercitia tui cubiculi, sunt gravia.

8. Spectacula generose edita, ut sunt ferarum nobilium certamina, hastiludia, in opinionem serviunt authoris, velut in *Laurentio Medico* observatum reliquit *Paulus Jovius*, qui in populo, tum apud exteros, æstimationem sibi paravit, magnanimitate expensarum, in honestos circum se clientes, in elemosynas, obæeratorum prompta subsidia, in equestres ludos edendos, in apparatus conviviorum, in colendos literarum Professores, in conquirenda quæ rara alicubi videantur, quibus ille (verba sunt Jovii) ac præsertim magnificentia auspiciis, longius famam suam extendit, quam quisquam alius equalis, vel militarium armorum fulgorem proficeret. Et vitam *Magni Consalvi*, apud eundem legas, quomodo in aula primum creverit, dein apud milites, expensarum apparatu valuerit? omnium animos in se rapiendo, splendore pretiosæ

tiosæ togæ, armorum & convictus.

9. Aliquid in tuis aut te ipso mutaturus, non uno ictu præcide, sed lenta opera, & quasi aliud agendo. Novitas enim & *insperata sedulitas* parit suspicionem.

10. Patrii & antiqui moris, ac eorum quæ populo placent, doce te esse amatorem, & imitorem.

11. Non properè damna, sed lente, & sæpius dolens, propius ut libenter damnet, qui cito, immo pœnam infliges malis, non ex crudelitate & sævitia puniendi, sed ex æquitate discreta, corrigendo non tollendo. Insigne senatus consultum in gratiam damnatorum factum Romæ. *Ne decreta Patrum ante diem decimum in ararium deferrentur, quo senatui libertas ad pœnitendum esset, & rigor interjectu temporis mitigaretur, idque vita spatium damnatis, ut prorogaretur* (Tacitus 3. Annal.) Hoc olim sanctè in Ethnica Roma, Catholica nunc pietas, quid ni

plus requirat? Ante dies quindecim, in delinquentes ne decernatur, non inutilis mora sit, decretaque ut procrastinentur: Justa primo affectu immo ab ratione, sæpe nobis videntur, quæ posterior dies arguat, si iterum decimoque inquiras hæc, illavè, falsa, imposita, opinativa, repetita, in trutinam vocando, præstat nocentium pœnam differre, quam (absit præcipitanter) innocentem per errorem damnare. In quem errorem, ipse vix non impegi decernendo, scribo.

12. Nunquam servilis sententiæ, author sis & fautor.

13. Qui urgere negligit, habere non vult, non incipiendo, sed perseverando res habentur. Eo prope collimat *Tacitus Multa ansis, aliqua parte fortunam affore.*

14. Sera experientia compertum habeo, eos qui prudentia dictorum & consilio valent, raro utiles factis & exsequendo, dum satis habent ad rem
bene

benè gerendam apte consuluisse, aut à multarum rerum consideratione respectibus laborant, neque periculum sumunt agendi, aut dum aliquid obstat facto, agere dedignantur, quasi impugnare veritatem irati, cujusdam (si dicere licet) *omnipotentia modo*, totum habere volentes, non urgendo, non instando. Aut denique fit occulto naturæ arcano, cum aliis rectè consulendi, aliis rectè agendi, urgendique modum dedit, ne fors aliquis supra humana attollatur, sed memor sit, humana necessario aliquid ex imperfecto habere. Nos quidem censeo, consulendo utiles, verum ad exsequendum, cordatiores alios (qui non verbis, dictisque, sed magis loquuntur factis & rebus) adhibere oportet; seu (ut vulgus ait) sub cholericos, activos, non respectivos, quibus si aliquid obstat, non terreri, sed impedita amovere, iterumque conari studeant, non cedere ipsi rebus, sed concedi sibi debere rati.

Et Apostolus eandem urgendi necessitatem suggerit, nec tentare modo leviter (quod ex necessitate recti, habendum intendimus) sed instando animose (non tamen extra prudentiam) perseverare docet *Iusta opportunè argue, increpa, obsecra, in omni patientia &* DOCTRINA. Audacia & Activitas, tum Constantia, sunt rectæ executioni fere parallelæ, multi virtutem incipiendi, rari admodum finiendi aut perficiendi habent.

15. Nemo fidenter rem gerere potest, qui non se majorem credit eo, aut saltem parem, cum quo res intercedit, qui se inferiorem habet, timide aggreditur, ideoque parum ad rem proficit, in tractatu privato, seu in publico, circa materias præsertim bellicas, togatas, ac vel maxime in materia legationum, & commissionum cum exteris.

16. Publicam semper utilitatem & religionem obtende, ne publico usui,
utilita-

utilitatem privatam, antèponere videre.

17. Etiam non vestitos, comiter alloquaris, & responde, procul tamen à levitate, & projecta facilitate.

18. Non velis videri, jocularis & dicax.

19. Imbecilliores ad tuam opem (sed ex justo) confugientes, non desertos patiaris, fidem enim operam præstant, vide tamen, ne eo sub prætextu, flagitio pollutis, liberum apud te asylum permittas, & ex eo falsam protegendi potentiam præsumas, quæ nunc solum vera & gloriosa est, dum virtuti, non vitio patrocinatur.

20. Pro Divinis maxime, & bono zelo certabis.

21. Mutaturus sententiam, dic, utilitati publicæ te studere, non vulgi opinioni.

22. Non sapias ex ore tuo tantum, sed boni consilii (& dictorum) quod etiam ab alio provenit, sis amicus &

fautor, quod est generosi animi, & virtuosæ mentis signum.

23. Qui super alienis prolatis, quæstiunculis ludunt, verborum deprehensores curiosi, nec acquiescunt recte dictis, semper aliquid requirendo, aut rem non intelligunt, aut sunt leviculi, aut maligni, aut contentiosi & garruli, aut genio præsumptuosi, aut supra vulgi ingenium judicio valent, aut demum sunt sugillatores stupidi, si igitur quietus animo esse cupis, fuge talium colloquia & convictum, dum enim non finiunt, sed irritant materias, exacerbant personas.

24. In adversis & desperatis, subsidium ab audacia pete.

25. Consanguinitas magnorum cedit in æstimationem, ideo per te, ad tuos, eam quæres.

26. Non timeris secreta populi (item amicorum) dandum aliquid libertati sentiendi & agendi.

27. Facta arguantur, dicta impune sunt,

sunt, nevé convivalium fabularum di-
cteria in crimen vocentur.

28. Parvi errores non dissimulandi,
nam magnorum causa sunt, à veniali-
bus facile itur ad mortalia.

29. Uno tempore multa ne suscipias
agenda, non enim perficies, & argue-
ris incepti.

30. Non cogita, quomodo effugias
mala, sed quomodo stes fortis, & im-
motus contra, crescunt si effugias, mi-
nuentur, dum subsistes, possibilis vero
ea ferre, tam contemnere, quam vi-
tare.

31. Defectus aut vitia corporis, tum
fortunæ, immo jacturas omnes, pru-
denter tege, nam læta pariunt reputa-
tionem, tristitia contemptum.

32. Monstra aliquo per virtutem fa-
cto, tuam potentiam, immo & pru-
dentiam, ut innotescas, vel si poten-
tiam monstrare non potes, saltem im-
potentiam defectusque, occultare stu-
debis, occasiones quæ detegant vita-
turus,

136 *Andrea Maximil. Fredro*
turus, aut bonam opinionem retineas,
veteri monito. *Quod non possumus,*
nolle videamur.

33. Probatoria eorum sunt ingenia;
circa res privatim publiceque gerendas,
qui cum omnia præstare non possint,
media bona exsequuntur. Illi vero (li-
cet alias optimi Cives) minime pro-
bantur, quibus si non successerint pri-
ma, media non arripiendo, per im-
moderationem animi dedignantur, re-
bus, sibi que ipsis irati. Facta potius,
non quod optimum velis, sed quod
melius in defectu mediorum possis; ac-
commodando te ad tempus, mores,
occasiones, prout se offerunt, nam o-
ptimas occasionem expectando, non
assequeris, possibiles vero omittes; ni-
hil præstaturus, pro otioso habendus.
Musicorum artem imitari præstat, cum
sublimes notas numero se, cantu asse-
qui non possunt, octava aut quinta
(utique) voce vel tertia imitantur to-
num, modo ne à recto canentium cho-
ro,

ro, & modulo deflectant, neve contentum turbent. Judiciosi ergo viri, quæque oblata casu, flectere ad consilium. Verum in consiliis capiendis, illud plerumque nos decipit, quia non quid possit, sed quid fieri debeat, aut necesse habemus, facile eventurum credimus. Et respicimus consulendo, quod contra est, nam potius quid possit fieri, non quid debeat? prius cogitandum.

34. Aliena invidia diffamare ipsi student, qui detrahentium dicta recensent, apage cum talibus præcautori-
bus amicis.

35. Quod tibi servit in æstimationem, potius per te fiat, quam ut alteri faciendum permittas in Republica, facere pacem, nationes componere, magnas legationes obire, gravia responsa dare, & alia.

36. Imperaturus aliquid novum aut difficile factu, ab iis exequendum incipe, quibus majorem tui observantiam inesse credis, atque metum, ne si ab
auda-

audaculis primo & contumacioribus exequendum velis, atque illi primis imperatis per temeritatem resistent, etiam modestioribus, pertinaciam reluctandi ingerant. Jam secus quod à modestioribus inceptum, ad se perveniente ordine (ut jam non novum) exsequentur, etiam qui fecerunt, in executionem instantibus, ne posteriores obsequio videantur.

37. *Nulli te facias nimis sodalem. Gauderis minus, sed minus dolebis.* Inmoturbam hominum (quoad salva gratia potes) vitabis, quia præsens aut necesse imiteris, alios, aut oderis, utrumque autem devitandum est, ne vel similis malis fias, quia multi sunt, neve inimicus multis, quia tui dissimiles sunt. Verum hoc supra humana ascendentis mentis, & est animi DEO se præparantis.

38. Cum omnia possumus, sola credamus licere nobis laudanda.

39. Diu secretus delibera, ne pudori

dori sit, frustra tentasse, cito vero de-
liberatum fac, ne præveniaris.

40. Licet aliqui recti sint Cives, &
pro Republica zelosi, plerumque pro
impatiente rigore & immoderatione a-
nimi, curando aut exprobando, plus
nocent Reipublicæ, quam ut profici-
ant. Potius (opinionem saltem) vide-
antur sibi boni Cives quam ut vitia ex-
probrando, conscios errorum reddas,
ut scienter peccent, cum assuefacti re-
trahi non possint, vel dum periculo-
rum remedium, ipsa pericula rentur,
& periculosius putant in incepto, quam
in peracto deprehendi. Recte quidam
in Catone, optimo alias Cive, mode-
rationem desideravit; & Cicero de eo-
dem, *Cato animo optimo utens, ac sum-
ma fide, nocet tamen interdum Reipubli-
ca, dicit enim, tanquam in Platonis
Politia, non tanquam in Romuli fece
sententiam.* Si igitur in ea Republica
vivatur, quæ depravata sit, inutiliter
ad quæque attendere scrupulosus velis,
nihil

140 *Andrea Maximil. Fredro*
nihil effecturus, quam ut inutili angore
conficiaris, nullo fructu in publicum;
ab aliis, si potest, deflectendum; alia
ferenda, alia non videnda, ac potius
curabis, ut quoquo modo temperes
mala & errores, quam ut toto corpore,
te illis opponas, nunquam suffecturus.
Noli igitur Catonizare, verum sapius
remittes de rigore, immò & de potesta-
tis Majestate dissimulationique studebis,
quod non est infamare auctoritatem re-
gendi, sed & prudentem, simulque
bonum, parentem & filios, non He-
rum & subditos, regendo cogitare.

41. *Nascentis* seditionis, tum auda-
ciæ, Patientia & Modestia, magis est
irritamentum, quam remedium, secus
dum adoleverit, cauta & mollia, reme-
dii loco magis succedunt.

42. Provide mature, ne populus re-
rum necessariarum, ac vel maxime an-
nonæ penuria gravetur.

43. Periculosos conatus, quos non
potes avertere agendo, potentia, im-
perio,

perio, manu, vel solvere ratione, eludes commodissime tempore, differendo, de die in diem trahendo, moras neſtendo, impedimenta ſtudioſe obtrudendo, ut interim impetus agendi, quoquomodo ſiſtatur, viſ hebetetur, ardor deſinat, *qui niſi initio intenditur, alias minas potens. Non ſi igitur ager mora, ſpei impatiens, periculi quam morae patientior: Ingratum habens quod tutum, ſed ex temeritate ſpem capiens.* Velut argute quibusdam ſuccenſuit Tacitus.

44. Sis taciturnus, facias potius, quam loquaris.

45. Sta ſemper verbo, ne fidem factorum dictorumque, in poſterum amittas.

46. In componendis privatim publiceque rebus, dum media non valent, extrema proficiunt, ſed tamen non extra metas virtutis.

47. Initia officii ſeu Magiſtratus, à magnis rebus tractandis incipe, (quo
magnam

142 *Andrea Maximil. Fredro*
magnam exspectationem factorum facias) sed quæ in te sint perficiendo, ne arguaris.

48. *Viles plerumque, qui nimium*
(nec cum gravitate) *civiles; Et viles,*
qui nimium faciles.

49. Monstra, te à nullo dependere.

50. Ludicris rebus & leviusculis, ne occuperis, ne amittas authoritatem.

51. Interdum secedas & secretus sis, hoc enim parit exspectationem, quid pariat tuum secretum.

52. Cum nullo velis te (ut ajunt) indomesticare, *nimia familiaritas parit contemptum*, potius fac omnia, velut primum inchoaturus, ex eo gravitatem retinebis.

53. Non sis præcipitans aut valde lentus agendo, illud levitatis, hoc est ignaviæ.

54. Quod facis, fac semper exquisitissime, *Magis male tentata nocent, quam nihil gesta.*

55. Non opineris, sed scias.

56. Ma-

56. Magna incepta incipe à divino sacrificio , benedictionum Dei , & in vulgus apparatus majorem inceptorum habiturus.

57. Non multa fac , sed magna & notabilia.

58. Tunc veram tibi inesse potentiam credes , quæ à te ipso fulta erit , non ab alio.

59. Potentia tuetur auctoritatem , ideo quærenda in munita domo & milite.

60. Potentia rectius beneficio ostentatur , quam maleficio , beneficia Regis manus , flagitium coloni unius præstare potest.

61. Virorum literatorum & æstimatorum , tam domi quam ab externo , per literas (aut quovis alio modo) notitiam quære , interdum modicis munusculis , per occasionem eos devincies , quatenus nomen tuum celebrent.

62. Non solum ad mores tuos advertas , sed etiam tuorum , ut honesti sint , gravitatem redolcant , non fastum ,
immo

144 *Andrea Maximil. Fredro*
immo per omnia modestiam.

63. Male de te loquentes (immo pessime tibi volentes) vinces humanitate & affabilitate, velut nescius translationis, potius quam ut te omnino avertas.

64. Non in Civitate, sed prope Civitatem manebis, ut omnibus, conveniendi tui necessitas sit, partim ut commodius honesto utaris successu, (sine cenfore) dum velis.

65. Sine ostentatione monstra, quæ in laudem tibi serviunt, apte observatum reliquit Historicus in illo Romanorum, *Mutianus quæ dixerat feceratque, arte quadam ostentator.* Quæ venustatem rebus non demunt, sed potius parant, si ante accomodentur, familiariter fidenterque (sine ostentatione affectata) agentibus, secus faciunt personæ theatrales & mutuatae, quæ cum rectum aliquid in præsens egerint, exuunt deinde scenam, cito ad naturam redituræ. Ostentatio igitur modica

dica pro tempore, si forte vitium sit in *Ethicis*, non certe in *Politicis*, nam famæ parandæ & authoritati conducit, si cum venustate fiat; Postquam aliquis familiariter (velut per incuriam) ostentaverit, quod in sui laudem servit, deinde in jocos, & nonnullos erga seipsum censuras, arte declinet, nam vere, modestiæ titulum affectando nimium per omnia, laudataque neglectim intermittendo, majore damno occultamus, quod in æstimationem nostri servit, cum non modica famæ parandæ jactura. Nec semper succedat (apud eos præsertim, quibus per exteriora viros metiri & æstimare mos est, velut Samsonis olim, in capitis capillo vires, his effusio in barba, authoritatem magnorum requirentibus) quod Julio Agricolæ, (apud Tacit.) *ne notabilis celebritate & frequentia occurrentium esset vitato amicorum officio, notu in urbem venit, cultu modicus, sermone facili uno aut altero clientum co-*

G

mitatus,

146 *Andrea Maximil. Fredro*
mitatus, adeo, ut plerumque quibus ma-
gnos viros per ambitionem aestimare mos
est, viso aspectoque illo, quærerent famam
pauci interpretarentur. Et Otho paran-
dæ militari auræ, ante signa pedester,
incomptus, fameque dissimilis. Verum
convenientissime hic ponatur, quod
Gramondus (Histor. Gall. lib. 1.) ait.
Principi Sueffionio à plerisque pro navo
data, sui aestimatio, at levis hic navus
viro principi, qui si dotibus animi valet,
cur diffiteatur natura donum? Principi-
bus, conscientia virtutis propria, nun-
quam vitio vertitur, quippe raro in res
magnas via est, per sui despectum; Mul-
tum interest Principem inter & priva-
rum, ille ad famam omnia dirigit, mo-
dicis, quod vitium huic, sepe ille virtus,
quod homini privato superbia, Principi
magnanimitas est.

66. Legationis splendore, paratur
reputatio apud exteros, magis tamen
legatio ponderatur à prudentia viri.

67. Impertinentes tuas actiones
ampu-

amputabis, ut feriis magis attendatur.

68. Novarum machinarum bellicarum, & aliarum structurarum adinventio, parit æstimationem.

69. Non congregiaris cum eo sapius, quem majorem te credis, ne auctoritas tua ex comparatione vilescat.

70. Academiarum foundationes, aut quod publico servit usui, parandæ servit æstimationi.

71. Ecclesiæ procures, tibi devinctos. habe, nulla enim re potentius, capiuntur aut habentur homines, quàm religione, provocabis vero amicitiam, jura & ordinem tuendo, cum iis conversando, Eleemosynam largiendo, incepturus vero magnum aliquid in Republica, cura primo, Episcopum aliquem (è potentioribus) partium habeas fautorem.

72. Eos nonnunquam negligentius curari oportet, qui tua cura subsistunt, seu sint filii, seu clientes, domestici, seu milites, dum enim ad tuam curam

148 *Andrea Maximil. Fredro*
respiciant, negligentes sibi redduntur
& amittunt industriam. Nécessarium
igitur majori ex parte suæ curæ ut re-
linquantur, discantque sibi in parte
providere, & acuant industriam, alienæ
curæ non in tantum se committentes,
quin plus à sua opera expectent.

73. Nulla munera aut officia, ignaro
te distribuantur, ne alteri, sed tibi be-
neficium debeatur.

74. Aliquis Vir bonus nobis dili-
gendus, pro exemplari virtutis, ante
oculos habendus, imitando.

75. Principi viro, honestius puta of-
fendisse, quam odisse, hoc mollis ac
in se ipsum sævientis animi, illud uti-
que fortioris altiorisque mentis indi-
cium, malle sibi utique ex alio, quam
de se injuriam vindicare, cave tamen
vindiectam.

76. Aut rem non tentare oportet,
aut si tentas, omnibus viribus quod
instituiisti, coneris perficere, nam bis
ad eundem lapidem offendi periculo-
sum,

sum, & contemptui obnoxium reddit, dum argueris impotentia, & inconsiderate incepti, nisi alias in cursu operis advertas, te non rectum opus cepisse, tunc vero desistere, utile & gloriosum tibi putabis.

77. Excelsi animi est, nunquam in acerbitates verborum deflectere, factis se vindicabit vir fortis [pro virtute] non verbis.

78. Ad retinendam authoritatem valet, si habeas penes te viros æstimatorum, doctrina & rerum gerendarum dexteritate valentes. *Et qui in vulgus grati.*

79. Nihil impossibile pete aut impera, neque impossibilis, (exequendo) legis autor sis, cum impossibilitas factum excludat, posse non satisfieri legi, docet, ut primum lex, dein author legis contemnatur. Falluntur ideo, qui parvis delictis, maximas pœnas statuunt, aut prohibent fieri, quod difficillime vitari, aut jubent, quod im-

possibile fieri potest, nisi in exsequenda lege, in tantum sint (cum rigore) scrupulosi puniendo, atque in ferenda lege, fuere urgendo: Nam si unius pœnam intermiseris, reliqui intermitti sperabunt, aut (pro multitudine delinquentium & consensu) immunitatem obtinebunt. Possibilia ideo & tolerabilia petenda, vetanda, jubenda omni in tractatu, œconomico, bellico, togato, faciliior consensus in obsequium, penes possibilitatem.

80. Nemo perfectam habere potest Authoritatem in Republica; nisi qui togata simul & bellica consilia probe tractat, in curia & in castris, suarum partium aliquos habiturus, ab altero suadendo, ab altero urgendo, modice territando potens, quarum duarum rerum maximus in Republica respectus, etiamsi aliquis non terreat, verum quia pro potentia potest, vim necessitatis suadendo audientia adfert.

81. *Ingenia universalia, raræ gentes,*
rara

rara pariunt secula; rari ideo sunt, quos suspiciat orbis, aut si sunt, pro magnis habet, nam multum in gentibus possunt; uti habuit Alcibiadem & alios Græcia; Scipionem, Pompejum, Julium Cæsarem Roma; Jam ætate posteriori Hispania, Magnum Consalvum; Polonia *Joannem Tarnouskium & Joannem Zamoyskium*, itidem magnos, vel certe si toga belloque facta penderes, vere Consalvo majores (sed prout nostra septentrionalia, ab oculis altioris Europæ, etiam à scientia tum admiratione remota, præsertim cum nostros scriptores, pro negligentia aut pro modestia, talia orbi propagare ad posteritatis admirationem piget) dicendo facundos, simulque agendo promptos & potentes, privatim bonos facultatum œconomos, Toga & Sago per omnia rerum momenta (*incipiendo & finiendo*) expeditos, nec levi ex respectu de sententia mobiles, publica privatis anteponentes; *suorum æque ac*

*aliorum recte consultorum, non superbos
sectatores, amicitias parare scientes, do-
mi & foris in omni apparatu & convi-
ctu magnificos sententia in toga gra-
ves, simul præterita, instantia, futura,
consilio pensantes, fortes in bello Du-
ces, acquirendo & retinendo, aut cun-
ctando vincere, aut dum ex re oport-
uit, committere prælia promptos, per
statarias pugnas, velitationes, campo
& expugnandis ex arte urbibus expe-
ditos, ad commoda ex hostium erro-
ribus capienda vigilantes, militaris di-
sciplinæ severos exactores, externorum
societates parare gnaros, gravitatem in
omni actione servare scientes, & simul
(ut ait ille) *comitate & alloquiis officia
provocantes.* Patriæ morum & institu-
torum tenaces, quod vero summum &
maximum, actione non insolentes, sed
cives pacatos, non aspernantes æqua-
litis, justos, pios, zelosos Divino-
rum cultores, simul & propugnatores,
denum [Velleji dicam verbis] viros in
tantum*

tantum laudandos, in quantum virtus intelligi potest. Qui in vita sua nisi laudandum aut fecerunt, aut dixerunt, aut senserunt. Quisquis alias te magnum venditas, si tibi unicum horum deest, extra universale ingenium, & extra magnorum famam positus, aliqua in parte virtutis politicæ poteris esse perfectus, sed non universim agendo magnus unius partis in virtute, non omnium.

82. Nonnulla sunt ingenia, quæ nisi in magnis negotiis se explicare possunt, & potenter agunt, in parvis (dum contemnunt, vel angustos limites agendi habent) velut victa, & nihil valentia impingunt, implicantur, ut sæpe cum magna fecerint alias, in parvis arguantur, cum æmulantur naturam magnorum navigiorum, quæ super altum mare triumphant, & fluctus contemnunt, in portu aut in lacunis, velut nihil profutura, hærent, ut à parvis Myoparonibus præternavigantibus illudantur,

illudendi ipsi, nisi essent in parvo, alias agere impotentes. Immo communiter fit, ut parva negotia, magnis ingeniis plus difficultatis adferant, confundendo verius sua parvitate, quam ut supra vires sint, dum sunt similia tensis ferarum retibus, quæ Tigrides Leonesque capiunt, non quia ligant, sed quia implicant, & molliter involvunt, impediendo verius, quam vinciendo. Ad dam adhuc; Judiciosos viros, breviloquio plerumque & modestia gaudere, ut audaculis sciolisque (dum in consulendo, multa loquacitate obstrepunt affectare, & suffurata apud vulgus Principemque autoritate substruuntur) cedere quodammodo, velut inferiores aut inscii videantur, nam sunt *decernendo* (seu asserendo, vel censendo) quam *disquirendo aptiores*, & pondus rei pensant, non sonum, ratiocinationum superfluarum sunt nauseatores, nec in mediis dubiorum hærare amant, cum recti judicii indulgentia, sine flexuosis

suosis sinuosisque indaginibus, scopum ipsum rerum, prompte probeque videat, vel ut clarius dicam, magis *positivo* & practico, quam *scholastico* aut speculativo sensu abundantes.

83. Nec illa ingenia omittenda, quæ tum nisi potenter, zelote, aut secus levi passu rem aggrediuntur & agunt, prout irritantur vel non, aut privatus respectus illis adest, alia tentant modo leviter, dein negligunt, dum evenit, velut ursis, quibus nisi exagitatis, maxima vis adest. Exinde sic agere, non est ex virtute, sed magis pro impetu, pro aspectu & pro animi passione, prout in nobis hæc aut illa irritatur, & invalescit. Talia ingenia commodissime maligna vocaveris, aut privatipeta, aut passionata, aut communiore titulo, *Affectata*.

84. Misce ut partim quæras amicitiam, partim tua quærat, ut acquirere eam, non emendicare, aut profusa submissione vel cura, emercari vi-

deare; Ingrediaris potius, non irruas in amicitiam, affectatè.

85. Si tibi amicus aut cliens in uno non satisfecit, aut ad palatum non accessit, potius similes occasiones vita, non vero statim per omnia desere aut abjice, in rem enim aliam, poterit esse utilis, nam perfectæ virtutis hominem, quo in orbe quæres aut invenias? ad rem meam Divus scriptor. *Non indignabundus feras aliorum defectus, quia & tu multa habes, quæ ab aliis oportet tolerari, si non potes talem te facere, qualem vis, quomodo poteris alium habere ad tuum beneplacitum? libenter habemus alios perfectos, & tamen proprios non emendamus defectus, volumus, quod alii stricte corrigantur, ipsi tamen corrigi nolumus, displicet larga aliorum licentia nobis tamen nolumus negari, quod petimus, alios restringi per statuta volumus, & ipsi nullatenus patimur cohiberi: Omnia potius omnibus parces, tibi nihil.*

86. Neminem lauda aut vitupera absentem, pejora enim illi de te narra-
bunt, immo non fac in præsentia, lau-
datum superbum reddes, vituperatum
aut reprehensum, per rigorem amittes
amicum, cum te Censorem magis a-
gnoscat, quam familiarem.

87. Sed tamen vituperatum defende
magis, quam ut assentiari, de se quis-
que expectaturus, quod facis de aliis
in præsentia.

88. Alloquendo, quærendo, con-
siliū petendo lentus sis, nec quasi se-
dulus, ne omnia tribuisse amico vi-
deare, & contemneris, quasi nihil per
te valiturus, potius quandoque in tem-
pus sepone, non tamen diu negligere in-
pretium amicitiae.

89. Reprehendendum amicum pri-
vatim admone honeste, sæpius vero,
quasi nescius dissimula, pro amicitiae
libertate.

90. Partim locum superiorem da,
partim tibi cape, parem te teneas,

non inferiorem , aut supra.

91. Jocos vita , qui levitatem pariunt , sed tamen affabilitate fovetur amicitia. Falluntur , qui sub nomine affabilitatis , licentiosis dicteriis , *equivocationibus morosis* , tum verborum affectatis argutiis , facetorum , jucundorumque famam parare sibi cupiunt , dum potius scurrarum , cavillatorumque titulum merentur , **DEUMQUE** offendunt , utendum erit jocis , sed qui non perpetui sint , verum per incuriam velut attracti , condimenta sermonis & obsonia , non perpetuus ad nauseam pastus , ne vice solatii , fastidium pariant , præsertim dum in jocando , aliqua pars odio digna habetur. Jocus sit , sine scommate , sine alterius damno , sine dolore , sine levitate , secus non jocus erit , verum exacerbatio contentioque studiosa.

92. Si offensus sis , reprehende , aut parum te averte , post abjice sponte occasionem , amicitiae , & facilitatem , aut
per

per alium insinua, ne difficultate reconciliandi, avertas amicum, & amicitiam suffoces.

93. Familiaribus aut intimis alicujus, per te aut tuos innotesce, da bona verba coram, de eo, quem amicum credis.

94. Juva omnimode afflictum amicum, ut bene illi tecum esse videare.

95. Plures amicos quære, doce te plures habere posse, dum velis, neque tibi satis sit, uni alligari.

96. Cura, ut majus pretium in amico sit tuæ amicitiae, quam in te amici, & monstra dum potes juvando, consulendo, plus illi tecum interesse, quam tibi cum illo.

97. Non admitte superbam censuram amici, ne superiorem agnoscas, etiam, ipse noli censurare, nimius rigor suffocat, libertas sentiendi, facien-
dique fovet amicitiam.

98. Potius apertum inimicum malis, quam dissimulanter amicum, ab eo providere

videre potes, ab hoc vix caveas, sed hoc inter pares: verè dictum, *Arma aperta palam vites, fraus & dolus occulta, eoque inevitabilia*. Malis tamen utique, alteri esse dissimulanter amicus, quam aperte hostis, specie amicitiae, multis superior esse potes, & injurias illatas, honesto prætectu atque occasione coërcere, (sed intra metas virtutis) aperta hostilitas similem ab adverso provocat, plerumque studium præveniendi, periculosum.

99. Cave ne in puenquàm conferas beneficium, quod cum alterius injuria conjunctum, non enim taliter mereberis de illius amicitia, quam hujus provocabis in te odium.

100. Nunquam (quod tute & prudenter poteris) contemptum tui donabis, etiam amicissimo, statim responde, vanum ea in parte *discretionis nomen*, levior jactura amicitiae quam estimationis, illa reparatur, hæc nunquam, amissa, sed tamen fac, modice repre-

reprehendendo injuriam illatam, non vero acerbius vindicando.

101. Non vero ad quamlibet injuriam amici emovearis, quæ per inanimadvertentiam illata, eo casu illatam quasi non intelligere debes, scio quidem, moderationem istam animi, non omnibus esse probatam, qui præsertim putant, nullam injuriam sine sensu transmittendam, metu ne *si veterem injuriam feras, invites novam*, verum tales, cum reddere formidabiles se cupiunt, hoc simul efficiunt, ut nemo cum illis habere commercium velit, cum enim labi, prona gens mortales simus, & subinde affectu, seu incogitantia abripiamur, quisque metu offensæ, istos odii tam properos teneacesque fugiet, ceu bestias feroces, solitudini relinquens suæ. Sed tamen injurias per petulantiam insultandoque factas; exemplo cum fiunt, coercendas puto, non ultionis studio, sed castigando, ut in posterum modestius in te, & in alios
se

se gerant, neque in te ipsum postea eo facilius peccetur, quasi ex facili omnia toleraturum.

102. Nunquam amico aut inimico (quod loco magni consilii habe) aliquid de te acerbius dictum factumque exprobra, sed quasi nescias.

103. In evitandis mutuis injuriis, aut retorquendis acerbitatibus, imitere prudentes digladiatores, qui concurrendo, non semper oppositu armorum, adversum ictum retundere opus habent, sed apte corpus suum in partem declinando, aut humiliando, aut contrahendo, vulnere subtrahunt & vitant, ut illud suæ fortitudinis, sic hoc non decori; sed arti tribuendo. Tu quoque haud prudenter facias, si cuique acerbitati, auctoritatem opponere, & in periculum dare velis, potius te ab injuria recipienda declinabis, aut receptam velut nesciens, aut (cedendo fortunæ) medius inter dissimulantem, humiliter feres, condonando fragilitati,

tati, aut antiquæ amicitiae, aut inanimadvertentiae, aut tempori, aut occasione, immo ipse tibi, ne, dum retundere vis, nec tamen possis, eo majus vilipendium in posterum patiaris. Nonnullorum vero sociorum est natura, quos velut duros filices, molli subiecto pulvillo comminuas, & in rem prout velis, aptes, diutius exceptos, haud contundas, sic illos, facilius nonnunquam humanitate, quam oppositu austeræ gravitatis devincias, prout alterutrum succedit, in rem dextre accommodaturus. Aptissime in rem (sparsum) Seneca. *Aut potentior te, aut impotentior tibi: prudentiori cedamus, stultiori remittamus. Amicus est? fecit quod voluit: inimicus? fecit quod debuit, multos absolvemus, si cœperimus ante judicare quam irasci. Nonnulli seipsos volentes inquietant, dum interpretatione quadam eo perducunt, ut videantur esse injuriæ, cum non sint, immo quosdam dum vana concitaverint, irascendo per severant,*

164 *Andrea Maximil. Fredro*
severant, & causas offensarum sponte à
longè petunt (immo imponunt) ne vi-
deantur cœpisse sine causa. Multa nos
injuriam transeunt, ex quibus plerasque
non accepit, qui nescit. Non vis esse
iracundus, non sis curiosus.

104. Meliorem esse surreptorem ad-
ministrum, modo prudentem dex-
trumque agendo, quam inertem, li-
cet alias fidelem; potiora ut auferat,
ruborem utique ille habet, hic totum
pessundat per inertiam. Rem certam
dico ab experientia.

105. Præmiis retinetur amicitia, ve-
rum præmia bis sunt dulcia, dum pro-
mittuntur, aut cum dantur; promitte
tu prius, postea interjecto tempore dare
poteris, bene ait ille: *Diu desiderata,*
dulcius obtinentur, cito data vilescunt.

106. Pueris fæminisvè quæstus, viris
actio convenit, aut saltem dissimulatio.

107. Prout ingenium nostrum, in
hanc aut illam, recti pravamque par-
tem naturaliter inclinat, hæc aut illa
exem-

exempla, tum consilia, promptius sequimur, aut fugimus, ut velut lupum auribus tenere, tum aquæ characteres imprimi contendas; sic quosdam in hoc illudque inducere contra genium naturalem, frustra enitaris, flectuntur in tempus, sed non transferuntur, nec franguntur, dum velut in Scena, mutuatam pro tempore personam, diu sustinere non possunt, cito ad naturam redituri *vulpem pilum mutare non mores.* Consilia *magnanimitatis*, generosæque mentis conatus, si *meticulosus* suggeras, promptius illi (dum timent) exempla dissimulationis, in speciem cautorum & modestiæ amplectuntur. *Parcis* tenacibusque, Munificentiam, utiles erogationes, splendidos pro autoritate apparatus, suadere frustra studeas, sed rationes turpis parsimoniæ, sub velamine inutilis prodigalitatis, & decoctionis bonorum, promptius illi sequuntur. Deinde *Trucibus ingeniis Clementiam*, humanioraque quid proponas

nas frustra? cum illi in severitatem nimiam, importunumque rigorem, sub imagine justitiæ, & correctionis malorum, proniores. *Lenta*, cautaque de in *temerariis*, suggeras parvo effectū, dum in argumentum audaciæ constantisque animi, incaute, præcipitanter, inconsiderate, periculis se committunt, male cœptis persistunt, *errant*, *non provident*. Avaris quæstuosisque ingeniis, *recti honestique legem* (ut ad famam præcipua rerum dirigant) non persuadeas, cum sub velo civilis accepti, licitorum, tum necessitatis in illicitos quæstus devolvuntur, cum decipiunt ipsi, non deceptos se tunc ajunt, astutiam (ad injuriam virtutis) prudentiam agendi & cautionem vocantes, vel demum prout natura hominum in hanc illamque virtutem aut vitia, pronior est, facilius aut secus difficulter inducimur & suademur. (Vide notationes meas Politicas puncto XII.)

108. Circumspecti cautique viri per omnia,

omnia, magnis rebus gerendis valent, nam lenta & provida, summæ rei proficiunt, verum negotiis minoribus, aptiores, qui nimia consideratione non laborant, quæ sæpius obest, aliqua enim impetu, & forte promptius habentur, nec (si hoc illudve curiose circumspicias) quod in rem est, assequare. Dubitatio de eventu (ex nimia consideratione) plerumque animum involvere amat, opinione periculi, & diffidere facit, illud modo considerationem, ne quod intendis, contra rationem sit, contra formam recti conscientiam.

109. Dandæ consolationis, tum componendorum animorum: non melior ratio, quam fateri justum patientis (sit animi, aut fortunæ, sit corporis) dolorem, dein adhibere dextre lenimenta ex casu humanorum, & instabilitate fortunæ, quæ eodem passu vadere nescit, esse causas doloris, nec deesse remedii, tum solatii. Animi
dolorem

dolorem interpretatione quandoque majorem reddi, corporis morbosum fortunæ casus, augeri longa imaginatione, aut nonnunquam sola opinione, verum ad melius consilium, præsertim vero ad *Divina*, & nostri justam pro demerito pœnam, sæpe revocandus animus. Qui secus componendis acerbitatibus aut doloribus, remedium putant, negare justam causam doloris, falluntur; nam sic directe pugnant in affectum patientis, velut mollitiei aut judicii eum arguendo, nec ideo sanant morbum, verum, (contraveniendo) in majus irritant animum. Potius ingenuè fatendum, *justam doloris tum offensam subesse causam*, sed modum habendum. Atque sic est recte condoluisset, simulque probum se amicum profiteri velle, dum eadem lance dolores, qua ille ipse qui dolet (nec leviter contemptimque) pensamus. Concedendum nonnihil ægritudini animi, & præconceptæ opinioni, ut juvisse infirmi-

infirmi-
tatem dolentis, compatiendo,
non impugnasse studiosè, immo con-
demnare (*dum non pro dolentis parte*
loquimur) videamur. Laudo peritiam
aut argutiam, medici cujusdam Poloni,
cum in ægrum nobilem incidisset, di-
utino capitis dolore agitato, ex eo-
que insana imaginatione profectum,
ut sonum campanæ, dein campanam
in cerebro sibi enatam obfirmatus a-
nimo asseveraret, negantibus possibi-
litate morbi aliis medicorum, & æ-
grum insanix arguentibus, corporis
simul & animi dolorem auxerunt: ve-
rum ille argutior, reliquis abire jussis,
velut medendi inertiam exprobraturus,
indignabundus, novitati morbi longa
oratione condoluit, promptitudinem
curandi simul offerens. Interim æger,
assentiri medico, prehensare salutis pa-
tronum, simul fidenter, animum &
corpus (superaddita pingui satis cura-
tionis mercede) offerre curandum.
Exinde medicus, opinioni patientis

H

non-

nonnihil indulgens, comparata subtilissimo artificio modica nola, vomitorias potiones ordinavit, tum vomentis caput, in speciem compatientis sustentans, supposita pelvi nolam manu aptissimi occultatam, cum sonitu, cadere fecit, vomitu velut è cerebro provocatam, ut imaginationis insolentiam simul & morbum, novæ artis commento, demeret ægrotandi. *Sape dolemus aut offendimur, quia offendi nos putamus.*

II. In omni actione dubia, majoris in eam partem peccare, quæ utique corrigibilis, quam quæ corrigi neutiquam potest, aut saltem in eam, quæ minus damni, dubiique habet. Vetus dictum, *Inter duo mala minus eligendum.*

III. Quæ non potestate conservare aut assequi, licitis artibus contentio- nis, litigii, fortioris manus, interpositis dextrè amicis & agendi auctoritate, adipisci conaberis, meditationis, & securæ, honestæque pacis artibus;
deinde

deinde protractione, dissimulatione, meliore occasione, & (res sensim emolendo; perficies in melius, mora, vel saltem adlaborabis, ut in majus nocendi, media, & potestatem, alteri parti quomodo prior auferas, audax, cautus & prudens. Artibus pacis, rem dum aggredieris, semper habes in potestate, ad artes rixarum bellicque ut pro commoditate (dum velis) recurras, secus in contentionis campum, dum temere dederis, extra potestatem jam erit (sed nisi pro arbitrio fortunæ) pax & quies ut statuatur, æris profusio, periculaque ut vitentur. Per omnia igitur prima sit tibi artium mediationis, (quod supersunt) *Pacis* id est cura, rixa, partiumque collisio, semper sint ultima, & ex summa necessitate. *Velut in militaribus meis, quæ propediem fero, artes pacis, bellicque, fusius dabuntur.*

Pars Quarta.

POLITICO-MORALIUM.

I.

NUnquam proba vires, & armorum exercitia etiam laceffitus non exerce, videaris tamen exercitatus, ad retinendam opinionem scitæ dexteritatis.

2. Non verbo contende aut disputa, sed quod sentis, sine affectu narra.

3. Cum iis non contende, neque move litem, quibus potentia impar es.

4. Ciceronis præcepto. *Amicitia quæ non placent, dissuenda magis quam discindenda*, quasi dictum velit, ut lente seponas amicitiam, & ab alia dissuescas, quam ut contemptim abjicias, illo enim modo, saltem cessabit amicitia, hoc vero parabitur inimicitia, ex contemptu sui, per præcipitem aversionem; Non statim igitur mutabis stylum amicitia, ut *saltem familiaritates sint sepositæ*

sita non inimicitia suscepta.

5. Si vera alicui loqueris, dic neque te pro conscientia dicere aliter, neque illum aliter facere posse, obtende pericula, ni fiat, malle te veritate (cum salute amici,) displicere, quam placare assentatione cum periculo; libertatem interim sequendi (velit nolitvè) propone.

6. Non statim petitis aut intercessioni amici annue, etiam assensurus, deliberaturum te ai, ne ille sibi totum te vendicet, & facilitate amittas auctoritatem, aut dependentiam (ut ajunt) agnoscas, gratius item venit beneficium à deliberante, quasi non à levitate, profectum, sed à ratione.

7. Non unum amicum in consilium voca, sed plures, ne uni tribuisse & te credidisse totum (quo superbum reddas) videare, aliquando studio præteri.

8. Talia loquere coram amico & cliente, quæ divulgata, pudorem aut metum non incutiant, verè ait ille,

Ita amicum habeas, ut fieri inimicum putes.

9. Nunquam totalem tui fiduciam habeas, sed verearis potius, in secunda fortuna amicos parabis, in adversis pro subsidio habiturus.

10. Nunquam te aliter amico uncredes, ut partem securitatis, aliunde tibi non relinquas.

11. Multis ex similitudine morum est amicitia, sed hanc circa honesta quaeres.

12. Adversarii aut hostis, diversa sunt nomina. *Adversarius* vitio nostro nobis adversatur. *Hostis suo*, ut adversarium vites, te corrige, ut hostem amoveas, illum corripere oportet.

13. Pileo & comitate, multi parantur amici, & facilitate aditus, *vili emitur, qui pileo & familiari verbo emitur*, Mauritiū Auriaci Principis dictum.

14. Facetiis abstine, quæ ubi multum ex vero traxerunt; acrem sui memoriam apud amicum relinquunt, sed
tamen

tamen in sermone, nimium intensa verborum severitas, aut triste supercilium vitandum, quod loco gravitatis, nomen morositatis aut superbiæ parit, nisi civili honestaque comitate utaris.

15. Non omnium quandoque rerum scientem te simula, agendo otioso simillimus.

16. Antequam aliquid promittas, cogita impedimenta, quæ occurrere possint, an difficile sit præstatu? an sine tui alteriusve fastidio fiat? ne post pœniteat promissi.

17. Non sis properans in delectu amicorum, nec statim ac affectus ducit, intimum pectus aperi, lucteris cum affectu volenti, vide prius, an virtuosus, an constans, an taciturnus sit, *an tuus, non tuae fortune amicus.* Sunt quidam simulatae virtutis (quæ omni malitia deterior) facie non animo boni, *habitu & ore* (Taciti utar verbis) *ad exprimendam imaginem honesti, exerciti, ceterum animo perfidiosi, & sub-*
H 4 *doli,*

*doli, avaritiam & libidinem occultantes, Politice & ingeniose nequam; qui eo prodigaliter amicitiam obligant, quo magis violant, quærunt amicitiam, sed quam ad suum commodum referant, quæ alias inter bonos, reciproca probatur, nihil debere sibi totum rari, colloquuntur familiarius, sed venena tantum exsugunt verborum, conversantur; sed qui nisi reprehendendum vident, cum totum damnare non possunt, nævum studiose quærunt, aut per malitiam adstruunt bonorum factorum cæci aut oblivissimi, detrahendi tantum memores, nunquam minus amici, quam cum amicitiam ostendant, sub specie amicitiae, quemque facile invadentes, & quibus, si resurgat, exemplar bonæ virtutis *Cato*, non se tutò credat. Quidni tales fugias? aut saltem probes prius, nisi sapiant venena melle uncta, aut minore damno feras titulum solitarii, melancholici, (vel si familiaritatem vires) fastuosi, quam ut familiare & intimum*

timum pectus aperire velis, procul tamen à nota vitantis.

18. Aliorum exemplo metiaris amicum, si alteri fidus erat, si non decipit, si aliorum famam recte coram tractat, prope est, ut idem tecum sit.

19. Parum Melancholici, in amicitiam deligendi, modica Melancholia propius constantiam est, effusa lætitia prope levitatem; sed plerumque falso nomine Melancholiam nuncupamus, dum potius gravitas morum vocanda, aut si licet illa, prudentibus viris, per honestas actiones pellere illam, in potestate semper est, præsertim dum adhibentur in amœnitatem convictus, amici & faceti convictu clientes, verba & sermocinationes, in materia gravi, seu circa privata, convivæ, musica, latrunculorum & chartarum lusus, histriones scenici, deambulatio nemorum, hortorum, aut vectatio, balnea, navigatio, venatio, equitatio, hastiludia, jaculationes arcuum, scloporum,

tormentorum ad metam collimatio, res œconomica, architectura palatiorum & fortalitorum, tum modicus secessus, *causa pietatis*, vel prætextu expediendorum negotiorum publicorum, in quam rem serviunt domorum abdita triclinia, & recessus, demum lectio librorum, præsertim vero Historiæ, si ad Geographicas tabulas reducatur, tum Geometria practica, distrahunt otiosum tempus, nec leviter recreant animum. Insuper (idque maximum) temporis iusta divisio, in singula negotia, tam seria, quam quæ ad amœnitatem convictus, fallunt diem, & Melancholiam pellunt.

20. Qui necessitate ad amicitiam tuam compulsi, ab aliis repulsi, aut à te commoda sperant, illi haud durabiles in amicitia, vide ergo, ut sponte amici fiant, non ab alio respectu, sed tamen *occafio* nobis sæpe parat amicos.

21. Pares tibi in moribus quæres amicos, si sapias. Ex dissimilitudine morum

rum

rum non solum disjungitur amicitia, sed nova paratur offensa; Quid cum amico convenias? Si tu melancholicus, ille hilaris, tu domesticus vel solitarius, aut affectata gravitate stoicus, ille liberalior, publicam lucem amans, tu de libris, ille de equo, arcu, bello loquens, dum veretur quisque, ne multa ingrata, tristia minusque popularia, aut necesse ferenda in te, aut immitanda sint, igitur penitius (& sine complacentia) naturam revolve prius; verè definit amicitiam ille, *ut sit mutua ac benevola, animorum sibi similium, in bono consensio.* Raros exinde videas in orbe. veros *amicos*, licet multos habeant ad convictum *Sodales.*

22. Si in familiaritatem incurrant homines audaculi, verbo & joco impetuosius, ac prope importunitatem, fere candem faciem induere, jocum joco solve, media tamen cum gravitate, & acceptam acerbicatem dissimula, vitaturus posthac congressum (verum procul

à nota vitantis) nulla enim re magis in levitatem incurres, quam à talium familiaritate sociorum.

23. Si in Magistratu tibi posito, morosi aut importuni allocutores occurrant, quærulando, petendo, multa garriendo, utique non acerbe, loquentes excipies, sed modestè (morositatem eludendo) respondebis, rem esse tantî momenti, quæ in aliud tempus differatur, commodius audienda, nostri partem interim, cæteris quoque audiendis deberi. Absit vero, ut aliquem effusis pollicitationibus trahas, vel ludifies, modeste potius comiterque excusabis, non facturus, quam ut mentiaris, eo plus odii & levitatis postea paraturus, quò magis placere voluisti, inanum pollicitator, unde simul impotentiam tuam prodas, dum præstare promissa non poteris.

24. Graviore sæpe succrescunt offensæ, post reconciliationem, si dissimulanter reconciliaberis, præstat quandoque

doque amicitiam in tempus differre, ut interim omnis materia offensus, amoveatur.

25. Importuna excusatio, est accusatio sui, vel alterius opportunissima.

26. Intimo amicorum, immo neque uxori, secreta Reipublicæ revelanda.

27. Sint tibi certi dies, quibus cum domesticis clientibus liberius colloquaris, nec asperneris quandoque hilariorem (*media cum gravitate*) convictum, nam illa tristis sui Heri, perpetuaque observantia, alienat per modica domesticorum affectus, ut levius quandoque ducant, non munerari, quam negligentius præteriri, præsertim illi generosioris mentis, quos tenacius per humanitatem habeas, quam profusa liberalitate (in cætera superbus) pares. Non clientum modo, verum sanguine junctorum, bonos erga te parabis affectus, & arte quadam humanitatis retinebis, medius tamen inter elatam gravitatem, interque (ad obsonii ra-
H 7 ritatem)

ritatem) familiaritatem effusam, nam secus si oderint, acerrima sunt proximorum odia, maximeque *inimici hominis, domestici ejus* (Matth. Cap. V.)

28. Mordaces alicujus (vel populi) sermones, non magna vehementia, sed ingeniose refutare, vel potius per jocum, aut tacendo, eludere debes.

29. Commissurus aliquid tractandum alicui, causam non refer, verum serio injunge, & posce operam; vel si refers rationem, non tuum privatum commodum sapiat, sed publicum, ac proinde exsequenti, quo libentius commissum exsequatur.

30. In gerendis negotiis, utilior est opera eorum, qui ad tuam opem & liberalitatem respiciunt, quam qui beneficiis jam à te onerati, ideo quodcunque aggredieris opus, & socios perficiendæ rei quæris, fac eos aliquid utilitatis exinde sperare.

31. Non semper secretus sis, sed aliquando popularis, parandis amicis,
fine

sine quibus nihil præstatur. Non habeas vero amicos, qui non quæris, quærantur, non quærunt. Immo quærunt popularem.

32. Mordebis neminem ore, calamo, vultu, accusabis neminem, sed potius modice laudabis quemque pro merito virtutis, non velut ille (apud Tacit.) *Optimum quemque jurgio lacerans, & respondendi reticens, ut pavida ingenia solent.*

33. Ea occulta vis linguæ & verbis inest, ut seu amando, seu offendendo plus in animis hominum posse verba, quam facta, re ipsa experiare, ideoque *gravius maledictis, quam malefactis exacerbamur, difficilius contumeliam perferimus, quam damnum*, malefacta dolorem, maledicta contemptum nostri ingerunt, qui altius ferit, quam dolor, nam in animum intimum pugnat, & in mentem, ille in corpus tantum, aut quod est, circa. Tum è converso, gratiora sunt generosis pectoribus benedicta,

ne dicta, quam bene data, ut fere inter omnes actiones (si amicos parare cupis) in verba prius quam in facta (& linguæ magis, quam manuum operationes, nam lingua altius quam gladius ferit) intentus esse debeas, seu quid acerbi, seu quid grati, auribus & animis hominum efferas, quæ est honesta ad capiendos hominum animos fallacia; recte ait quidam: Lingua modica pars corporis navium gubernaculo similis, in cujus parvulo motu, totius navigii regimen, immo salus & interitus vertitur. Minore utique impensa obveniet, multa benedixisse, quam multa dedisse: Verum si utrumque recte adhibeas, pluribus felix eris amicis. Adde, *acerbe facta vim inferunt, atque ideo terrent simul offendendo*, ut necesse metum cuiusdam venerationis, seu respectum sui incutiant, acerbæ dicta, dum inermiter exacerbant verius, quam offendunt, odium non terrorem movent,

vent, ac proinde inermis iræ contem-
ptum, tum indignationem apud audi-
entem pariunt, cum audacia majore in-
ultionem. Sic Germanos olim terre-
bant Romanorum arma, & officii ad-
monebant simul, postquam vero sub
Quintilio Varo, ab armis, ad inermem,
verborum conflictum, & litigiosa ven-
tum jurgia, quasi ad reliquam injuriam
id summum adjiceretur, implacabiles
ideo facti, nec æstimatis amplius legi-
onibus Romanis, eas oppressere. Ait
Florus (lib. IV.) *Germani postquam*
tristes togas, & saviora armis jura vi-
derunt, duce Arminio, arma corrip-
unt, &c. Unius causa Patroni os sutum,
recisa prius lingua, quam in manu te-
nens Barbarus. Tandem (inquit) vi-
pera, sibilare desine. Ferdinando Ar-
ragonio Regi Neapolitano, secus, non
majus argumentum fuit Neapolim re-
cuperandi, quam cum accedente ad ur-
bem victore, Carolo VIII. Gallix Re-
ge, publicè valedicturus Neapolitanis
(Gal.

(Gallorum partes aperte secutis) suavis-
 sissima eos Oratione allocutus, ut ~~et~~ ⁱⁿ ~~ser-~~ ^{ser-}
 monis, ob idque æquioris animi
 memoria, postea desiderium in Neo-
 politanis excitaretur, Ferdinandi revo-
 candi, Gallo relicto, à cujus Præfectis,
 inhumanius tractabantur (*Franciscus*
Guicciardinus Histor. lib. I.) Sic præstat,
 etiam erga non male affectis (quos pu-
 nire aut cohibere non possis) bona ver-
 ba dare, penes moderationem animi,
 quam pro impetu asperius tractatos,
 in majus exacerbare, nullo in rem tuam
 commodo. Præterea in sermonibus.
Non semper (ut Didaci Savedræ ad ple-
 nam loci doctrinam per diversa casuum,
 monitum includam) *formulis alloquio-*
rum ordinariis & generalibus responsis u-
tendum, hac enim cum dantur omnibus,
satisfaciunt nemini, nec parum affligit
mœrentem animum si responderi sibi vi-
deat, quod norat jam ante, quodve prius
etiam, quam proferretur, ad supplicis
aures pervenerat. Nec semper audiat
Prin-

Princeps, roget interdum, nam qui non sciscitatur, de re plene cognoscere non potest. Inquirendum igitur, ut status causa penitus perspiciatur. Juste succensitum olim Vitellio, qui brevi auditu, quamvis magna transibat, impar curis gravioribus.

34. Non minus prudentis est viri, scire quod dicat, quam quid taceat, sæpe (importune prolato verbo) multa bene incepta, in adversum ivere, præsertim si efferatur, quod suam partem ab aliqua conjectura prodere, adversam vero præcavere, aut temeritatem provocare possit, recte *Emilius Probus*. *Opportune tacere, non minoris est prudentia, quam diserte loqui*. Eorum præsertim, qui alto honoris gradu subsistunt, sunt *Allata verba*, amant facile in vulgus deferri, ut præstet, opportuna quandoque tacere, quam obliquas *Cortesaneorum* interpretationes experiri.

35. Titulos inusitados sperne, oblatos modice excusa, nam sunt prope invidiam.

36. In-

36. Indicaturus lites, nihil profer præter decretum, ne affectus pro altera parte colligi possit, quod erit extra invidiam. *Exuit personam judicis, quisquis amici induit.*

37. Si aliquid detrahunt tibi homines, erige potius animum, sciens, æmulam magnorum esse invidiam, *melio-rem esse utique acerbam invidiam omni amica commiseratione*, sed vide, ut intra metas virtutis hæc habeas.

38. Contemne linguarum calamo-
rumque vulnera, & vinces, nullum illa lædunt, nisi volentem, verum is contemptus ex animi generositate & conscientia propriæ virtutis, non ab ignavia proveniat, velut de Nerone Suetonius. *Nihil eum patientius quam maledicta & convicia hominum tulisse, vel contemptus omnis infamia, vel ne fatendo dolorem, irritaret in pejus ingenia.* Sic fere incorrigibiles dum sumus, ob-
jecta flagitia, non pudoris, sed joci loco habemus, unicum nonnullorum
studium

studium male agere, dein factum excusare. *Impius cum in profundum venerit, contemnit. Latantur cum male fecerint, & exultant in rebus pessimis.* (Proverb.)

39. Cedendum aliquando furori populi, quam obsistendum, tacendo multa diluuntur.

40. Vide, ne alium statum quam populus tenet & amat, spirare videre, ideoque commodis populi studere te monstra, juvando loquentes, in adversis compatiendo.

41. Etiam aliquando infra' genus tuum te abjice, nec mensam populi fuge & convictum, de Augusto Tacitus. *Populare credidit misceri voluptatibus vulgi.*

42. Liberalem te præbe, rebus non potes; nemo verbis pauper est; nemo tristis à te recedat, nulli tristem faciem, & rugosam frontem monstra, etiam ex justo negaturus.

43. Avaritia & parcitas, egregie factis (ac proinde bonæ famæ) obstant,
non

non amicitias Civium pares, non Clientes habeas, non servitium publicum, pace aut bello probe tractes, quin aliquid erogare necesse habeas, quod parce erogantibus, quo gravius fit, eo remotius à bona fama absunt, immo re ipsa malam habent, ferè eo collinat dictum: *Qui parce seminat, parce & metet*, *Liberalitatis* igitur in convictu & *Munificentia* (erga clientes tum amicos) nomen, modo tamen extra prodigalitatis naturam, egregius quisque vir sibi paret, honeste erogando, in argumentum obtinendi amoris primum, dein habendæ authoritatis inter Cives. Sed liberalitatem dum exercemus, ex rivo hauriamus oportet, non ut fontem ipsam exsiccemus: Qui per ramos carpunt arborem & fructum, sequenti æstate, renatos iterum colligunt, qui secus ad radicem securim admovent, ipsam, fructumque nusquam rediturum perdunt, sic erogationes honestæ, proportionatæ, planeque inexhaustæ

haustæ sint, quæ ex proventu, non quæ ex alienatione fundorum, tum originalis boni (*sola perdendi cura*) apparantur, nam alias cito definant. Is igitur impensis diu sufficit; qui *ex ramo* (dicere si licet) *non ex trunco vivere studet*. Quæri exinde potest? quare fit, ut avari parentis successores, plerumque prodigales fiant? uti fuit Caligula post Tiberium, Antonius Caracalla post Severum Imperatorem, & alii passim; ratio in promptu. Dum paratam inveniunt gazam & opulentiam (ex aliena opera) per totum habent, ingenerari necesse ex dudum præparato, nullam sui & suorum in præsens curam (nam quæ non peperit sibi quisque minus amat, cum proprius labor magis pensatur, alienus uti gratuitus, levius habetur) sed potius ex remissione curarum corruptelam, ut sit primum malus usus gazæ parentum, dein luxuria, tum insolentia, exinde aliorum contemptus, postmodum ve-

niam

192 *Andrea Maximil. Fredro*
niat (modo sine vulnere) egestas.

44. Audacissimum quemque, plebe, beneficiis vince tibi que obstringe, dum fenseris, quibus capiatur, virtuosos tamen & modestos, in amicitia interiori præponens, hi dum pro virtute agunt, rectum semper constanter, & sincere faciunt, illi sæpius insolescunt, & modestiam in amicitia faceffunt, nec debere se, sed deberi sibi totum volunt, devincies tamen tibi illos, *non ut profint, sed ne noceant*, imo prodesse poterunt pro tempore, si recte utaris. Argute in rem Vellejus (lib. II. histor.) *Brutum amicum habere mallet, inimicum magis timeres Cassium, in altero major vis, in altero virtus.*

45. Ab asperioribus verbis cave, verum mollioribus utere, etiam non laudaturus, etiam reprehensurus.

46. Negatio mollibus vestita verbis, gratior est tristi morosæque largitione.

47. Potius odia lenitate (humanitate admista) vincuntur, quam mutui odii pertinacia.

48. Itera-

48. Iterata beneficia fortius stringunt, velut repetita vincula fortius innectunt, ideo frequentia potius, quam magna confer, quo diutius dando sufficias, nam vere homines, beneficiis passim utuntur, ceu floribus, tam diu gratis, quam diu recentibus, marcescit eorum memoria, nisi sæpius dando renovetur. Sæpe vero dare non sufficias, si magna simul dederis. Deinde scias oportet, cariorem esse cuique modicam recompensam, pro virtute & merito, magisque deberi gratiam exinde datori, quam quodvis magnum donum, in obvios petitores effusum, hoc enim accipiendi modo, non ad virtutem nostram, sed ad fortunam, liberalitatemque conferentis, honos refertur, illi priori, utrumque simul pensatur, & munus, & quod majus est munere, virtus nostræ æstimatio, cujus esse quisque sibi conscius, & ab aliis pensari quam maximum cupis, vel secus improbari, graviter indolet. Immo
I illo

illo priori modo, est-sæpius inconsiderata largitio, ne dicam effusa, prodigendi facilitas, mollis animi partus, hoc vero posteriore, dantis prudentia, vera liberalitas, & meritorum illecebra vocatur.

49. Haud firmam amicitiam aut diuturnam parari crede, quam dando retines, ni adhibeas, cum reverentia tui auctoritatem. Vere ait ille. *Quis magnitudine munerum, non morum constantia amicos sibi parat, meretur magis, quam habet.* Cum enim satis acceperint, quantum opus habent, aut benefaciendo deficiat exhaustus, vel saltem nisi avaræ expectationi, magnitudine dandi sufficias, rejicient te, nec amplius curabunt. Fundamentum ergo parandæ & retinendæ amicitiae penes virtutem & auctoritatem morum (cum reverentia tui) penes, beneficia vero, & comitatem habebis, velut pro condimento tenacius retinendæ. Peccavit in eo Julius Cæsar, cum omnia petentibus

tibus amicis ex facili concederet, quæ aliquando prudenter recusari poterant, unde plures amici eum confecerunt, quam inimici, quorum non expleverat spes insatiabiles, tanta enim nonnullorum amicorum importunitas, ut quamvis multum acceperint, injuriæ tamen loco habeant, plus accipere potuisse, dum facilitate obtinendi, assuescunt esse *petaces*. Idem in Galba reprehendit Tacitus (*Histor. I.*) *Hiantes in magna fortuna amicorum cupiditates, ipsa Galbæ facilitas intendebat, cum apud infirmum & credulum, minore metu, & majore premio peccaretur.* Ignis, ambitio, non avaritia, nunquam dicunt satis, plus apposueris? plus semper inflammantur. Cave ideo assuefacias amicos importunis petitionibus, obvia facilitate concedendi, potius nonnunquam petentibus humaniter recusa, non quod præstare nolis, sed in aliam occasionem differendo, ut dissuescant importunitati, assuescant *repulse* rubo-

rem petitionis habituri, nec aliter istos *Petaces* vitabis, vel potius *instar generosorum equorum*, *amicos alendos non saginandos studebis*, obesi non tam expediti, verum segnes, ad tuum libitum ferendo labori.

50. Inde enascitur prudens monitum, ne amicos, tum domesticos clientes, quorum opera indiges, spe præmii in factum provoces, aut facere aliquid assuefacias, potius negotium propone, & operam amice require, ut pro necessitate officii factum aggrediantur, exsolvendi de sua virtute expectationem. Si vero aliquid daturus es, non in recompensam offer, sed ex beneplacito, adjecta post præstitum opus mora, quod enim in recompensam datum est, non obligat in futurum accipientem, sed solvit debito recompensæ dantem.

51. Non tantum de amicis & clientibus dictum esto, sed de stipendiariis militibus, ne prudens Dux assuefaciat
milites

milites recompensæ, potius officia militaris virtutis & obsequii requirat, pœnam propositurus non facturis, quam præmiuin alacribus, quod offerendum tamen, sed ex insperato.

52. Qui rem bene habere vult, rei perficiendæ sit diligens curator, *potius in negotio, quam post negotium, malefacti operis severus exactor*, cum tamen res male facta manet, nec revocari potest, prodest quidem correctio in posterum, sed in præsens damnum habetur. Eo prope collimat *Tacitus* dum ait: *Præstat officiis (seu negotiis) non peccaturos præficere, quam punire cum magna fecerint.* Prout certe rem non aliter probe assequaris, quam si apte negotiis præficias non qui superiores, neve qui sunt inferiores, sed qui officio proportionati, & velut è condicto pares. Illi primi, officium commissum, infra capacitatem dignitatemque sui habebunt, illudque negligent, nec offerenti gratiam debebunt, sed potius of-

fendentur, iudicio parvi muneris, velut contemptos se ægre ferentes, secus item inferiores, dum non sufficienti muneris, rem agendam pessundabunt, ut iudicii arguaris, qui imparibus agenda contulisti, volens tui ipsius deceptor, velut si Myoparoni piscatorio, classis navarchum præficias, aut obvio remigi, prægrandem quadriremem curandam si committas, hic per inertiam regendi, eam perdet, ille muneris vilitatem contemnet infra dignitatem habiturus. Vel perinde supervacaneum fiat, ac si magno pedi, parvum calceum induere contendas, vel secus toga virili, vestire infantem (onerandum potius, quam ut ornetur) velis, in hoc turpi excessu, in eo peccaturus defectu. Oportet igitur, secundum genium cuiusque (prout in artem agendi hanc aut illam natura inclinatur) munera cuique committantur, non vero è contrario, Togata, viris bellicis, Provincialia, maritimis; ludicra, feriis & gravibus;

vibus; juridica tum forensia, ruralibus: amœna, tristibus: turbulenta pacatis; laboriosa delicatulis; regenda, obedire nisi & subesse aliis commode scientibus, intricata, non expeditis & hæsitantibus: Religiosa, politicis. Denique (reperito dico) parva ingeniis magnis, magna, parvis. Satis prudens in eo Tiberius, de quo Tacitus (VI. Annal.) *Poppæus Sabinus à Tiberio maximis provinciis impositus, nullam ob eximiam artem, sed quod par negotiis, neque supra erat.*

53. Quæ ratio non potest, sæpe tempus sanat, noli anxius esse, *verum tempus in consilium voca*, nonnulla difficiliora tempori, aut potius DEO, sananda permissurus. Sic ille apud Historicum: *Consilium cui impar erat fato permisit.* Non tamen fac desperabundus. *Sape meliori fortuna, locum fecit adversa.*

54. Non qui res, sed magis qui tempora disponere scit, vel utrumque, rem
I 4 habet,

habet, recte autem disponit, qui bene dividit. *Ego & tempus*, contra duos Caroli V. Cæsaris dictum. Solus scit agere, qui tempore non nescit uti.

55. Cave morosos, qui momenta rerum trahunt in offensam sui, non aliud lucri ex talium convictu reporta-
bis, nisi cum indignatione acerbiter, dum sunt similes stomacho nauseabundo, qui etiam suavia male accipit & fastidit.

56. Minores virtutes affectum vulgi movent ad amorem, excelsa virtus, nisi magnorum movet intellectum, ad pensandum & æstimationem, hæc erga superiores necessario usurpanda, sed cum minoribus, nisi minorum virtutum usus, cum enim illi, altas capere non possint, stupent verius eas, quam amant. Prout igitur cum magnis, aut minoribus res tibi, sic virtutem (utique omnium haud neglector) hanc aut illam, studiosius adhibebis, si sapis. (*Vide Notationes meas Politicas puncto XII.*)

57. Sem-

57. Semper cautus sis, & haud fide.

58. Cave inimicos laudantes, *Nam quo incautius decipiant, palam laudant.* Immo cavebis amicos, placere nimium volentes & susurrone.

59. Tuum secretum sit clausum, & nisi uni alicui, aut tibi soli, apertum; Sed cavendum, ne silente lingua vultus, oculi, ac cæteri gestus loquantur, ut quod maxime celatum vis, in lucem protrahatur.

60. Dicto vulgari: *Male bene positum, ne moveas, ne fiat pejus.*

61. Affectus, inimicus bonæ rationi, qui cum non regit, regitur, neque te Ira, neque nimius Amor ducat, sed mediocritate laborandum, nisi velis errare. Qui minus affectu habet, plus ex ratione.

62. Qui amat nimis quietem & secessum, qui breviloquentia gaudet, ad usque Affabilitatis Comitatisque defectum, qui Stoicum & grave supercilium gerit, morosus dictorum facto-

rumque in alios censor, qui parce erogare cupit, qui facile dicto offenditur, nec scit (salva tamen gravitate & virtute) dissimulare multa: paucos amicos sibi parat, nec multum in populo potest; impossibile est, cum nemini te amicum dederis, dari tibi aliquem velle, aut si vis habere, necesse remittendum aliquid ex rigore, quod virtuti non contrariabitur, sed eam adornabit, sæpe virtutis legem falso putamus, cum potius vivendi morositas est.

63. Cauti aut nimis quieti, dum esse nonnulli volunt, otiosi fiunt, cum aggre-
dendo, terrentur difficilibus, vel cum non ex voto, res alias cadant, vel cum sibi (quæ recte fecisse conscii sunt) à malevolis succenseri, indigne ferunt, vel dum sunt agendo nimis scrupulosi nec plane resoluti, & leves offensas metuunt, quod mollis & ignavi verius, quam quietem appetentis animi signum est. Fateor, nihil agentium facta non improbari, non errant, dum nihil
agunt

agunt otiosi, velut apud Tacitum Hordeonius Flaccus, *Non compescere ruentes, non retinere dubios, non cohortari bonos ausus, sed pavidus, segnis, odiosus & secordia innocens; & Galba magis extra vitia, quam cum virtutibus, in quo cum segnitia esset, sapientia vocabantur.* Tales non habent inimicos, sed nec amicos quoque, dum negliguntur errare vero, dum nobis succenseri, aut offendi, uti hoc alienæ malignitatis, non autem nostri vitii, sic illud, prorsus humanum est, cum non qui minime errat, sed qui prompte erratum corrigit, & à casu intra virtutem assurgit, prudens est: Hominis actio, (dum hominis est) aliena prorsus ab errore esse non potest, Divina nisi errore vacua tamen à malitiosis, male intelliguntur, modo illud in homine laudatur, dum non confundi, sed prompte se recolligere, intra magnanimitatem sui, potens animus. Falluntur ideo, qui ab usu & tractatu rerum le-

vibus terrentur, ut recte succensuerit illis Justus Lipsius (Epist. 39. Cent. 2.) *Contemni à te humana gaudeo, quæ me quidem authore, pedibus etiam trahere, sed ita ut contemptus iste, ab alto quodam animo sit, non quo ipse se contemnat. Hoc modestiam aut sapientiam censes, jacere? nihil agere? ad nullum vita genus collineare? ignavia est; magnorum etiam sæpe ingeniorum pestis.* Subit enim (ut ille inquit) inertix ipsius quædam dulcedo, & invisa primo desidia, postremo amatur.

64. *Pro ultimo.* In gratiam cujusque prudentis & virtuosi Civis, adjiciendum putavi, ut si ad recta præcepta vitam moresque componat, & in altum agendarum rerum pro virtute contendat, fore ut incurrat in malignantium linguarum censuras, invidorum odia experturus; quæ plerumque virtutem exercere amant. Ne igitur acerbitate vir prudens confundatur, sed potius in partem melioris fortunæ trahatur,

hat, certum argumentum magnitudinis habiturus, invideri sibi, quam ut invideat, modo rectæ virtutis conscius sit; Continua observatione comper-
tum, non posse magnorum Catalogo inferri, nisi qui prius asperam invidiæ viam decurrat, aut dum eam calcave-
rit, tum vere fortunæ altioris gradus, substrui sibi ab occulto fato speret. Non
certa sermonum acerbitas invehitur in vilem colonum, quia sola ignobilitate & inertia securus, quem per omnia fors infima, semotum ab hominum fama, & tutum ab invidia facit, non invadit humilia tuguriola verum altas petit domos, aut potius eos exercet viros, qui extra abjectorum fordes positi, in conspicuo præclaram agunt vitam, ut vere dicatur. *Emulam magnorum esse invidiam.* Velut altius noster Tacitus. *Sinistra erga eminentes interpretatio, nec minus periculi ex bona fama, quam ex mala.* Si penitus introspicere liceret intimum invidorum pectus; quidni vi-

deretur intus crudeliter laniatum, animus exesus, mens invidiæ curis decocta, ut potius cum loquuntur, aut de te sibi vindicant, potius de se ipsis graviores pœnas sumant, non in te verbo, sed in se continua magnitudinis meditatione sævituri. Illum tua generositas vexat, hunc in rebus gerendis gravitas arguit, aut morum pulchre composita venustas confundit, jam incipiendorum & agendorum prudentia, in contrarium nitendi æmulationi obluetur. Plerumque vero magna fama in magnos & officiis degentes, quos nobilitas, opes, honos, aut aliqua insignis claritudo; rumoribus objicit, quem ergo miserum, & infra genua sua abjectum (nec supra pro virtute assurgentem) videre mallent, superbum & obliquæ virtutis clamant, non quia tu vere sis, sed quia illi animo ægri, nequam, malitiosi, majoris virtutis impatientes, ut eo ipso inferiores se agnoscant, dum invident. Ad rem meam sacer scriptor,

Invi-

Invidiam, portatilem infernum vocavit,
ut quem invidum dixeris, vivum potius martyrem vocas, & in horas morientem, nihilque pejus in pœnam optes, quam ut rectum facias, quod inimicus invideat: *utinam invidi ubique oculos haberent, ut omnium felicitate torquerentur.* Torquetur sane quisque invidus, cum alterius felicitas, sui animi Tyrannis est, quod alterius fortunæ, gloriæve accessit, sibi demptum putatur, aliorum affluentia, sua macies, sua fames, & cum magni esse non possint, nec cæteros malunt, in se nequam, in cæteros haud boni. Ergo ne queratur de invidis vir prudens, gaudeat potius, nisi malit vocari miser, nec se altum stantem magis arbitretur, quam dum hoc malo jacet; Invidiæ similes meteororum ignibus fatuis, qui sequentem fugiunt, fugientem sequuntur, sic illæ, nisi non contemnenti nec conscio propriæ virtutis, nocent, gaudeat (inquam) magnum sibi inesse, quod

quod invidorum oculos fodiat, mentem decoquat, animum compungat, sibi in triumphum, æmulo in confusionem. Senecæ super hæc verbis usus. *Male de me loquuntur: faciunt non quod mereor, sed quod solent, male loquuntur? bene nesciunt loqui, non judicio faciunt, verum morbo, non de me loquuntur, sed de se. Moverer si de me Marcus Cato, si Lælius, si duo Scipiones loquerentur: nunc malis displicere laudari est, non potest ullam authoritatem habere sententia, ubi qui damnandus est, ipse damnat. Quibusdam canibus si innatum est, ut non pro feritate, sed pro consuetudine latrent, dicam ultra, male de me loquuntur, sed ipsi otiosi, alienos labores è convivio secure prospectantes, & quos publica quies aliis laborantibus molliter habet; vel quod a libi dixi, sæpe tibi repete, desiderari ad majorem perfectionem virtutis, adversarium habere, ut æque victus sit adversarium modeste tulisse, ac alia recte*

ete fecisse. Non igitur bonum eum
judica, quemcunque aliorum dictis fa-
ctisque obloquentem audieris; videsne
aquas per se sapidas & dulces, qualem
terram præterfluant? puram, amaram,
sulfuream, falsam, lutulentam, ejus
saporem purum, aut secus amarum,
sulfureum, falsum, lutulentum, & ma-
le olentum sapere; Sic judicia nonnul-
lorum de rebus bona sunt aut mala,
prout animus, unde feruntur, Habent
bonæ apes, unde suum mel ab acri ur-
tica decoquant, araneis etiam rosa sui
veneni materia, non quia rosa mala
sed quia nisi venenum quærit aranea;
Non igitur (quod sæpius suggero) con-
queraris, non ferrum in ultionem posce,
non exitium tibi obloquentibus medi-
tere, si vir bonus es, quam eo stimu-
lo in altum virtutis enitaris, plus quam
satis honestissimæ & triumphalis vin-
dictæ (si ea vindicta vocanda) dum tibi
invidetur habiturus, unde quod maxi-
mum in humanis, virtute superabis in-
vidiam,

vidiam, quæ non nisi bonæ virtutis constantiâ superatur, vi nunquam, sed ut potius incitetur. Sed cum omnia feceris, non semper eandem virtus in orbe habet æstimationem, in aliis eadem laudatur, in aliquibus non item. Ergone hodie non sunt viri, virtute, judicio, morum gravitate, agendique peritia Manliis, Scipionibus, Fabiis, cæterisque Romanorum & Græcorum magnis nominibus pares? Sunt omnino, verum seculi vitium, non virtutis defectus, ut non videantur, cum in ea tempora non inciderunt, quibus totum virtuti concedatur sine invidia, & locus & æstimatio, & præmia, & *agendi occasio*, verum potius illa, hominum malignitate compressa jacet, latetvè. Quid enim inter malitiosos possis? si corrigas? dum sunt mali passim, facile offendas multos, ideoque indignantur, si agere velis? invident, nec ideo juvant, immo studiose recte faciendum præpediunt, tenebras virtuti aliorum inducere

inducere amantes, ne comparitione, ipsi prodantur, aut vilescant. Prisca ætas ingenua erat, circa rectam simplicitatem, æquum habens virtutis intuitum, dum plures essent recti, quam in devia vitiorum abeuntes, neque ideo superbia obstitit, quo minus dictum consiliorum meliorum sequerentur, facile exinde se erigebat virtus in majus, cum seu ageres, pensaretur, seu adiutoribus & instrumentis agendi opus haberes, præsto adessent inter bonos, rectum volentes, aut quod velis, facere scientes. Facilius erat Scipioni, vigente militari virtute Romana, magnum Ducem pro Romanis agere, Annibalem vincere: Carthaginisque deprimere fastum, & Africani nomen pro se mereri, cum tot haberet in exercitu scientes ordinum ductores, bello iustorum *apta exequendo instrumenta*, quam si alias posterioribus seculis, labente disciplina, inter rudes, cohortium ad ministros armis agendum aliquid veniret.

ret. Aut *Portio Catoni*, cenforiam exercere erat promptum & reducere ad normam recti omnia, in urbe, in qua nondum per omnia adoleverat flagitium, & agendi licentia, quam ejus pronepoti *Catoni Uticensi*, cum ejus ætate prævaleret licentia, & ex opibus immensis fastus, tum insolentium turba. Nullibi igitur minus possunt recta ingenia, quam si inter eos venerint, qui sciolii, presumptuosi, & insolentes, tum rudes, tum imperiti, pertinaces. Exinde causa proxima est: In populari Republica concordiam vigere non posse, dum quisque præsumit audaculus, sciolusve nec alium sequi vult, aut primatum concedit meliori, verum sibi asserit insolenter, rem in diversa trahens, fœcunditatem ingeniorum nonnulli tunc vocant, cum potius agendi insolentia invalescit. *Ad concordiam vero necesse omnino: & uni duobusque concedatur, qui ex virtute præcant rectum acturi, cæteri sine scrupulo & murmure*

mure sequantur, immo juvent confidenter uniti, nec distrahant rem abeuntes in diversa, dum enim singuli præire volunt, universi confunduntur, Sed hæc obiter. Quantum verò ad famam & æstimationem Principum virtutis, evenit illis, velut quidam recte annotavit: *Tametsi unus aliquis Princeps, iisdem bonis artibus Rempublicam moderetur, quam alius gloriosissime eam moderatus est, aequè tamen acceptus futurus non sit, nec parem habiturus laudem, nisi subditorum utriusque quoque naturas, aequè probas esse contigerit.* Ad id amplius, nihil magis vulgus, quam ordinem odit, mavultque malos dominos, modo sine ordine & in licentia, quam bonos experiri, modo sint extra ordinem, ad normamque legis & virtutis, tum per omnia modestiæ ne componantur; Exinde secus, malis Dominis, in subditos ars sola illecebrarum est per obliqua, ut cum aliquorum fortunas emungant, in alios pro insolentia

lencia sæviant, univerſorum libertatem per diverſa aggrediantur, verbo tamen familiares ſunt, & ſuaviloquio laborant, arte varia lenociniorum, fucum actioni inducere amantes, præſertim dum privata vitia, mutuas inter ſe inſolentias, & ſcandala populo condonant, immo ſtudioſe connivent, in ſpeciem licentioſæ libertatis, dum cuique malum eſſe, & inſoleſcere in alium, impune licet. Sic verſutorum, aut quoquo modo obliquorum amicitia, inſcantur magis aliqui, quam eorum, qui ad virtutis legisque normam, ſe recte componunt, dum illis prioribus, libertas ſpecioſa, & amœnitas convictus inest, hi pro virtute & modeſtia, triſtiorẽ regulam vivendi, & morum quendam rigorem, inducunt, æſtimantur quidem, ſed non amantur. Sic illecebræ mundi, quæ *temporalia* viris ſpiritualibus vocantur, plures ſectatores habent: quia lætiora ſunt aſpectu, & ab exteriori ſenſu penſantur, licet.

exitu

exitu posthæc tristitia, quam solidior virtus, cujus pretium & æstimatio, altiori menti subjacet. Ex eodem fonte (ad propositum ut redeam) *boni domini, apud malos pejus audiunt*, & nisi amissos vulgus agnoscit, seroque dolet, aut secus, mali æstimantur, dum illis populi sunt assuefacti, moribus, epulis, venatu, facilitate, luxuria, tum exercitiis conformes; vel ut Neronis vitia, haud minus adamaverat populus, quam virtutes aliorum veneraretur, & in Vitellio (idem observavit Tacitus) *studia populi tum exercitus, raro cuiquam bonis artibus quasita perinde assuere, quam huic per ignaviam*: Quid mirum igitur? si ne Divina quidem vulgus probat, Moyse populum ex Ægypti servitute eductum, cum ordinatissime mollissimeque habet, mannæis de cœlo panibus, delicata coturnice dum pascit, periculis insuper, in manu Dei potenti, dum promptissime adest. *Portans populum in sinu, sicut portare solet nutrix*
infan-

infantulum: Murmuravit populus contra Moysen, dicens: Cur fecisti nos exire de Ægypto, utinam mortui essemus in terra Ægypti, in mentem nobis veniunt cucumeres, & pepones & cepa, & allia. Causam rei scire placet? en cape; Moyses ad virtutis legem animos populi componebat, in Ægypto in corpora sæviebatur, hominum vero proterviæ, tristiore esse modestiam virtutis & correctivam legem, dum intimum animum petit, quam corporis exteriorem servitutem, Ægyptus crassa carniū epula, & ignobiles delicias servilibus ingeniis obtrudebat, Moyses altiore escam suppeditabat, & afferebat (sed non sine regula) libertatem, quorum nisi ingenui altiorisque mentis homines, sunt capaces, ingeniis absurdis & non intelligentibus, nisi quæ sensu exteriori pensantur, placent, præsentia minora minora dum intuentur (infascinati) futura majora negligunt, simulque obtrectant superioribus. Tamen

men universim, (ut verum fatear.)
Invidiæ, sermones vulgi, & acerbior
censura, in principes viros, aut quo-
quo modo æstimatos (præsertim qui
admoneri per singulos nequeunt, tum
in quos nulla potestas est) non obsit,
sed necessaria ut plurimum est idque
còmunis boni causa, si enim imme-
rito jactetur, prodest tamen, ne de-
praventur, qui boni sunt, immo ad
altiora calcar habent, velut præmoni-
ti, dum intrò se (num verum sit ?) in-
trospiciunt, & simul *humanorum* ad-
monentur, sin vera est, in melius cor-
rigit, vel saltem ne peiores evadamus,
acerbitate aut metu majoris ignominie
nos coërcet: *Merito constitutus est ho-*
nor in opinione aliena, ut scilicet in metu
simus, cumque actiones nostræ? ab alio-
rum dependent judicio, omnibus satisfac-
ere studeamus: Etiam libertatis in Re-
publica signum est, obrectatio, in ea e-
nim, quam tyrannus oppressam jam te-
net, neuiquam permittitur, (Didac.

65. Ultimum monitorum illud esse debuerat, sed manum amoveni de tabula, en occurrit dictum, ore ab Ethnicis, vere Catholico-politicum, tibi, alteri mihi que mature sciendum. *Qui notus nimium vivit omnibus, ignotus moritur sibi.* Vel quod rectius Divus scriptor. *Qui vixit velut immemor DEI, moritur in fine tandem oblitus sui.* Felix vivit, qui medios inter negotiosi seculi dies & fortunæ blandimenta, furto sibi subducit horas, aut saltem extrema vitæ applicaturus DEO, explicatus sponte, ab humanorum curis, rectius illas deserturus ipse quam ut relinquatur invitus ab illis. *Minimum est quod restat vitæ seni decrepito* (Barthol. Gramondus lib. 2. Histor. Gall.) *quique Reipublicæ & amicis plane inutile est, annus unus & alter, quo victurum se sperat, multum aternitati valet, momento paratur aternitas, felix aut infortunata, qualem sibi quisque procurat.*
Non

Non immerito Seneca illud Senibus, humana nimis studiose disponentibus, in multos velut annos victuris. *Nihil turpius est, quam senex vivere incipiens.* Pulchrum immo, dum vivimus senes, sed mortui mundo, victuri tandem nobis, cum vivimus Deo.

A DEI nomine, incepti hæc monita, in eodem finivi, qui mihi rerum Alpha & Omega, tuisque actionibus, utinam sit oportet, immo sit necesse omnibus, dum vero ad eum, nostra plene dirigentur, ut quid? (bonis) opus his aliorumque monitis, aut secus, quo magis à divinorum cogitatione & amore (quasi ab ultimario summoque bono) recedimus, neque hæc, aut mille talia, satis ad cautionem, recteve agendum sufficiant in doctrinam, etenim quo magis sumus erronei circa eligendum verum bonum, plus in passiones animi incurrimus, & vario illidimur, quam ut narrari cautio possit, turbamus inquieti alios & turbamur vicissim ab illis. Scire

K 2

enim,

enim, brevi compendio rem grãndem,
se oportet.

Commotiones seu *Passiones animi*, ori-
riri ex *absentia* aut à *præsentia boni*, sit *ve-*
ri, sit *opinatiui*, per se autem verum &
perfectum bonum, non est, nisi solus
DEUS; nam reliqua bona sunt ab hoc,
vel propter hunc, id est, in hoc. Quæ
autem extra hunc, sunt tantum non so-
lida, finita, transitoria, aut opinati-
va, vel falsa bona, prout cujusque o-
pinio ex temporali sibi statuit, & ex
appetitu falso, immo, si penitius per-
penderis, sunt vere, ipsa mala; Ideo-
que post lapsum primi parentis, & post
amissam originalem gratiam, (velut pos-
sessionem Dei, id est veri, summi & ul-
timarii Boni) *passiones animi*, non pos-
sunt non esse in homine, dum quiescere
non potest, sed per hæc, aut illa vagatur,
velut in via, quærit, invenit quodam-
modo, nec materialibus (*mentem ha-*
bens immaterialem animumque) plene
satiatur, sed irritatur verius, dum est ex-
tra

tra metam perfecti boni positus, adipisci vero, illud non potest, nisi (pro sorte meritum) post emensam vitæ viam, occupet in visione DEUM, qui uti infinitus est, solus vastam & plane infinitam mentem hominis, sufficientissime implet, & perfectissime terminabit; Immo, in hac vita, qui magis DEUM animitus meditantur, minus de illicitis animi passionibus habent, ipsi quieti, dum falsi, opinativi, nec proportionati hominis animo boni contemptores, & incurii, meditatione Divinitatis, quasi in possessionem *veræ Boni*, mature & ante tempus incipiunt involare: Atque hinc est, *materia & causa omnium Virtutum*, studio (qui est unicuique finis humanæ voluntatis & actionum) habendi veri, summi & perfecti boni, aut secus, circa ejus absentiam, tum in eligendo errorem, aut malitiosam inconstantiam in quærendo, est causa commotionum & passionum animi, tum ex non domitis, *causa immo materia vitiorum.*

A P P E N D I X.

I C O N

INGENIORUM.

Genera Ingeniorum (seu Animorum) varia seu BONA,
seu MALA sunt.

In genere BONORUM ponuntur.

Ingenium Frugi, Rectum & Simplex,
Reale, Probum (seu Integerrimum),
Æquum (seu Amans Justitiæ) Apertum
(seu Candidum vel Sincereum) Clarum.
Ingenuum, Verax, Grave, Judiciosum,
Solidum, Prudens, Validum seu Fir-
mum, Constans & Stabile, vel Perse-
verans. Tenax verbi, Infractum, Assi-
duum, Sedulum, Studiosum, Serium,
Defæcatum, Maturum, Consumma-
tum, Sobrium, Practicum (seu Pra-
gmaticum) Vivax (seu Vegetum) Ere-
ctum, Peræquale, Excellens. Penetra-
tivum, Considerativum, In se retra-
ctum,

Etum, Profundum, Discretum (seu Discernens) Perspicax, seu res à longe, & ante tempus prospiciens. *Nec sciens fallere, nec falli se sinens*, Cautum, Vigilans, Providum (seu Circumspectum) Sagax (vel Solers) Expeditum (seu Promptum) Extra dilationes positum, *consultisque facta conjungens*, Sui compos, Recollectivum, Aptum & Habile, Industrius, Conceptuosus, Speculativus, Capax, Elegans, Castigatus, Efficax, Facundus, Politicus, Nobile, Dives & Fœcundus, Versatus, Laboriosus, Conabundus, Activus, Alacre, Indefessus, Generosus, Magnus; seu Magnanimus, Animosus, Altus (seu Altioris spiritus) Cordatus (seu virile) Intrepidus; Æquanimus, Pacatus (vel Quietus, seu Mansuetus) Actione suave, Clemens, Commiserativus, Temperatus, Verecundus, Religiosus (aut quæ aliæ devoti animi dotes) Civile vel Urbanus; Populare, Benevolum

feu Benignum, Fidum, Lentum, Cunctabundum, Sedatum, Qualitativum, Frugale, Tractabile, Sociabile Come (feu Affabile) Morigerum, Liberale, Hospitale, Humanum, Amicabile, Amœnum, Festivum, Docile, Corrigibile, Concinnum, Recte compositum, feu Cultum vel Comptum, Moderatum, Sui potens, Amans Publici, *Universale*, mediocrè Liberum, *Non dependens nec Obnoxium*.

Dictum pro genere bonorum ingeniorum erat satis, verum nulla festinatio, transgredi cogit mentionem Elogiorum, quibus arguto satis breviloquio *Vellejus Paterculus*, magnorum olim nominum viros (per diversa genera virtutum & rectorum ingeniorum) passim decoravit. Vir in tantum laudandus, in quantum virtus intelligi potest. Nihil in vita sua nisi laudandum, aut fecit, aut dixit, aut sensit. Tantis adornatus virtutibus, quantas perfecta natura aut industria, & mortalis conditio

ditio recipere potest. Neque dicendus, neque silendus sine cura. Viri, cujus operum & ingenii magnitudo, instar magnorum voluminum. Per omnia virtuti simillimus. Ita omnia simul, ita singula ex omnibus agens, tanquam expeditissimus ille tantorum negotiorum mole, huic uni negotio vacaret animus. Nunquam recte faciens, ut facere videretur, sed quia aliter facere non poterat; Natus ad omnia, quæ rectè facienda sunt. Vir severitatis lætissimæ, hilaritatis, priscæ, actu otioso simillimus, Fœmina (nam & huic sexui sua quoque decora sunt) nihil muliebri habens, præter corpus. Cujus potentiam nemo sensit, nisi aut levatione periculi, aut accessione dignitatis (*Vellejus Paternulus passim in Historia.*)

In genere MALORUM ponuntur.

Ingenium Obliquum, Malignum (seu Malitiosum) vel Nequam, Cholericum (seu Iracundum) Igneum vel Ardens,

K 5

aut

aut secus Tepidum, Imperiosum, Officii insolens, in alios Inquies, & Abusivum; aut secus, operæ tædio, vel inertia se ipsum conficiens; Acre, Violans, Trux, (seu Ferax) Flagrans (seu valde volens) Impatiens, Vehemens (seu Impetuosum, Præceps, aut Concitatum) Desperatum, Præcox, Cerebrosum, Infociabile, Illiberale, Inclemens, Invidiosum, Zelotypum, Pertinax seu Obstinatum, Protervum, Incredulum, Morosum (seu Absurdum, Sordidum, Subrusticum aut Insulsum) Cynicum, Dubium seu Dubitativum, Consternatum, Meticulosum (vel Pavidum) Irresolutum, Nullius ausus capax, Futuri socors, Ægrum, Ærumnosum, Querulum, *cui nunquam bene*, Incurium (vel Negligens, seu Neglectim transitorieque agens) Perfunctorium, Obliviosum, Impeditum (seu non Expeditum & Hæsitans) Inexplicatum, Involutum, Tædiosum seu Fastidiosum, vel Nauseabundum, Inexplebile,

plebile, Novicupidum, id est, *presentium intolerans, mutationis avidum*, Curiosum, sibi complacens (quod laborat Philautia) Jactabundum, Affectuosum. Passionatum, Affectatum, Tumidum (seu Præsumptuosum, Fastuosum, Ventosum aut Arrogans) Pompaticum, Impendiosum, vel Sumptuosum, Laudipetum, Inane, Vanum, (*quod facit tantum in speciem, aut non solita pensat*) Ambitiosum, Æmulum, seu Æmulatorium, Ostentativum, Sciolum, Fucatum, Exuberans, *verbis, gestus affectivè magnificum*, *Rerum & solida mentis vacuum* [vel quod est totum in exterioribus & in lingua, ad numerum nisi totum faciens, aut si dicere licet, *Vano Stoicum*, tum Superciliosum [Mendax, Susurroneum, Dicax, [id est Garrulum, Clamosum, Loquaculum, seu Vaniloquum, & Intemperantis linguæ; vel Sermonis insolens, & immodicum, aut verbis nimium] Detrectatorium, seu Oblatrativum,

Impudens, Scommaticum [seu Conviciatorium, Satyricum, Aculeatum aut Cavillosum] Succensorium, Illusorium, Nugatorium, Argutulum, Jocularium, [*visu amabile, facieque amœnum, intolerabile factis moribus*] Sugillatorium, Procax, Vexatorium, Insimulativum, Humile, Tenue, Abiectum, Pusillanime, Superstitiosum, Flagitiosum; Probrosus, Scandalosus, Impotens sui, Dissolutum, Prodigum, Luxuriosus, Voluptuarius, Delicatulum seu Deliciosus, Effœminatum, Seditiosus, Effrene, Inquies & Turbidum, seu Turbulentum, Incentorium, Suggestivum, Vecors, Insolens, Refractarius, Calcitrosus, Audaculum, Insanabile seu Incorrigibile. Perniciosus seu Exitiosus, Asperum, Immoderatum, Horarium, Ambulatorium, Mobile, Inconstans vel Instabile, Fluctuabundum, Vagabundum, Leve, Creditum, Fragile, Lubricum, Recidivum, Latebrosus,

sum, Furtivum, Erroneum, Opinativum, *Alieni rimans & interpret, sui obregens*, Implicitum, Obscurum, Criticum, Vertiginosum, Vesanum, Fanaticum, Extenuativum, aut secus Exaggerativum, Exprobrativum, Mirabile, Varium, Phanasticum, Ambagiosum, Chimericum, Intricatum, Labyrinthosum, ambiguum (seu Anceps) Neutrale, Deceptorium aut Fallax, Infidum, Mille artifex [quod & Machiavellisticum vocant] Velatæ astutiæ, seu paliatæ malitiæ, Mentitæ frontis & formæ, Captiosum, Impium, Iniquum, (seu injustum) Avarum, Parcum (seu Tenax) Subdolum, Privatipetum [*id est, in tantum hoc aut illud agens, vel non, tum amicitias colens, in quantum privatus respectus adest, aut se transfrens, unde plus utilitatis speratur, amicitias utilitate probans.* Venale, Quæstuosum, *cui id æquum*, Honestum, *id ex publica libertate nihilque turpe quod fructuosum*] Rapax, seu Alieni cupidum,

dum, Effrons, Prævaricatorium, Falsarium, Hypocriticum, Simulativum, Sycophanticum, Infame, Perfidum, Versatile, Injuriosum, Grave, Dolum, Insidiosum, Subastutum, Versutum (seu Vastrum) Quodvis struendi & destruendi artifex, Temerarium, Furiosum, Sævum, Efferum seu Tyrannicum, Vindicativum, Sanguinari-um, Inexorabile, Contentiosum (vel Discors & Dissidiosum) Rixosum, Adversum, Criminatorium, Suspica, Dif-fidens, Rimatorium, Indaginosum, Sub-stultum seu Fatuum, Intrusum, Adu-latorium, Assentatorium, Importunum, Petax, Servile, Nimis placens (vulgo *Placentinum*) Effusum, Immodicum, seu per omnia nimium, Fatigabile, Tardum (seu Pigrum, Desidiosum vel Socors, & Operas fugiens) Procrasti-nativum, negotio pendulum, Ignavum, Languidum, Effœtum (seu Expletum, Exhaustum vel Enerve) Fractum, Otiosum, Molle (seu Infirmum) Respe-ctivum,

Ætivum, Hebes, Iners, (seu Imperitum vel Rude) Frivolum, Ineptum, Vulgare, *Impar nec Proportionatum sue sortis, vel negotio* (aut fecus) *supra sortem vel negotium.* Debile, Stupidum seu solidum, Obtusum, Incapax, Non intelligens, Confusum, Durum, Inhumanum, Tetricum, Distractum, Mistum, Suspectum, Omnium formarum, Nullius aut inferioris judicii, Unico verbo non satis exprimendum.

Dei generis INDIFFERENTIS sunt.

Ingeniosum, Officiosum seu Obsequiosum, Largum, Insinuativum, Acutum (seu Subtile) argutum, Discursivum, Lepidum, Facetum, Joviale, Familiare, Affectatæ simplicitatis, Illecebris potens, Seria joci miscens, Demerendis hominibus gentium, Lautum, Facile (aut fecus) Difficile, Domesticum, Solitarium (aut Segrex, vel Secessu gaudens) Melancholicum, Morum & vitæ contractioris) Triste, Austerum, *Omnibus Amicum, Nemini familiare,*
Recon-

Reconditum, Secretum, Arcanosum,
 Circuitivum [id est, quod directe ca-
 vet aut veretur] Apprehensivum, Me-
 ditabundum, Dissimulativum, Coacti-
 moris [id est, quod non ad Naturalem
libertatem Venustatemque, sed velut co-
actos actus habet, nec ab intima virtu-
te, sed ab affectato artificio] Moræ im-
 patiens, Properum seu Festinans, Fer-
 vidum, Sollicitum, Sedentarium, Pri-
 vatum, Taciturnum, Arcani capax,
 Scrupulosum, Zelosum, Rigidum, In-
 dignabundum, Severum, Censorium,
 Negotiosum, Authoritativum, Prisci
 moris, Immobile, Stoicum, Sequax,
 Flexibile, Scholasticum [*quod magis*
Scholam & curiositates rationum, quam
praxim sapit] sibi Fidens, Secutum,
 Audax, *cui nihil arduum, nihil supra*
spem, in obstantia ruens, Luctabundum,
 Satagens, Vastum, Extremum [id est,
 per intervalla in summo gradu boni aut
 mali, repentè sibi contrarium] sed hæc
 in indifferenti ponenda, prout in bo-
 nam

nam aut malam partem agunt.

Alia igitur *Ingenia*, ex bono genere magis aut minus participant & sunt bona aut meliora.

Alia merè ex genere malo, & sunt pessima.

Alia ex utroque simul; Prout vero minus ex malo, plus ex bono trahunt, (tristi enim privilegio fragilitatis humanæ, nemini ferè per omnia bonum esse licet) utcunque temperantur. Aut magis aut minus mala sunt.

Demum : Alia *Ingenia* hominum. Dum quodvis genus vitii eruditè exercent, ex quavis planè virtute trahunt partem, mistim, simul virtutis, astutiæ (& actionis unico verbo non satis exprimenda) peritissimi artifices. Quo sub pallio, facile rebus imponunt, sunt verò omnium ingeniorum publicis privatisvè negotiis versandis astutissima, simulque vivendo familiarissima, non enim simplici stylo agendi rem transmittunt, sed agunt totum ex arte, & cum

cum condimento, obvia & ultrò la-
 cessens (jocisque respersa) inest comi-
 tas, solutior (ad familiaritatem) con-
 victus, querulantibus & afflictis (no-
 tis atque ignotis) prompta condolen-
 tia, effusa promissa, res vero, ipsa-
 que largitio, admodum pauca, sed nisi
 pro tempore amœna, & prius ante o-
 stentata, ideoque expectatione grata.
 Offensarum deinde aperta dissimulatio,
 aut joco eludens argutia, cum tamen
 sensim immineat, velut per incuriam
 vindicta, eò magis intimum amicum
 feriens, quo subtilius & ex occulto
 meditata, ut fere talia ingenia, *Uni-
 versalia* vocaverim, nisi sint in mate-
 ria obliquorum. Nihil illis tentando
 magnum aut difficile, (sed pari ausu,
 sæpius vero neglectim, vel ut somnum
 & inertiam simulantes, *immo specie jo-
 santium magis, quam serio*) aggredi-
 untur, velut subjugatam materiam ver-
 sant, membratim excutiunt, per di-
 gitos transmittunt, principium, me-
 dium,

dum, finem, apte concordant & exsequuntur, aut secus pro arbitrio negligunt, explicant se familiariter, nec hærent, nec adversis confunduntur. Cum vero obtrudunt falsas imagines virtutum, & inescant specie boni, vitia liberius exercent, decipulis (Sirenarum adinstar) sine sensu plerosque involventes, ut non prius capi se sentiant, quam dum sunt, nec regressus amplius datur, ut rectè habeantur. Ægyptiorum latronum more (apud Senecam) quos *Philistas* vocabant, qui in amicitia speciem, in hoc complectebantur, obvios, ut jugularent, vel denique alias, sunt, velut de quodam ait Tacitus: *Cui quamvis infami inerat industria: nec virtutibus, ut boni, sed quomodo pessimus quisque vitiis agendo volebat.* Talia ingenia rarius tulit orbis, utique verum fatear, ætate mea, quæ vidi (inter) quæ novi, vix duo aspexi.

Nec illud pensandis pro recta virtute ingenuis omitendum.

Per

Per *Excessum* aut *Defectum* boni, falsam speciem nobis imponi virtutis, idque pro defectu iudicii; cum non probe dignoscere scimus, ex eoque fallimur, sæpe virtutem dictitantes, cum inest factum vitium, undè injuria fiat re-ctis, dum pravis ex falso, nomen virtutis, & laus adstruitur. Alibi sparsim; hic accumulatissime ponimus cautionem.

Pœna igitur & debita Castigatio, (seu *Iustitia Correctiva & Pœnalis*) sæpe degenerat (per *Excessum ex Abusu*) in Severitatem nimiam, aut Sævitiem vel Crudelitatem, gravitatem, importunitatemque rigoris, immo in vindictam vel ultionem, aut ex præcipitantia in pressuram innocentia. *Iustitia reformativa* aut *Commutativa*, in gravamen indebitum, emunctionem fortunarum, circumventionem, extorsionem, & injuriam. *Amor equitatis*, aut *titulus Patrocinii*; tum *Protectio*, vel *alias Innocentia sua tum aliorum*, aut *injuria*

juria vel damni (immo quandoque *legum, publicique boni*) *defensio aut zelus*, per excessum degenerat, in Prævaricationem (seu irritationem) causæ, ac ipsius legis, tum justitiæ, aut in ostentationem insolentem potestatis & potentiaë, aut in affectatum æquitatis titulum, alterius vero partis injuriam, gravamen, seu despectum; Ex eoque in modum indebitum & inquietum agendi, tum in majorem recti ordinis [immo nonnunquam quietis mutuaë] irritationem, seu in exacerbationem conflictumque [prout potentes sunt] partim & publicas turbas; ut quandoque *respectu emergentium*, virtus dissimulationis [intra prudentiam adhibita] plus profit, quam æquitatis prætensæ, aut actionis, nimius rigor scrupulus, & præcipitantia. *Usus summa potestatis*, degenerat per Excessum, in Insolentiam pro libitu agendo, Violationem jurium, ac post oppressionem. *Ordo debitus & potestas*, degenerat plerumque in Jussorum

238 *Andrea Maximil. Fredro*
rum institutorumque intolerabilem
gravitatem aut rigorem ex eoque præ-
cipitantem pœnam, & importuna ver-
bera, immo nonnunquam, ex incon-
siderata ordinatione, in majorem con-
fusionem ordinis & rerum. *Politica pra-*
xis, & necessaria legis regula, in actio-
nem Stoicam, aut Scholasticam ratio-
cinationem, [tum intra discursum,
circa vero praxim] maximas. *Iustapo-*
tentia in oppressionem aliorum, tum
injuriam. *Ratio status* in nimium re-
gendi rigorem, prætenſa jura Maje-
statis, & tristem inquisitionem. *Aqua*
tributa & subsidia belli, in insolentem
Emunctionem subditorum, *Bona insti-*
tuta, leges & crebra consultatio, per
Excessum pariunt, Multiplicitatem e-
dictorum (immo Levitatem & Con-
tradictoria) ac deinde abusum, jusso-
rumque contemptum. *Catholico-Politica*,
per nimium rigorem & excessum, de-
generat in pressuram populi, ac post in
Saphſto-Politiam, & oblivionem con-
scientiæ

scientiæ Libertas in licentiam. *Maturior recollectio*, *Deliberatio* & multa *Consilia* in mobilitatem ingenii, tum consilii & facti, tam in Inconstantiam; aut secus in maiorem pertinaciam, vel animi obfirmationem in præconcepto, aut etiam tarditatem, unde agendi tempora, deliberando consumantur. *Activitas* & *Fervor* seu vivax animus tum mens seria vel *Negotiosa*, promptaque *Actio*, in igneum [& inquietum] seu insolentem geniun, Factionem, Errores, Impetum, Excessivam iram, & pœnitendorum occasionem. *Dissimulatio*, degenerat per Excessum, in Reconditam iram, ex eoque Circumventionem, Fraudem, occulta molimina, & Vindictam, vel secus in oblivionem pertinentium aut incuriam.

Dicam ultra. *Liberalitas*, *Beneficentia* seu *Magnificentia*, per excessum seu abusum, degenerat in prodigalitatem, aut profusionem. *Virtutis premium*, seu *justitia Distributiva*, vel *premiativa*,

iiva, in Adulationis tum officiorum (quæ molchum non sudorem , aut pulverem redolent) recompensam, vel in provocationem temerariæ cupidinis peracium (quibus postea dando non sufficias , aut sine offensa negare non possis) ex obvia facilitate dandi. *Par-simonia*, & *Debitus* (fruendi aut dispensandi) *Ordo*, in Parcitatem. *Fortunarum licitum augmentum*, & *Fru-galis*, *modicusque bonorum usus*, in A-varitiam, & Invidiam alienæ fortunæ, tum affluentia. *Affluentia*, rectaque *bonorum fruitio*, degenerat ex abusu, in Ostentationem aut Luxum, vel inan-ium studium, ex eoque occasionem defectus, immo (per decoctionem bo-norum) inopiæ. *Iustus petendi & ha-bendi pretextus*, per excessum degene-rat, in astutas inventiones, in quic-tam actionem, appetentiam alieni, im-portunitatem, seu insolentiam petiti-onis, & instantiæ, circumventionem, imposturas, usurpationem, tum raptu-ram,

ram, *Licetum acceptum aut munera*, per excessum (immo per actus frequentatos) degenerat, in Inverecundiam accipiendi, deinde amicitiae & servilis obsequii (tum conscientiae ac denique veritatis) venundationem, tum in appetendi abusum, immo in corruptionem virtutis, *Magnificencia* in Superbiam & Profusionem inutilem, vel superfluatorum (immo quandoque difficilem, ne dicam impossibilem) conatum, & sua prompte perdendi studium. *Innocentiae excusatio*, per excessum degenerat in praxim evadendi, fallacias, vel artificiosum effugium (quod vulgus vocat astutam inventionem:) *Acusatio iusta, seu petitio, iustitiae*, degenerat per excessum in malignantem, imponendi scientiam & mendacia.

Deinde *Morum amoenitas*, degenerat per excessum in Levitatem. *Conversandi amor & Hilaritatis (seu Festivitatis) studium*, in Petulantiam, imò quandoque in otiosam vitam, Propi-

nationem, ac post Dissolutionem linguæ, actionis, & in honestatem vel quales otii ab fonte emanant malorum rivi. *Affabilitas & promptitudo sermonis, tum Urbanitas*, in Affectatam actionem, Insolentiam, importunitatemque verborum, seu loquacitatem. Deinde, in Diffamationem, imo in levitatem responsi, ex eoque occasionem, ut emergant pœnitentia. *Sinceritas verborum & Actionis, Confidentia, tum candor, Ingenuitas & Apertus animus*, in Propagationem tacendorum, & impatientiam secreti, tum in prodicionem sui (& aliorum, rerumque) incautam, & in occasionem emerfuri dampni, aut in meram garrulitatem, immo in facilitatem nimiam, & levitatem actionis. *Promptitudo Amicitia*, habet excessum, Actionis levitatem, aut facilitatem cujuscunque obviæ amicitia, tum Effusos & nimium apertos, in speciem sinceritatis actus, ex eoque Instabilitatem, seu Inconstantiam,

tiam. *Officii tum obsequii promptitudo, Alacritas, aut Diligentia*, degenerat in Intrusionem, tum importunitatem, & parit lassitudinem, dein levitatem conciliat, immo parit mutabilitatem, aut amorem quæstus, ut illuc amicitia transferatur, unde plus utilitatis speratur [vel ut alibi diximus, *Facetia, Affabilitas aut Jocositas*, parit cum excessum Importunos sermones, Dicacitatem, scommata, Vexationem, Diffamationem, seu Obtrectationem, & Sugillationem rerum, aut plerumque mendacia, dein parit Levitatem. *Amicitia sinceritas & Confidentia* degenerat in nimiam familiaritatem, ex eoque contemptum, vel alias [sub prætextu confidentia] degenerat in Insolentiam dicti aut actionis fallacias, injuriam, ex eoque jurgia, tum offensas. *Verecundia, Mansuetudo*, [seu dicti, aut facti, ususque fortunarum] *Modestia*, in Abjectam humilitatem, & cultus indecentiam, Incivilitatem, immò in sui post-

habitationem, seu vilipendium, tum quandoque in meticulositatem, seu pusillanimitatem. *Debitum officii*, seu *honor in alios*, degenerat per excessum, in Servilitatem, aut turpem dependentiam, & de rebus sensum, non qualem recta ratio aut ingenuitas dicat, sed qualis inspiratur, tum in animi abjectionem, aut in deforme obsequium, nec ingenuam adulationem, sui vero ipsius contemptum, seu prostitutionem honoris, immo nonnunquam in politicam hypocrisin, *Authoritas tum honor debitus sui*, aut *Gravitas*, deinde (quod proximum est.) *Iusta petitio promotionis*, *praefecturam*, *Officii*, *tituli* per excessum degenerat, in turpem Ambitum, Superbiam, praesumptionem, Factiones, Factum, Aemulationem, Aequalitatis odium, seu (nonnunquam in Incivilitatem ex aliorum contemptu, vel quidquid alicui accessurum in melius) Invidiam, imo destructionem; Superfluum vero sui cultum, formula-

rum

rum exigendarum, morositatem & nimium scrupulum, immo (ut affatim fastuosis suppetat impensis) degenerat in Avaritiam, & oppressionem quomodo minorum, tum injuriam, ne dicam in publicas turbas, velut superbiæ malum, multa cognata vitia posse se trahit, privatim & in publicum.

Addam super hæc. *Benevolentia vel Bonitas, seu promptitudo*, degenerat per Excessum, in Facilitatem nimiam ex Improvidentia, aut in actionis (promissorumque) levitatem, & sermonis, seu in actus incautos & incurios (quod simplicitatem, immo quandoque *stupiditatem* vulgus vocat) *Bonus pro aequitate zelus, aut debita in contraria indignatio: Dein Prætextu servandi ordinis Rigor, Fervor & Austeritas*, degenerat in Iram excessivam, Affectum aut importunum ardorem, seu flagrantiam, & Inquietudinem mentis, modumque indebitum agendi. *Clementia, Commiseratio, & ex eo prætextum Patrocinium,*

in Indulgentiam nimiam & Impunitatem, immo Incentivum ulterioris malitiæ. *Benignitas aut teneritudo affectus* in Mollitiem animi. *Necessitas*, (quoad corpus) in nimiam ejus mollitiem & superfluatorum curam, tum appetentiam. *Recta sua virtutis conscientia*, & *elegantia attributorum*, in Philautiam, complacentiam sui, aut Jactantiam. *Generositas animi*, prout huic vel alteri virtuti, aut simul pluribus annexa est (nam sola, præsertim sine heroicis virtutibus animo inesse nequit) degenerat diversimodè in Excessum actionis & Insolentiam, Impudentiam & prostitutionem famæ, aut denique (*ex elatiore rerum contemptu*) degenerat, in pertinentium incuriam, vel prout, per diversa generum vitiorum, aut excessum virtutum, passim hic suggestum habes. *Religio vel Pietas*, in superstitionem. *Probitas*, pietas aperta & titulus Virtutis, in Hypocrisin. *Quis*, *Modestia*, tum animi tranquillitas, & laxamen-

tum,

tum, aut prætectu requiei cessatio, in Ignaviam, Desidiam, Tepidas actiones, & amorem otii, aut in Incivilitatem, vel Solitariam & insociabilem vitam. Taciturnitas, in Reticentiam opportunorum. Timida conscientia, in inanem scrupulum. Justus dolor animi, aut multa rerum consideratio, degenerat in Mœstitiam, seu Mentis angorem, Impatientiam, indignationem, Iram Excessivam, Abominationem rei vel personarum, & indebitam actionem, aut denique furorem.

Demum *Audacia tum animositas vel Magnanimitas, per excessum seu Abusum, degenerat, in Temeritatem aut furiosam actionem, tum periculi evidentis [immo quandoque personarum] ex nimia sui fiducia contemptum, aut rerum impossibilium supra vires conatum, & ex eo levitatem, vel in impudentiam actionis, aut in inconsideratum impetum agendi. Deinde in falsam præsumptamque audaciam, seu de-*

sperationem. *Securitas* in Summam incuriam, aut negligentiam, & contemptum alieni consilii. *Fortitudo* degenerat per Excessum, in Impetuositatem, & Ferociam. *Iustum bellum* vel *Belligeratio* degenerat in insolentiam irritandi, aut temeritatem, flagitia, devastationem, protractionem, aut carnificinam, inutilem alieni usurpationem & rapinam, vel rabiosam ultionem, aut quæ alia tristis ejus partus proles. *Perspicacitas*, *licita cautio* aut *circumspectio*, tum *Conscientia alicujus defectus*, in Respectum nimium, Diffidentiam, Vanas suspiciones, Desponsionem seu Abjectionem animi, Credulitatem nimiam, reconditam mentem, inanemque timorem, seu pusillanimitatem; aut nonnunquam in ignavam desperationem. *Constantia & stabilitas*, vel *infractus animus*, seu *robur animi*, per excessum degenerat in Pertinaciam. *Celeritas* tum *properantia* seu *Activitas* in præcipitantiam aut Impatientiam moræ,

dein

dein in Inanimadvertiam, occasionem (immo accelerationem) mali aut contemptum considerandorum, & incuriam, ac post damnum. *Cunctatio*, degenerat per excessum, in Tarditatem, Amissionem occasionum, tum in Ignaviam. *Cautio industriosa, vel prævividendi prudentia*, in Astutiam, Fallacias. Verfutiam & Dolum. *Veritas Propositionis, seu Narrationis, aut Dictorum prudentia*, in Contentionem. Pertinaciam sermonis, ac dicacitatem superfluam, deinde in Impugnationem oppositæ veritatis, seu affectatam destructionem illationis, loquendo nonnunquam, magis ex alieno instinctu & arbitrio, tam pro aucupanda gratia, quam pro veritate. *Veritas correctiva, aut debita reprehensio, tum Censura*, degenerat per Excessum, in Importunitatem dicti, Diffamationem, Exprobrationem morosam, tum exacerbationem & offensas. *Prudentia ratiocinandi aut Discursus*, per excessum parit Garrulitatem,

250 *Andrea Maximil. Fredro*
aut Ostentationem, & Insolentiam di-
ctorum, fucatos sermones, frivolas
probationes, & verborum rationum-
que pigmenta. *Studia & artes*, Curio-
sitatem, quæstionem, pruritum dispu-
tandi & contentionis, tum importunas
novitates. *Scientia & Experientia*, de-
generat plerumque in nimiam sui con-
fidentiam & præsumptionem pruden-
tiæ, alieni consilii rationisque con-
temptum, & ultimo habet,
Confusionem.

Ac deinceps.

Ex defectu virtutum, vitia sunt, I-
deoque aliud est *rectè agere* vel *esse pru-*
dentem agendo, aliud agere feliciter ex
successu, scire incipere & tentare le-
viter, aut trahere tantum: Immo se-
cus, agere neglectim & metuentes, vel
denique per audientiam & pro impetu
animi, ignoranter inquietare actiones,
irritare, vexare, & confundere mate-
rias. Aliud *Probè (dicto facto) expe-*
dire

dire tum Adimplere, vel alias, Respon-
dere directe, Aliud Eludere. Aliud est
Esse scientem, aliud Sciolum. Aliud
Esse audacem, aliud Audaculum. Aliud
est, Esse in aliquo genere Virtutis, aliud
sibi videri, aut haberi velle affectate.
Aliud est Dolore, veteri, vel agere ali-
quid filialiter, id est, pro virtutis amore,
aliud pro servili pavore, impulsu, aut
respectu, seu pro formidine poenæ. A-
liud Esse Amicum rectum, Constantem,
Promptum, aliud agere Adulatorem,
Assentatorem, Hypocriticum, verbo
effusum, levemque realitate vacuum,
Intrusum, mensæ asseclam, mentitæ
frontis, Sycophantam, Cortesanium,
Susurronem, Obsequiosum, tuæ for-
tunæ (immo sui causa) non tui ami-
cum, vel potius magis familiarem,
quam amicum, visu amabilem, re ipsa
subdolum, Aliud Exequi aut esse in re,
tum spe certa vel praxi, aliud esset an-
tum intra verba, promissavè; tum dis-
cursum, aut intra fallacia omnia ex

L 6futuro

252 *Andrea Maximil. Fredro*
futuro eventu. Aliud est, *Nolle sponte*
cessare, quiescere, aut sibi consulto tem-
perare, aliud deficere; otari, vel pla-
nè non posse; velut argute Seneca:
Nolle, in causa est, non posse, prætendi-
tur. Aliud est, *Consilium petere, aliud*
vexare, tentare, aut expiscare tantum,
seu quarere placentia & assensum, vel-
leque decipi. Aliud *Consilium dare, at-*
que aliud materias irritare, eludere,
immò nonnunquam suavia innuendo
(aut vera omittendo) adulari, assen-
tiri, rebusque illudere & denique fal-
lere. Aliud *Habere justam agendi cau-*
sam, aliud Habere affectatum præte-
xtum. Aliud est, *Facere quod est vir-*
tutis & esse realiter bonum, aliud Ces-
sare à malo, & esse tantum non ma-
lum, velut ille de Galba: Magis ex-
tra vitia, quam cum virtutibus. Aliud
est, *Esse discretum (ut vulgus commu-*
niter Officiositatem Politicorum, seu
Promptitudinem vocat) aliud oblitum
sui, & suorum, esse planè rerum in-
curium,

curium, mollem, & nimia familiaritate, peccare. Aliud est *Esse eloquentem aut persuadendo fortem*: aliud esse affectate loquaculum, pigmentis verborum & coloribus ludere, imponendo rebus aliis, dein alios per astutiam & Sophismata eludendo, (tum prout conducit, amplificando, extenuando, obtegendo) falsa statuere, proba invertere, personas denique, resque fallere. Vel si quæ dantur, aut rectius dici possunt alia.

Exinde, pro insolentia ingenii, plerumque vitiis, nomina virtutum imponimus, aut secus per malignitatem, vitiorum nomina, adstruimus virtuti, quod necesse (tecto ingeniorum virtutisque pensatori) cavendum.

❧ (o) ❧

Hinc proximum dicere

T R I P L E X

POLITICORUM G E N U S.

I.

Sunt *Catholici Politici*. Qui rationes status & artes agendi, ad Regulam conscientiae vocant, aut quod extra sit, utile, securum, laudabile, æque illicitum putant, candidæ mentis, nec ancipites, aut ex simulato captiosi, cauti tamen & prudentes. Horum actiones, apud versatos præsertim & obliquos (quibus occasio faciendi pro justitia est, & nisi dicta circuitiva, factaque arcanosa non aperta, sed obliqua, tum involuta placent) ruditatis notam ferunt, verum Deus illis, uti rectis, aperte favet, & supra media humana succurrit, ut plus solidiusque possint, quam alii.

2. *Stoico-*

2. *Stoico-Politici sunt.* Qui inter honesti regulam, quidquid agendum sit; actum quidem volunt, sed cum ad Stoicum rigorem se componunt, & cuncta vocant, nihilque casui, tempori, & rebus condonant, Morosi aut *Scholastici* Politici sunt potius, quam prudentes & Practici. Nec sanant aut componunt res, sed materias irritant sæpius, tristes aspectu, contracta fronte, facie suspensi, non ad Civilem commitatem, sed velut ex Cathedra, totum agentes, rapiunt res agendas, non reprehendunt, urgent non amant, nec etiam amantur.

3. *Sophisto-Politici.* Qui res agendi, fallaciis refertas habent acerbitatem factorum, jocos eludentes, seu obtegentes suaviloquio, virtutis tum amicitiae larvam induunt, quo malignius noceant, post rem privatam cuncta ponentes, non verbo stant, non scripto, sed totum ad suum sensum detorquent, licita, illicita, pari studio involvunt, eoque


256 *Andr. Max. Fredro Icon Ingenior.*
eoque magis suspecti, quo plus dissimulationem inter rem agunt, ex tacito magis metuendi. Cave (suadeam) hos, sed vix per summam prudentiam caveas. Tales plerumque suis artibus se ipsos involvunt, læta rerum exordia, sed tristem eventum habent. Documentis quid opus? Consenuit orbis, nec alium illicitorum, quam tristem vidit exitum, sola virtus æterna manet, concutitur illa, sed non frangitur.


Quantum genus Politicorum assignari potest, qui sunt Intermedii, de his iudicium non fero, Infer *Lector*, libenter audiam, nec inficiabor.


Hæc mea Catholico - Politicam loquuntur, & suadent *Lectori*.

Laus Uni in SS. Trinitate DEO.

F I N I S.







A 38